



چہلیاں سُراں

اقبال نازش

CHALYA'AN SURYA'AN

(Pahari Short Stories)

By: Iqbal Nazish

E-mail: iqbalnazish 2017@gmail.com

Mobile: 8803527089.... 7006801997



اقبال نازش جدید پہاڑی افسانے نے اودہ امیر کارواں بین ہمنہاں پٹھانیاں تری
سالاں بچ نوں نسل کی اپنے نال ٹوری کہہ انہاں کی نوں رنگ نہ آہنگ نال واقعہ کرایا۔
اس بچ کوئی شک نہہرہ جے زندگی نیاں تلخیاں انسان کی پتھر بنائی شوڑیاں بین مگر
فن پتھراں کی وی انسان بنائی شوڑیاں ہے۔ نازش وی انہاں فنکاراں بچوں اک بین۔ انہاں نا
افسانوی کینواس بہوں وسیع ہے ہور تخیل کی کوئی حد مقرر نہہرہ۔

انہاں فی نظر مقامی مسئلیاں نہ حالاتان نے نال نال قومی نہ بین الاقوامی سطح اپرو نما
ہون والے تغیر نہ تبدل اپرو دی لگی نی ہے جس نا ثبوت انہاں نا خوبصورت افسانہ چہلیاں
سُراں ہے۔ ڈوہنگے مطالعے تھیں بعد قاری اپرا ہیرو گل واضح ہوئی جانی ہے جے نازش ہوراں
نے افسانے فکری نہ فنی اعتبار نال پہاڑی ادب واسطے امتیازی حیثیت رکھنے بین۔ انہاں
افسانیاں بچ ہنرمندی نہ چا بک دستی نا استعمال سوہنے چچ نال کہتا گیا نا ہے۔ نازش ہوراں
اپنیاں افسانیاں بچ مضبوط پلاٹ نے نال نال چست مکالمے کہانی بین دلچسپی ہور وحدت تاثر
نا خاص خیال رکھیا ہے۔ لب و لہجہ فی تازگی لسانی سلاست شگفتہ بیانی ہور جدت طسرازی
جتنیاں خاصیتاں نے علاوہ موضوعاتی معنویت ناماہ الامتیاں ہے۔ امید ہے پہاڑی ادب نیاں
حلقیاں بچ انہاں نا ہیرو مجموعہ چہلیاں سُراں اپنا دیر پا اثر قائم کرسن بچ ضرور کامیاب ہوگا۔

پرویز مانوس

نہب

- ۷ _____ پیش گفتار _____ ❁
 ۱۲ _____ اپنی گل _____ ❁
 اقبال نازش _____

افسانے :

- ۱۔ _____ ماں _____ ۱۶
 ۲۔ _____ چار پیسے _____ ۲۳
 ۳۔ _____ کالی پڑی _____ ۲۹
 ۴۔ _____ چہلیاں سُراں _____ ۳۲
 ۵۔ _____ ٹھہنلا _____ ۳۶
 ۶۔ _____ ایہہ لاش کس نی ہے؟ _____ ۳۹
 ۷۔ _____ اڈھا خاب _____ ۴۱
 ۸۔ _____ مگراک شرط ہے! _____ ۴۵
 ۹۔ _____ شیشہ _____ ۴۹

[illegible]

- | | | |
|-----|---------------------|-----|
| ۱۱۳ | میسولپٹی نی گڈی | ۳۰۔ |
| ۱۱۸ | بسلوٹ | ۳۱۔ |
| ۱۲۳ | پچپان | ۳۲۔ |
| ۱۲۸ | سیل پتھر | ۳۳۔ |
| ۱۳۳ | مٹی نی خوشبو | ۳۴۔ |
| ۱۳۹ | بانو | ۳۵۔ |
| ۱۴۴ | گلناز | ۳۶۔ |
| ۱۵۲ | چینی چنے جی مری گئی | ۳۷۔ |
| ۱۵۹ | گلاب نالہو | ۳۸۔ |
| ۱۶۴ | لاپتہ | ۳۹۔ |



پیش گفتار

۱۹۹۰ء نے شروع بلکہ اس تھیں وی کچھ عرصہ پہلیاں کشمیرنی وادی جتھاں ہکس نویں کلچر تھیں متعارف ہوئی، اُتھے ای باری دُنیا کشمیریاں نے نویں رنگ ٹہنگ کی دِکھی کے دندان پٹھ انگلیاں دبانا پُر مجبور ہوئی گئی۔ اس نویں کلچرنا ادب آرٹ تہ فن موسیقی نی کسے وی صنف نال دُر در اہڈے نا کوئی تعلق نہیہ سی، سگوں اگر آکھیا جاوے جے ایہہ نویں واردات ادب تہ فن نال تعلق رکھن آلی ہر صنف نی دشمن تہ اس کی جڑاں تھیں اکھاڑ پھینکنا نے در پے سی تاں ہرگز غلط نہ ہوی۔ اس نویں کلچرنا ناں سی، ”گن کلچر“۔ انہاں سطران پنج اس کلچر نی برکت یا بے برکتی پُر گل کرنی یا کسے طراں نا تبصرہ کرنا ماہرِ اُمید عاہے تہ نہ ای مقصد بلکہ ایہہ دہسنا مقصود اے کہ نویں کلچر تہ ماحول پنج کاروبار زندگی نیاں دویاں شعبیاں نی ای طراں فن وثقافت نال جڑی نیاں ساریاں سرگرمیاں ٹھپ ہوئی تہ رہ گئیاں تہ اس سلسلے پنج سرینگر پنج مقیم ادب، فن تہ ثقافت نا متحرک تہ فعال ادارہ کلچرل اکادمی فالج زدہ ہوئی گیا تہ اس نے ہائی پروفائل سکریٹری کی کشمیر کی چھوڑی کئی برساں تکر جموں پنج ہی قیام کرنا پیا۔ ۱۹۹۰ء نے آغاز پنج پھر پور عسکری تحریک نے آغاز تھیں پہلیاں ای ٹیگور ہال سرینگر پنج دھماکے نہ صرف اس ثقافتی مرکز نے انجریخربہلے کری شوڑے بلکہ ایہہ دھماکہ اکادمی نیاں ملازماں تہ اس ادارے نال وابستگی رکھن والیاں

ادبیاں، شاعراں، قلمکاراں تہ فن کاراں لئی اک وارنگ شاٹ سا جے اگر جان فی امان چاہنے اوتاں چُپ چاپ کری بہہ جاؤ تہ سچی گل ایہہ ہے جے انہاں وی اس حکم نامے فی پابندی بچ گجھ کمی یا کوتاہی میہہ برتی۔ پر اس دباؤ نا اک فائدہ ایہہ ہو یا جے کرناہ توں پونچھ توڑیں ساری پہاڑی بستیاں اکادمی نیاں فیلڈ سرگرمیاں نامرکز تہ محور بنی گئیاں۔ تدوں ماتر وی اُجا جیا ”سیانا“ میہہ سا۔ اک جنون سا دیوانگی سی تہ گجھ کرن نا ہڑسا عقل، دانائی، حکمت تہ مصلحت اپنی جگہ اک گل طے اے کہ اس جنون، اس دیوانگی تہ وارفتگی نا (برعم خود) خمیر نیک نیتی فی مٹی توں اُٹھیا سی تہ اس بچ خلوص و ایثار فی خوشبو شامل سی۔ ایہہ اوہ ایام سن جدوں اکادمی نے پہاڑی شعبے فی طرفوں کرناہ نے ٹیڈال تہ ٹاڈ، اوڑی نے مکمل کوٹ تہ نامبلہ، مینڈھر نے چھترال تہ بالا کوٹ، پونچھ نے چھلاس تہ منڈی ہور راجوری نے دوداسن بالا توں لیکے بدھل نے پڑی ہور در ہال تھنہ منگ توڑیں شاندای کوئی بڑا گراں تہ گٹھ ہوسی جھتے اکادمی نا پہاڑی شعبہ نہ بچیا ہووے ہور ایہہ پروگرام وی محض روایتی طراں نے مشاعریاں، افسانیاں تہ موسیقی نیاں محفلاں تکر ای محدود میہہ سن بلکہ ہر پروگرام تھیں پہلیاں بیچاریاں ادبیاں، شاعراں، فن کاراں تہ ساز و آواز نے شوقیاں کی اسمت نیاں لمیاں تقریراں نے بے مگے عذاب تھیں گذرنا پینا سی تہ ایہی اوہ دور سی جدوں اکادمی فی مسلسل دوڑ تہائی تہ اُن تھک کوششاں نے محابے اوڑی توں کوئی راجہ شاہد شجاعت، پونچھ تھیں کوئی پرویز مانوس، خورشید کرمانی، کرتار چند تہ پردیپ کھنہ، سورنکوٹ تھیں شیخ ظہور الدین، مینڈھر تھیں سید امتیاز نسیم ہاشمی، راجوری تھیں اقبال نازش، اقبال شال، پرویز ملک تہ ہور کئی ہنرمند قلمکار تہ فنکار پہاڑی نے ادبی تہ ثقافتی منظر نامے اُپر اُبھرے تہ فر چھائی گے تہ آج اوہ آساں نے ادبی، لسانی تہ تمدنی سرمائے فی آن بان تہ شان ہین۔

اس تمہید طولانی نامقصد بس ایہہ ثابت کرن فی دانستہ پردیانندارانہ کوشش ہے جے اقبال نازش ہور تہ ہور آپ راجوری نے اندر موجود اہل علم و قلم فی کہکشاں فی موجودگی نے باوجود اس عاجز بندے نا انتخاب اپنی کتاب نا پیش لفظ آکھوس یافر ماہری اپنی ذہنی صحت نا لیٹن لکھن واسطے کیاں کیتا۔

اقبال نازش نا بچپن تہ انہاں فی جوانی نا پینڈا پہاڑی جے کہیاں ای مشکلاں تہ محرومیاں نے سائے بچ بیتیا ہووئے اک گل تہ بہر حال طے اے جے اوہ اس اعتبار نال بڑے ای خوش نصیب ہن جے انہاں کی موقعے تہ محل فی مناسبت نال اک پھر پور علمی تہ ادبی ماحول بچ پھلن پھولن تہ نکھرن و تھرن نا موقع ملیا تہ ابھیاں جیٹھیاں فی سر پرستی تہ رفاقت نصیب ہوئی جیہڑے تجربے نے بیش بہا سرمائے نے نال نال علمی تہ ادبی شعور فی دولت توں وی فیض یاب سن تہ ایہہ گل نازش نے حق بچ جانی اے جے اس انہاں بزرگاں فی سر پرستی بچ جتھاں کافی سفر طے کیتا تہ انہاں نیاں تجربیاں فی خوشبو کی اپنی پھولی بچ سمیٹنا فی پوری کوشش کیتی اُتھے ای اپنی طبعی اچھ تخلیقی جوہر تہ ڈوہنگے غور و فکر کی چراغ راہ بنان فی وی اک پُر خلوص کوشش کیتی تہ آج اوہ ماشا اللہ اک ایہے علمی ادبی سماجی شعور نے وارث ہن جیہڑا رد و قبول اپنی جانی فکری پختگی تہ ادراک نا باسادینا اے۔ نازش ہور پہاڑی جے تھوڑے جے چر نال ای پہاڑی ادبی سنگت نے پہیلی بٹھے پُر اپنے پہلے ای افسانے نے ذریعے اوہ قارئین فی توجہ حاصل کرن تہ ایہہ ثابت کرن بچ کامیاب رہے سن جے اوہ اہل ادب ای ہیہہ علمی شعور تہ قلمی شعار وی رکھن۔ ہر شخص نے اندراک ادیب اک شاعر ہور اک کہانی کار چھپیا نا ہونا اے۔ ادب بہر حال انسانی جذبات و احساسات تہ فکری ترجمانی نا ای تہ دُواناں اے۔ پراظہار فی قوت ہر کسے کول اک جی ہیہہ ہونی تہ فر لفظاں نے برتیوے نا سوہنا، ستھر اتہ سچاچ ہور مہارت

ہر ہکس کول نیمہ ہونا۔ ہر کسے نا اپنا اپنا پہاڑ تہ سعادت ہونی ہے۔ اقبال نازش اس اعتبار تھیں نیک بخت اے جے اوہ جذبات و احساسات تہ فکر و نظر نے نال نال خوبصورت اظہار بیان نی دولت تھیں وی کسے حد تک فیض مند ہے۔ انہاں اپنے ارد گرد نے ماحول نا ہر عکس اپنے دل نے شیشے پر منعکس کیتا اے۔ انہاں نا درد مند دل ہر ظلم ہر زیادتی تہ ہر طراں نے جو وجہ بری پہ اپنے اندر محسوس کرنا اے تہ اس کی قلم نی زبان بچ بیان کرنا ہے۔ انہاں نے خیالات تہ تاثر مقامی وی اے تہ غیر مقامی وی زبان ٹھیٹھ تہ الفاظ بر محل تہ بر موقع، منظر کشی نا منفرد انداز۔ کجھ نمونے ملاحظہ ہوں.....:

”نکا جیا کمرہ، بچی نی گھٹلی، ٹرٹی نی بندری، کھڑیاں نی
جوڑی، دوکھنڈیاں پتلیاں اک چٹا کورا اک ادھ منہواں چچہ انا
ہتھ تہ اک میں۔ بس ایہہ سب کجھ ماہری وارثت ہین۔ رات ہونی
ہے اماناں نے دا جے نا ادھ منہواں چچہ تہ دادے نی وارثت نا پرا نا
ہتھ آپس بچوں کجھ گلاں نے بول بولنے ہین۔“

(سزا)

”اچین چیت ہونی پڑ ماریا۔ جہلم نیاں سُراں گنگیاں ہوئی
گکیاں۔ اسطراں لگن لگا جے اس نے ہتھیں پیراں بچوں ساہ
مکی گیا۔ شہو نا تھ تہ کبیر ڈار اُسنی چھو لی بچوں آپ مہارے کئی کئی
ہوئی گئے۔ پھٹتاں تھیں جوے نے سارگی نے تار بکھ بکھ ٹہنی ٹہیر
ہوئی گئے۔ دوستیاں راستیاں پھاٹے نال اُڈرن لکیاں۔ آلے
دوالے نے پھلاں بچوں خوشبو مکی گئی۔“

(جہلم تھیں چناب توڑیں)

اقبال نازش نیاں افسانیاں نی اک خوبی ایہہ وی ہے جے ایہہ تنوع نال پھر پور
ہین، موضوعات نی ایہہ رنگارنگی پڑھن آ لے کی کدے وی تھکن یا اکن میہہ دینی۔ نال
ای ایہہ افسانے ایہہ باساوی دینین جے افسانہ نگار زندگی نیاں تہہ در تہہ پرتاں تہ
پچید گیاں ناڈوہنگا شعور رکھنا ہے۔ شاید ایہی وجہ ہے جے اک پاسے جتھے اوہ اقتصادی
نا برابر ی سماجی اونچ نیچ، سیاسی استحصال تہ ان پڑھ ہو ر جاہل خود ساختہ مولویاں نی عیاری
نا پردہ چاک کرنا ہے اُتھے ای اوہ شکاری نے نال نال شکار کی وی اس تباہی تہ بربادی نا
ذمہ دار ٹھہرانا ہے۔ سارے پہاویں نہ سہی نازش نے بعض افسانیاں مگی حیران تہ
ماہڑے وجدان کی واقعی سرشار کیتا اے تہ اس طراں نے افسانے محض اتفاقاً ہوا نیچ
میہہ لکھے جانے۔ اس واسطے ڈوہنگی سوچ، تازہ بہ تازہ تہ کھلی ڈھلی نظر، تخلیقی خمیر تہ چستگی
ہونی ضروری ہے۔ اوہ راہ ٹوئنا سدھا سادہ کہانی گوئیہہ بلکہ اوہ اپنی کہانی بترن ویلے
نت نویاں تجریاں نی پھلکاری کرنا ہے۔ اس نالوجہ اس نا آہنگ تہ اسلوب پہاڑی نی حد تک
کئی تہ بکھرا ہے۔ طوالت نے خوف نال میں مثالاں درج کرن توں گریز کرنا یاں تہ اس
دعویٰ نال اپنی گل سمیٹنا یاں جے آن آ لے وقفاں نیچ جدوں کدے تہ جتھے کدے وی پہاڑی
افسانے پڑ گل ہوئی اوہ نازش تہ اس نیاں افسانیاں نے ذکر تھیں باجھ مکمل میہہ لگی ہوں۔

ظفر اقبال منہاس

الفاروق کالونی، راول پورہ، بانی پاس

سرینگر۔ کشمیر

جمعہ ۲۱ دسمبر ۲۰۱۷ء



اپنی گل

اپنی گل کتھوں شروع کراں تہ کے کے لکھاں ایہہ ماہڑے بس فی گل نیمہ۔
 البتہ اتنا ضرور ہے جے ۱۱ جون ۱۹۵۳ء کی ماہڑا جنم ہو یا۔ تھنہ منڈی نے اک ایچے کھر
 ہو یا جنہاں بہوں ساریاں نذراں تہ نیازاں منی رکھیاں سن۔ ماہڑے والدین پھنیں پھر
 تہ دُڈے کنبہ برادری والے بہوں خوش ہوئے۔ سارے لاڈ بنڈن لگے۔ سارے
 لوریاں دین لگے۔ آپو نیمہ بلکہ ماہڑی چچا زاد پھنیں تاج بیگم مگی اپنے سپنے نال لائی لیا
 تہ اسطراں اتناں فی چھولی بچ کھٹ تہ پھنیاں پھر اواں فی چھولی بچ زیادہ ماہڑی پرورش
 ہوئی۔

ابتدائی تعلیم نیڑے نے پرائمری اسکول بچ ہوئی تھنہ ماہڑیاں اُستاداں کی میں
 بہوں پیارا لگنا ساں۔ بڑے لاڈ نال پڑھانے تہ سیکھانے رہے۔ پنجویں جماعت پاس
 کرن تھیں بعد ہائی اسکول تھنہ منڈی بچ داخلہ لیا۔ بڑیاں جماعتاں نے طالب علماں
 نال دوستی ہوئی۔ سارے اسکول نے اُستاد مگی لاڈ کرن لگے۔ ماہڑیاں شرارتاں اُنہاں
 واسطے تفریح بن لکیاں تہ اسطراں اسکول بچ جدوں وی کوئی کلچرل پروگرام ہووے تہ
 ماہڑی شمولیت ہون لگی۔

دسویں جماعت پاس کرنے تھیں بعد کُہروں دُور گورنمنٹ ڈگری کالج پونچھ داخلہ لیا۔ اک اہنگی سرزمین پر جتنے شعر و شاعری فی فصل ہر موسم بچ موجودی۔ ماہرا اک قریبی دوست محمد سعید وی شعر و شاعری نال جُویا ناسی۔ جدوں کُہر آواتا اتھے شاہباز صاحب، قدا صاحب، خورشید بیکل صاحب تہ فاروق مضطر ہوراں فی مجلس بچ شعر و شاعری ناشوق باہرا کھان لگا۔ دراصل کُہر فی دُوری کالج فی گہما گہمی جتنے پہلی واری کُڑیاں تہ منڈیاں کی رلی ملی اُٹھنے بیٹھنے نا ماحول تکیا۔ کُجھ اندرواندی سُراں مہٹن لکیاں مگر شعر و شاعری نا سلسلہ اُس دن ختم ہوئی گیا جدوں رشید امجد نے افسانیاں نا مجموعہ ”بیزار آدم کے بیٹے“ پڑھن نا موقعہ ملیا۔ فر کے سی شعری نقشے دماغ بچوں غیب ہوئی گئے تہ ماہرے اندر نہلی سِل مہٹتی گئی۔ آجاں انہاں غوطیاں بچ ساں جے تھنہ منڈی اک ریاستی سطح فی ادبی کانفرنس ہوئی جس بچ اختر محی الدین ہوراں اک افسانہ پڑھیا۔ مگی وی شوق جا گیا تہ میں پہلا افسانہ بعنوان ”نیرنگی تقدیر“ پڑھیا۔ ماہریاں یاراں دوستاں مگی بڑا حوصلہ دتا تہ اسطراں ماہرا ادبی سفر افسانیاں فی دُنیا بچ اُردو زبان تھیں شروع ہو یا۔ کالج فی پڑھائی تھیں بعد جموں یونیورسٹی شعبہ قانون بچ داخلہ لیا تہ اتھے ماہرے ادبی شوق پر خوب رنگ چڑھیا۔ خصوصی طور پر ریڈیو کشمیر جموں جتنے اُردو سیکشن نے انچارج میکش کاشمیری سن۔ انہاں ماہری ہوں حوصلہ افزائی کیتی۔ بس اسطراں جے ماہرے ہتھ پگڑی افسانے لکھنے نا ٹہنگ وی دہسیا تہ ترکیب دی۔ اسے دوران بزم فروغ ادب جموں بچ شمولیت نا موقعہ ملیا جتنے بڑے بڑے اُستاد موجود سن جسراں حکیم منظور، ڈاکٹر منظر اعظمی، پرتپال سنگھ بیتاب، ڈاکٹر ظہور الدین صاحب تہ ڈاکٹر کالرا صاحب۔ بزم بچ ہر ایوار کی مجلس لگتی سی تہ لکھتاں پر خوب بحث ہونی سی۔ میں افسانے ضرور لکھنا ساں مگر ایہہ سارے اُستاد ماہرے معیار تھیں بدھی ماہری

حوصلہ افزائی کرنے رہے۔ ایہہ اوہ دور سی جدوں جدیدیت زوراں پُرسی تہ میں وی زور آزمائی کرنا رہیاں۔ یونیورسٹی تھیں فارغ ہونے نال نال پہاڑی سیکشن کلچرل اکیڈمی تھیں گجھاں کرم فرماواں ماہر اتھہ پگڑی لیا۔ انہاں تاڑ کیتی جے اقبال نازش اُردو بچ لکھنا ہے تہ ضرور پہاڑی افسانیاں کی اپنیاں لکھتاں بچ شامل کری ہنسی۔ اسطراں اوہ تمام تجربے جیہڑے میں اُردو زبان بچ کرنا ساں پہاڑی زبان نی مٹھی مٹھی خوشبو بچ رل گڈ ہوئی گئے۔ میں جو گجھ وی پہاڑی زبان بچ لکھیا سوچیا تہ سمجھیا اس بچ ماہری سرپرستی ڈاکٹر ظہور الدین صاحب نی طرفوں ہے۔ انہاں مگی جو گجھ اُردو زبان نے حوالے نال دتا میں پہاڑی زبان بچ استعمال کیتا۔

میں پہاڑی زبان نیاں لکھتاں نے اس سفر بچ اک اہم ناں کدے وی پہنکی نیہہ سکنا۔ ماہری مراد ظفر اقبال منہاس ہے۔ انہاں ویلے ویلے ہی نیہہ بلکہ ہر ویلے ماہریاں لکھتاں کی سپنے نال لایا بڑی ہمدردی کیتی تہ کسے وی مقام پُر چکھے نیہہ رکھیا۔ میں اپنے اُستاد محترم شاہباز راجوری صاحب تہ نثار راہی صاحب نیاں شاہباشیاں کی کدے وی نیہہ پہنکی سکنا۔ انہاں کہانی کاری نے سفر بچ ماہری پوری پوری رہبری کیتی۔

مگر اک ابھجا دور وی آیا جدوں میں کہانیاں لکھنیاں بند کری چھوڑیاں۔ سال دو سال گزری گئے۔ ماہری پُچپ باہدا کھان لگی۔ اندرو اندری کہانیاں ڈانڈول اس اڈیک بچ رہیاں جے فرہتھ کھلے تہ اس دوران ماہرے اک نزدیکی رشتہ دار نہایت ہی عزیز عبدالواحد منہاس ماہری پُچپ بچ چو بالایا۔ میں اپنے عزیز نا آکھانیہ موڑی سکیا تہ فر کہہ سی ماہرے اندروں ڈکیانا کہانیاں نادریا ڈلی پیا۔

واحد ہوراں دُڈاوار کیتا..... دُکھنی رگ پُر انگل رکھی تہ بولیا ”کتاب چھاپو“۔ میں اک عرصے توڑیں اُسنیاں گلاں سُننا رہیا پرواحد ہوراں نے اصرار پُر مگی ہاں کرنی

پٹی۔ اُجاں ایہہ گل رستے بچ سی جے اک ہور عزیز تہ جگہری دوست پرویز مانوس ماہڑی
 حوصلہ افزائی کرن واسطے چھاتی تھی۔ دراصل مانوس ہور آپوں وی پہاڑی زبان وادب
 نی زمین بچ نویں نویں تجربے کرنے ہن۔ میں انہاں کی پہاڑی زبان نا کھوجی آکھنا
 ہاں۔ مانوس ہوراں نے دل بچ بس اک آس بسی نی ہے جے پہاڑی ادب وی باقیان
 ساریاں ادبی سرگرمیاں نال جوڑ کھائی رکھے جے آونے والی نسل کوئی گلہ شکوہ نہ
 کرے۔ اسطراں انہاں نی پھر پور مدد شامل حال رہی تہ ایہہ کتاب تہاں نے سامنے
 آئی ہے۔

میں خصوصی طور اپنی اہلیہ ممتاز بیگم ناوی شکر گزار ہاں جس بادل ناخواستہ ماہڑی
 ضد تہ اصرار پڑ ماہڑیاں لکھتاں سُنیاں تہ کدے کدے گجھاں حرفاں نی نشاندہی وی کیتی
 جہاں نال ماہڑیاں لکھتاں کی صحیح رنگ نصیب ہويا۔
 اخیر بچ اپنے تمام دوستاں نا شکر گزار ہاں جہاں ماہڑے اس سفر بچ ماہڑا ساتھ
 دتا تہ میں انہاں دوستاں ناوی شکر گزار رہساں جیہڑے اس کتاب بچ لکھیاں نیاں
 لکھتاں کی پڑھی تہ اپنی رائے نال مکی مفید مشورے دیں۔

اقبال نازش



ماں

مِگی اُسنی چڑیل جی شکل سخت ناپسند ہے۔ ماہڑے بوہے پُر اُس نا پیر رکھنا
 نحوست تھیں کہٹ نیمہ۔ میں نیمہ جاننا اوہ کون ہے تہ نہ ہی ایہہ ماہڑی ضرورت بچ ہے
 جے میں ایہہ پتہ لوں اوہ کون ہے۔ گتھے وُنی ہے تہ کے کرنی ہے۔ ماہڑے کھر نا بوہا
 اُس واسطے بالکل بند ہے۔ مِگی اُس نال سخت نفرت ہے۔ نفرت.....!

ایہہ چڑیل جی روز ماہڑے بوہے پُر کیاں ٹُری آونی ہے۔ مندی بہیڑی شکل
منحوس قسم نی گل بات۔ نیمہ..... نیمہ..... میں ہڈوں اِس کی اپنے
 کھر اندر نیمہ آون دین لگا۔ ایہہ پتہ نیمہ کیہڑے جنگل نی چڑیل ہے۔ چڑیل.....
 مگر ایہہ ماہڑے کھر کیاں آونا چاہنی ہے۔ اِس نا ماہڑی دروٹنی نال کے رشتہ ہے۔ ایہہ
ایہہ ماہڑے کھر کیاں؟ ایہہ تہ ماہڑا کھر ہے۔ اتھے ماہڑی سوئی موئی لاڑی
 ہے۔ ماہڑے سوہنے موہنے دوہتے ہین۔ ایہہ اُساں بچوں کس نال لاڈ کرنی ہے۔ کس
 نال نفرت کرنی ہے۔ میں تہ ماہڑے کھر والیاں اِس نا کے بگاڑیا ہے۔ ایہہ کون ہے؟
 ایہہ لوہ ہونیاں ماہڑے بوہے پُر ٹُری آونی ہے..... دوپہراں ٹُری آونی ہے.....
 شام ویلے ٹُری آونی ہے تہ کدے کدے راتی نے ہنیریاں بچ آنی ماہڑا بوہا ٹھکوری وُنی ہے۔

اُسُنیاں لسیاں تہ شکستہ بولاں بچ کیہڑی گل نادر دہے۔ کیہڑی گل نی تلاش
ہے۔ کیہڑی گل ناروگ ہے۔ اوہ..... آہاں..... بس ماہڑے بوہے پُر ٹری
آونی ہے۔ میں تہ ہر روز اس کی دُر چھوڑی آونا آں..... اس پُر گال مگال نی کالی
چکڑ پھینکا آں..... دندر کی رکی اُس کی ڈرانا آں، مگر اوہ..... اُس کی ٹس تھیں
مس نیہہ ہونی۔ اُس نے کالے کلوٹے متھے پُر کوئی تر یٹ نیہہ پنی۔ پر..... اُس نے
موٹے موٹے شاہ کالے اوٹھاں پُر گچھاں گلاں نے بول ڈرایاں مارنے ہین۔ اوہ کے
آکھنی ہے مگی اس گل نا کچھ وی پتہ نیہہ۔ روز ماہڑے بوہے پُر اپنیاں درداں نا اک
اشتہار چھوڑی ٹری جانی ہے۔ اک ایہجا اشتہار جس نے لفظاں نا..... تہ انہاں
لفظاں نے مطبلاں نا مگی کچھ وی پتہ نیہہ لگنا۔ ماہڑیاں اکھیاں بچ اوہ ساریاں گلاں
غوطے کھانیاں ہین۔ اوہ سارے بول گردش کرنے ہین، جیہڑے اُس نی مندی تہ
پہیڑی شکل نال جُوے نے ہین۔ مگی اسطراں لگنا ہے، ایہہ سارے بول اک ایہجی میلی
چادر بچ پہنلیٹی رکھے نے ہین، جتھے ماہڑیاں ساریاں سوچاں نا وجود ختم ہوئی جانا ہے۔
میں نہ تہ اُس کی تلنا چاہنا آں نہ اُس نی گل سُتتا چاہنا آں، مگر ماہڑی ٹبری.....
ماہڑے گدرے اس منحوس شکل والی عورت نال بڑالا ڈپیار کرنے ہین۔ اوہ اس نی ہر گل
سُننے ہین۔ اُسُنیاں گلاں نا مطلب کڈھنے ہین۔ اُس نال میل ملاپ رکھنے ہین۔ روز
اک نویں کہانی، ہک نویں انداز نال اس ماہڑے دسترخوان پُر آباد ہوئی ہے۔ روز اُس نے
اندر آننے نے پروگرام بنے ہین۔ روز اُس نے میلے کپڑیاں نیاں چھنجیاں لپراں نی گل
ہونی ہے۔ روز اُس نے اوٹھاں پُر جی نی پھوہلی نی گل ہونی ہے۔ روز اُس اک بند تہ
دوئی لکھ گھلی نا تذکرہ ہونا ہے۔ مگر میں..... ماہڑے اندر روز اک پہنجل ہونا
ہے۔ پہنجل..... اُس نے اندر آونے نا پہنجل..... اُس نی مندی تہ پہیڑی

شکل بچوں پھٹنا اک پہنچل..... اللہ خیر کرے!

اُج اوہ اندر ضرور اچھسی..... اسد نی طوطی آواز دسترخوان پُروں اُٹھی
چو فیری چکر کھان لگی سی۔ سارے ٹبر اُس نی اِس گل نال جس طراں قلاوا مارا سی.....
..... ساریاں نے اوٹھاں پُہاسیاں نی دُنیا آباد ہون لگی سی۔ ساریاں نیاں اکھیاں بچ
خوشیاں لارے کھان لکیاں سن..... پر..... ماہڑیاں اکھیاں بچ اک عجیب
بے سُر تہ بے مہاری حیرت غوطہ کھان لگی سی۔ ماہڑیاں اوٹھاں پُہ نہ..... نہ.....
..... نے حرف نہن لگے سن۔ ماہڑے ہتھاں نیاں انگلیاں بچ مروڑ پین لگے سن۔
تالوے بچوں اگی نے ہو لے شوٹکن لگے سن۔ اوہ..... اوہ..... اوہ اندر کسراں
اچھسی..... اُس کی ماہڑے ہونیاں اندر کیہڑا آن دیسی۔ ایہہ ماہڑا کہہ رہے ماہڑا
بنگلہ ہے ماہڑا باغ ہے..... ماہڑا.....!

ابو..... اوہ..... اوہ بڈھی..... جس نی شکل دی بگڑی نی ہے.....
..... جس نے وجود پُہانے کپڑیاں نیاں لہراں چھجیاں ہین..... جس نے
اوٹھاں پُہ گھاں گلاں نے بول گنگے ہوئی گئے نے ہین، ٹس..... ٹس..... اُس
نال..... اتنی ضد کیاں کرنے او..... اُس نال اتنا کیاں لڑنے او.....
اُسکی جہکے ماری اتھوں کیاں کڈھنے او..... ابو.....؟.....! کہہ نے جیو
جی اسراں نے سوال نے جواب بچ بیقرار ہوئی گئے سن۔ مگر اُج..... اُج انہاں
سوالاں نا جواب ماہڑے سنگھے بچ پھسی گیا سی۔ دراصل اُس نی مندی پہیڑی شکل بچ
گجھ ابھجاسیک ہے جے تکلنیاں تکلنیاں ماہڑا دماغ پھری جانا ہے۔ مگی اُس نی شکل
نال چو ہے۔ اک اکھ بند کری دوئی اکھ ٹمکور نی تھی ہے۔ اُس نی بند اکھی ناٹھواں اک
ساڑ دینا ہے۔ شاید اُس نی بند اکھی بچ زندگی نال وابستہ سوالاں کی بن باس لہانا ہے تہ

اُنہاں سوالاں ناما ہڑے کول کوئی جواب نیہہ..... بس اسے واسطے..... بس.....! کدیاں دناں تھیں بوہے نی ٹھک ٹھک بند ہوئی گئی سی۔ مگر دسترخوان پر اُسُنیاں اڈیکاں پر کچے کبوتر ہاروں پھڑ پھڑانیاں سن۔ اوہ پتہ نیہہ کیہڑے پاسے ٹری گئی سی۔ اُس نے دُور جان نال مگی تھوڑی بہت سہولت ضرور ہوئی سی، مگر اُسُنیاں یاداں نی فصل ماہڑے بیہڑے بچ پکئی جانی سی۔ اوہ مڑی ضرور اچھسی..... ضرور.....!

سیلاب نیاں شکایتاں ہر اک نے کمر اندر نچنیاں پھرنیاں سن۔ بارش لگاتار بہر نی سی۔ پانیاں ناقہر ہر بوہے نال ہتھ پنجا کرنا سی۔ ہر پاسے افراتفری نا عالم سی۔ کوٹھیاں نیاں کندھاں نالوں گارے نے لہٹے بچھوڑے نے گیت بولنے سن۔ آساں پھرے بودے منڈھیرے ٹھر ٹھر ٹہینے جانے سن۔ چھتاں نی مٹی ٹھس ٹھس پانیاں نے قہر نال سوئی تہ مہیوال نے گیت بولن لگے سی۔ پہاڑ اٹھنڈا..... کپڑا چھڑا..... لوئی کھندولہ..... اک دُورے نالوں اِسطراں مچھڑنے جانے سن جے ہُن کدے وی میل نیہہ ہون لگا۔ لوک اندروں باہر نکلی آئے سن۔ ہر اک نے وجود پُر سینکڑے اکھیاں جمی آئیاں سن۔ چوفیری نسوئی نامیلہ لگانا سی۔ کانگے بچ رُہڑنے تہ گجھ ترنے سن۔ چوفیری لاشاں نا کہنکارہ سی..... چوفیری آساں دُبنیاں جاناں سن۔ زمی تھیں لئی اسمان توڑیں کوکاں اُڈرنیاں جاناں سن۔ ہر پاسے بچنے بچانے نا چچول بازی مارنا سی۔

اُج سڑ کے اُپر گڈیاں نیہہ سن چلیاں..... اُج سڑ کے اُپر انسانی قافلہ نیہہ سی رُنا..... اُج سڑ کے اُپر کانگ سی..... کانگ بچ ترنیاں لاشاں سن..... اوہ ساریاں لاشاں جیہڑیاں اپنے اپنے کمر نی تلاش بچ سن..... اپنے عیال نی تلاش بچ سن۔

بارش نے لنگاں بچوں ساہ مکی گئی سی۔ کھڑی نیاں جام سوئیاں بچ فر حرکت
ہون لگی سی۔ سڑ کے پُر نچنا پانی فنا نے دائریاں بچ غرق ہون لگا سی..... البتہ
تریناں لاشاں اپنے اپنے بیہڑیاں بچ بچگی گئیاں سن۔

لوہ ہونیاں دینہ نیاں رسماں اک واری فر گھڑا کا ماریا سی۔ سارے لوک
دہشت نے بازار بچوں سودا بچی چپ چاپ بیٹھے نے دسنے سن۔ ہراک نیاں اکھیاں
بچوں سوالاں نی پنڈ گھلی گئی سی۔ ہراک اپنے بیہڑے بچ یاداں نی ادھ کچی فصل نی
بربادی پُر ہتھ ملن لگا سی۔ ہراک نے سپنے بچوں اگی نے ہولے اٹھنے سن۔ ہراک نے
بیہڑے بچ لاشاں کو کنیاں سن۔

بارش نے بند ہون نال سیلاب نا خطرہ کہنن لگا سی۔ جہلم نے شکم بچوں
پھٹنیاں تھوئیاں مدہم پئی گئیاں سن۔ سڑ کے پُر وں تریناں لاشاں اپنے اپنے مقام
پُر بچی گئیاں سن۔ میونسپلٹی نیاں گڈیاں چویری بھر نیاں سن۔ مانک اُپر برابر اعلان ہونا
سی جے جیہڑی لاش جس بیہڑے بچ ترنی ترنی بھی ہے اُس کی اُتھے دفن کرو.....
شہر نے قبرستان بچ کوئی جگہ نیہ۔

اُو..... اسا ہڑے بیہڑے بچ وی اک لاش ہے..... اوہ..... تلو
..... اوہ تلو..... اُو..... ایہہ لاش شاید اُس بڈھی نی ہے..... اوہ
بڈھی!

نیہہ..... نیہہ..... اِس کی میونسپلٹی نے حوالے کرو..... اسا ہڑا اِس
نال کوئی تعلق نیہہ۔ مگر اُو..... میونسپلٹی والے آکھنے ہن جے جیہڑی لاش جس
بیہڑے بچ ہے اُس کی اُتھے..... دفن کرو..... اُو..... بڈھی نے سراہنے
اک چوڑ ہے..... چوڑ..... ذرا تلو اِس بچ کے ہے۔ نیہہ..... نیہہ.....

.....ایہہ لاش..... اِس کی میں اپنے..... ایہہ کجخت..... مندی تہ پہیڑی
 شکلے والی بڈھی.....! لَو..... اُساں نے کُہر نال اِس بڈھی نابڑا ہڈا انا رشتہ
 ہے۔ بے شک تُساں کی شروع تھیں اِس نال ضد ہے عداوت ہے نفرت ہے مگر.....!
 لَو بڈھی نے سراہنے جیہڑی چوڑ ہے اس بچ پُرانے کپڑے تہ اک کھلتی ہے
 کھلتی بچ اک کاغذ ہے۔

اچھا..... ایہہ لہراں کچیراں اُدھر پھینک تہ ایہہ کاغذ مگی دہس ذرا تگاں
 اِس بچ کے لکھیا نا ہے۔

ماہڑے راج دُلا رے:

تُس ماہڑی اِس لکھت نال وی نفرت کرسو۔ تُساں نے اندر جتنی وی نفرت
 سی، میں بڑی خوشی نال قبول کیتی۔ مگی یقین ہے ہُن تُساں نی نفرت نابوہا بند ہوئی جاسی
 مگر..... میں..... میں بے بس ساں..... مجبور ساں..... ماہڑے اوٹھاں
 پُروں مٹھیاں گلاں غائب ہوئی گئیاں سن..... مگی پتہ ہے جے ماہڑی وجہ نال
 تُساں کی زندگی بچ بڑے صدمے بچے بن مگر میں..... ماہڑے دل بچ ایہہ گل اُج
 وی ترنی تہ دُبی ہے جے میں تُساں کی اوہ گل ضرور دہساں جس تُساں نے تہ ماہڑے
 بھکار نفرت نا پہاڑ کھلائی رکھیا نا سی۔

پیارے بچے.....! ماہڑی منحوس شکل نی بناوٹ اُس دن ہوئی سی جدوں
 بچپن بچ تُساں کھیڈنیاں کھیڈنیاں اپنی اک اکھنا سودا اپنیاں کھیڈیالاں نال کیتا
 سی۔ میں ایہہ تگی شہر گراں نی اک اک گلی بچ ترفنی چھڑکنی پھر نی ریہی۔ ہسپتال لئی گئی تہ
 ڈاکٹر نے مشورے نال میں اپنی اک اکھ کھڈائی تُساں نی محبت بچ تُساں کی پیش کیتی۔
 ایہہ ماہڑی متاسی کوئی احسان میہہ سی۔ بس اُس تھیں بعد ماہڑے چہرے نی ہیئت بدلی

گئی۔ ماہڑے متھے اُپر تریراں پئی گئیاں تہ اک دلدوز کہانی انہاں تریراں بچ آباد ہوئی
گئی۔ ماہڑی اکھی بچ ماہڑے واسطے نفرت نالاوا پھٹا۔ دراصل ایہہ وی ماہڑی دین سی تہ
فر تکلیاں تکلیاں اساں دواں نے درمیان نفرت نی زمی دؤر دؤر توڑیں کھنڈر نی
رہی۔ ماہڑی محبت ماہڑی متا بے بسی نی کالی کانگے بچ رُہڑی رہی۔ ماہڑے اوٹھاں
پُر گلاں ناشکار بدھنا رہیا۔ میں مڑی ٹساں نی دروٹی پُر آونی رہی پر.....!

ماہڑے چکر گوشے.....! میں سویر شام ٹساں نادیدار کرنی رہی۔ ٹساں نے
بال بچے نادیدار کرنی رہی۔ ٹساں نی دروٹی پُر پھنکھی پہانی بیٹھی رہی۔ میں زمی تھیں
لئی اسمان توڑیں گلاں کھڑار نی رہی پر..... اُس دن جدوں جہلم نے شکم بچوں
انسان دشمن سیلاب پھٹا پانیاں ناقہر چو فیری کھنڈری گیا جس ماہڑے ہاروں
ہزاراں لاشاں کی اپنی چھوٹی بچ جگہ دتی..... اساں نیاں لاشاں سڑکے اُپر ترن
لکیاں..... اساں کی اعلانا ایہہ آکھیا گیا جے ترنیاں ترنیاں اپنے اپنے بیہڑیاں بچ
چائیو..... شہر نے قبرستان بچ ٹساں واسطے کوئی جگہ نہیہ میں وی ترنی ترنی اتھے آنی
پہنچی آں..... اک ہو رہو کھالئی..... اک ہو ردردئی..... مگر میں بے بس
ساں ہو رہو جگہ وی تہ کوئی نہیہ سی..... ہُن ٹساں نی مرضی.....!

”ماں“..... اک لمبی سپنہ تروڑنی کوک..... اُس نے اوٹھاں پُروں
پھٹی ساری کائنات بچ کھنڈری گئی سی..... ماں..... مگی ٹساں نی تلاش سی

..... ماں..... ماہڑی ماں.....!



چار پیسے

عبدالصمد نا بڑھاپہ بڑھاپے بچ غریبی تہ غریبی نال بیماری فی خبر گراں نے نکلے
تھیں لئی بڑے توڑیں سی۔ اُس فی جوانی نے رنگ برنگے قصے، محول، ہاسے تہ ہاسیاں بچ
بے سُرے گڑا کے..... ہر کہہ بچ ذکر ہونا رہنا سی۔ دسترخوان پُر ذائقے دار کھانے
ہونے نے باوجود چچر توڑیں عبدالصمد فی کوئی گل، کوئی پُٹکلہ، کوئی محول، کوئی قصہ نہیہ
سی کہتا جانا، روٹی کھان نا کوئی سواد نہیہ سی آونا۔ یعنی اسطراں سمجھو جے عبدالصمد گراں بچ
دسترخوان نا اک حصہ بنی گیا سی۔

عبدالصمد فی بیوی ریشماں وی بڑی محولن سی۔ بے شک لنگاں بانہیاں تھیں
رہی گئی فی سی پر اک دواں کہہراں بچ آج وی پھیرا مار فی۔ جوڑ جکاڑ کرنی۔ راشن کپڑا
اک چوڑ شام توڑیں کہہ لئی آونی۔ عبدالطیف، عبدالحمید، عبدالرشید، عالم الدین، صوفیہ،
سیکینہ تہ ساجدہ..... چلھے نے چھیری ٹیم وٹیم بیہی جانے۔ سٹا سٹا جو وی لہنا کھائی
کوٹھے نے پچھوالی کھیڈ نے واسطے فُری جانے۔ گڑیاں بچ کھیڈ نے.....
مُنڈیاں بچ کھیڈ نے..... جدوں چلھے کول ہنگنے، چلھے فی سچی آسمان چاہڑنے۔
اک دُورے کولوں روٹیاں نے چپے کھسی کھسی کھانے، باہر نکلی جانے، ٹینٹے مارنے، نہ

گسے گل نی فلّر تہ نہ ذکر..... گتھوں آوسی، کھیڑا آئی، کھیڑا پکاسی.....!

گڑیاں کوٹھے نی بکھی نال چلھ پٹھے پُر چھوٹھ موٹھ کھپر پکانیاں..... پنج گپٹیاں

کھیڑنیاں..... چھوٹلی کھیڑنیاں..... پٹے بولنیاں..... گہت بولنیاں

..... فر دہنہہ دیگر رلی ملی گولے چٹنیاں..... کنڈو کاٹھ چٹنیاں.....

مڑی اپنے کھر آونیاں..... اندر بڑنیاں پیو نی کھنگ سنی تر بکی جانیاں۔ منڈے

ڈوگی پنج دلا نکلے مارنے..... اک دُوے نال چھٹی کرنے..... چھوٹلی کرنے

..... نکلے نکلے مکان بنانے نال شرڈکاں بنانے..... ڈوگی نے اگل بگل بوٹے

لانے..... باغ لانے..... بوٹیاں پُروں سیب لہوانے..... پٹپٹیاں

پہرنے..... بڑک لڈنے..... نوٹ بوڑنے تہ بس کاغذ کئی کئی نوٹاں نیاں

گڈیاں بنانے..... ٹھیر لانے تہ فر رشید کی گننے پُر لانے..... فر حصے کرنے

..... فر حصیاں پُر لڑنے..... رستی رستی جانے..... ٹپس نی ٹپس ہراک

دُوے کولوں دُور پتھراں نال پتھرن لائی بیٹھی جانے..... فر صلاح کرنے.....

..... فر نوٹاں نیاں گڈیاں بنانے..... شام نی بانگ نال اک اک کری مڑی اپنے

کھر آونے..... اندر بڑنیاں بندری پُر ٹھنگی بیٹھی جانے..... چلھے والے پاسے

تکنے..... منہہ مروڑنے..... کندھاں پُر کالے تھوئیں نے جالیاں نال چپ

چپیتیاں گلاں کرنے..... پہنیاں کی درڈنے..... پھنگھے پیٹ پنج بڑھیاں

نچنیاں تہ اکھیاں پنج شرارتاں نچنیاں..... آساں نے بوٹے نیاں چوٹیاں پُر

چھوٹے کھانے..... شہر نیاں لشکریاں کندھاں پُر حرفاں کی جوڑ باہنے.....

اندروں پیو نی کھنگ کی اپنیاں کتاں واخ پھٹن میہہ دینے..... بلیں بلیں گلاں

کرنے ”ساری عمر گراں گراں مہر نار ہیا..... کھر کھر مہر نار ہیا“ آج..... آج

اسا ہڑے متھے لگا..... کھنکناں ہے تہ خوب کھنکن دیوس..... آپوں کھنگی کھنگی.....!!

ریشماں نی اڈ پک بچ چلھے نی پھیری بیٹھی نے گڈیاں مُنڈیاں نی پلٹن
..... گجھ اگ بآلنے..... گجھ اگ سہالنے..... گجھ سچی اڈرانے.....
گڈیاں پتلے بچ خالی پانی گہڑکانیاں..... آس نے بوٹیاں نال منہمہ جوڑی جوڑی
گلاں کرنیاں..... غربی، بیکسی، مجبوری تہ لگا تار پیونی بیماری..... نال بے بس
اکھیاں نا جوڑ باہنے..... اکھیاں بچوں بگنے سجرے اتھرواں کی ڈکنے نے ہاڑے
کرنے..... ٹپس نی ٹپس چپ ہوئی جانے..... فر چنڈ پٹاکہ..... اک
دوے کی چوٹیاں..... فر ہاسے..... فر گڑاکے..... فر رولا..... فر
چپ.....!

عبدالصمد جس نا بچپن جس نی جوانی گراں نے ہر شخص نی دیوار نال جوے نے
سن۔ ماتم داری ہووے یا بیاہ شادی لیتری ہووے یا لیب زمی داری ہووے یا خریداری
..... عبدالصمد نی حاضری ہر صورت بچ ہونی سی۔ کوئی سادہ دیوے یا نہ اوہ برابر ٹیم
پُر حاضر ہوئی جانا۔ بیاہ شادی ہووے تہ لنگر نا سارا کم سامی لینا، ماتم داری ہووے تہ
پورے چاٹی دن اُس کھر نا سارا کاروبار کرنا آنے جانے والے لوکاں نی خبر گیری کرنا،
چاہ پانی کرنا۔ اسطراں لگنا جے اوہ کھر نا بڑا جیٹھا ہے۔ کھر نا مالک ہے تہ کھر نا سارا
کاروبار اُسے کرنا ہے۔ کسے گجھ ازراہ ہمدردی دیٹی چھوڑیا تہ لئی لینا، پرکدے وی کسے
نے اگے ہتھ نیہہ اڈنا۔ بڑا ہی ہمدرد بڑا ہی خودار، غمخوار تہ ملنسار۔

پرنیاں آکھیاں تہ جے کلیاں کال تہ بڑیاں سکال۔ عبدالصمد نے کھر وی
تقریباً پندرہ سال کال پیا رہیا۔ لیٹھی تہ کھادی..... نہ لیٹھی تہ ہٹی بندری پُرسی

گئے۔ اُس نے زندگی میں سب تھیں بڑی گل ایہہ سی ہے اُس جوانی بچ کوئی مال ٹال نہیہ سی اکھٹھا کیتا نا، لوٹ کھسوٹ نہیہ کیتی، زور زبردستی نہیہ کیتی، پہیڑی سنگت نہیہ کیتی.....
..... تہیاڑی کمایا راتی کھا داتہ ریشماں وی اُس تھیں کہٹ نہیہ سی۔ بڑی مختی، سدھی سادھی۔ راتی نے ہنیریاں بچ چلھے نی ڈٹی نال بیٹھی عبدالصمد نال پرانے قصے کوہتے کرنی۔ روز اُسکی آکھنی ہے ”بیاری سُستی ہراک نال ہے۔ جدوں بڈھے ہوساں کیہڑا کھلاسی پلاسی، کیہڑا ادوائی دارو کرسی، کیہڑا دکھ درد تگسی، کیہڑا ہتھ پگڑی بہاسی، کیہڑا آساں نامرن چین کرسی، بچے کسٹراں پڑھائی کرسن، کپڑاٹلہ گتھوں کرساں، زمی ڈوگی وی تھوڑی جی ہے، گڑیاں ناکے کرساں، کسٹراں کاج نبھاساں.....؟“

عبدالصمد نی کھر نی رونق بچ دوپٹے، دوچچے چار ڈبے، دس رکابیاں، چھ گلاس باراں پیالے تہ گچھ ہور ڈڈر کھر..... جہاں نی عمر ریشماں نے بیاہ نال جوی نی سی۔ البتہ اک گل سی ہے ہر سال اُس نے کھر بچ چار نوں کھپڑے، دونویاں بندریاں ہونیان سن۔ ریشماں اس کم بچ بڑی ماہری تہ ہُن ایہہ کم اُسنیاں گڑیاں وی کرنیاں سن۔ گراں نے لوک سال و سال ریشماں کولوں کھپڑے تہ بندریاں خریدنے سن۔ اُسٹراں اس کھر ناٹلہ چلناسی۔ جند گھندلہ عبدالصمد نی ماؤ دا جے بچ آنداسی تہ آجاں توڑیں اس کھر نی زینت بنیا نا ہے۔ البتہ چھ گزیاں لونیاں، چشم بلبیل کمبل ریشماں آپوں اُون کتے کتے بنوایاں ہن۔ کوٹھے نی بکھی نال دو کنال ڈوگی..... بس اک فصل..... مکت نے چار ٹانڈے..... چچر توڑیں کھلوتے رہنے، زمی آباد دینی تہ اُس تھیں بعد پورے سیال لوکاں نے ڈنگراں نا اس ڈوگی بچ میلہ لگنا۔

ادھر عبدالصمد زندگی نیاں انہاں بکھیڑیاں کولوں آزاد ہوئی گیا سی۔ اندر کوئی کھنگنے والا نہیہ سی۔ کوئی بولنے والا نہیہ سی۔ کوئی درڈنے والا نہیہ سی۔ ریشماں عبدالصمد

نی موت تھیں بعد چُپ چُپ تھی۔ اُسناں اکھیاں بچ کر حس تہ نہیہ سی مٹکی پر ہوس نی کوئی
نشانی باقی نہیہ سی۔ عبدالصمد نے یتیم بچے بچیاں نی خرید و فروخت نا سلسلہ شروع ہوئی
گیا سی۔ اُسناں ساریاں حسرتاں تہرتی پہوگ ہوئی گیاں سن۔ لوک ہن تاڑنے سن
جے عبدالصمد نے گدرے لیب لاسن لیتریاں باہسن کہوڑے منجیاں تہ ڈنگر چارسن۔
گڈیاں کھراں نام کم کرسن اندر لمسن پہناڈے تہوسن تہ..... مگر.....

عبدالرشید..... ساریاں تھیں بڑا نیت نویں منصوبے بنانا۔ اُس نے اندراک چلنے
پُرزے شخص نا احساس زندہ سی۔ نکلیاں ہونیاں اُسناں شرارتاں تہ اُس نے کماں تھیں
عبدالصمد کی تسلی سی جے بڑا ہوئی ضرور کجھ نہ کجھ کرسی۔ اپنے پہنیں پہراواں کی کسے کم
کاج واخ لاسی محنت مزدوری کرسی تہ فراک دن اُس اپنے پہنیں پہراواں کی جوڑی
آکھیا ”آؤ اُس وی باغ لاں۔ سارے رتی کم کرساں۔ بس چواں سالان فی گل ہے
جدوں باغ تیار ہو یا سارے معاملے ٹھیک ہوئی جاسن۔ اُس وی اک دُپری بنا ساس۔
اُس وی اک گڈی لیساں فر باری باری تِساں کی پہا لساں۔ پہنیاں نے سر پُروں
ہتھ پھیری آکھنا جے دا جے دکھنے نال اندروں ٹورساں.....!“

شام ہونیاں نکلیاں نکلیاں گلاں نال پہنیں پہراواں کی سمجھانا..... بس
ایہہ دو کنال فی ڈوگی ہے بوٹے لاساں خوب گڈائی گراساں خوب محنت کرساں تہ فر
..... فر جدوں سیب بچساں.....!

عبدالرشید گراں نے سودا گراں بچ اپنا نا لکھائی لیا سی۔ ہرا بھرا باغ اُس نی تہ
اُس نے پہنیں پہراواں فی قسمت نا دروازہ کھولی رکھیا تا سی۔ گڈیاں تہ موٹراں فی
آمدورفت..... نال ریشماں تہ عبدالصمد فی کھنگ پتو پار ہوئی گئی سی۔ عبدالرشید
جدوں وی چوبارے بچ مٹھی اپنے باغ واخ تکتا..... اُس کی باغے نے دُوے

کنڈے پر عبدالصمدنی قبرتہ قبرے پر جنڈ کھرٹڈ اوسنا..... ہائے افسوس.....!
 جے می اس گل ناپتہ ہونا..... میں اس ہڈھے کی ڈوگی بچ نہ دفنایا ہونا..... ہور
 چار بوٹے سپیاں نے لانا..... ہور چار پیسے آمدن ہونی.....!!



کالی پڑی

کہو نفرے تہ کہنتے سمبلواں نے جھنڈ۔ کچے کُر ملاں نے گچھے۔ جھنڈاں نے
 بھکار نکلے نکلے تلے۔ ذرا اگر پڑی کالی پڑی۔ ٹھس..... ٹھس..... پڑی بچوں بگنے
 پانیاں نے توپے۔ پڑی نے مُنڈھ پانی نیاں ناڈورا۔ اسطراں لگنا ہے جنے کوئی معشوم
 سہاگن سل پتھر ہوئی نی ہے تہ پانیاں نے توپے اسنیاں اکھیاں نے بگنے لہو نے
 اتھروں ہین۔ سُنیا ہے ایہہ سارے ناسارا ناڈ کہنیاں بٹیاں نال پُہر یا ناسی۔ رہس
 نے بٹیاں لچھے اُتیاں وی کدے کدے دے سنے ہین پرنہ ہونے نے برابر۔ کپوٹلگی روزگی
 وئی ہے۔ بس اگر کچھ باقی دسنا ہے تہ سمبلواں نے کہنتے جھنڈ۔ جھنڈاں نے بھکار نکلے
 نکلے تلے۔ پتہ میہہ انہاں نی باری کدوں اکھسی۔

خُرخُ کرنے خرگوشاں نے بچے..... چہیں چہیں چوایاں نے ڈار..... جھنڈاں نے
 مُنڈھ کاگنیاں نے آملنے..... ڈوراے نے چو فیری ماہڑے ڈنگر..... دُوراں رامنا چمٹی
 گائیں نا کالا چھٹا..... چُٹلے پُر پکئی پوہجڑی..... چھوٹگی نیاں کھیڈاں..... گدڑی
 گدڑے نابیاہ..... بیاہ نے گیت..... باری باری نا بولنا..... بالو ماہیا..... مقابلے نے
 پٹے..... گامی تہ یو بے نی روزنی چھمی..... ساون نا ناکہ ناکہ بدَل..... کہمن کہنیر تہند.....

کتکے نے سو کئے..... سیالے فی ٹھنڈ..... بھگن نے جنڈ پرتو..... چیترے نے نوروز.....
 مھلی فی سبزیاں نے دُروں دے ناپکے..... اُسو نیاں لیتریاں..... جدوں
 جدوں یاد آونیاں ہین، اکھیاں تاڑے لگی جانیاں ہین۔ دل دھک دھک کرن لگنا
 ہے۔ جنگاں بانہواں بچوں ساہ نکلی جانا ہے۔ اک مٹی ناٹھیر لو تھئی لو تھ۔

سوچنیاں سوچنیاں اکھیاں بچوں اتھرواں نے توپے ٹھئی ٹھئی پینے ہین۔ ٹھس،
 ٹھس..... مگی اسطراں لگنا ہے جے ایہہ اتھروں ماہری اکھیاں نے اتھروں ہین یا
 کالی پڑی بچوں بگنے پانیاں نے توپے۔ شاید میں وی انہاں ہاروں سل پتھر ہوئی
 جاساں۔ ماہرا سارا حلیہ کالی پڑی فی طراں بنی جاسی۔ لوک ماہرا ناں وی کالی پڑی
 رکھسن۔ ماہرے چو فیری سمبلواں نے جھنڈ ہوسن۔ خرگوشاں نے بچے خرخر کر سن۔
 کانیاں انہاں جھنڈاں بیٹھ آملنے بناسن..... تہ فر.....!

ایہہ انہاں دناں فی گل ہے جدوں فاطاں، گامی تہ یو باکھٹھے ڈنگراں کی ہئی
 کالی پڑی والے پاسے چڑھی گئے سن۔ اس تھیں پہلی رات سخت پھانڈ اتہ ڈنڈول رہیا
 سی۔ پر لوہ ہونیاں اسطراں لگنا سی جے آج چو فیری بہلا رہی، مگر تکلداں تکلداں چہڑھ
 کالا سیاہ چہڑھ چو فیری کھنڈی گیا سی۔ فرجیوی تہ کالی پڑی والے پاسے مڑی آیا سی۔
 پتہ نیہہ کس فی چاہڑ چڑھیا ناسی۔ آج اُس کسطراں نابدلہ ہتا سی..... فاطاں، گامی تہ
 یو بے کی اس گل نا پتہ نیہہ سی۔ کالی پڑی بچوں آج پانیاں نے توپے ٹھیری ٹھیری بگنے
 سن۔ پڑی نے اندروں آج کچھ سوس سوس فی آواز وی آونی سی۔ خرگوشاں نے بچیاں
 فی خرخر مکی گئی فی سی۔ ڈبورے نے چو فیری ڈنگر کن کھلائی کھلو تے رہے سن۔ سمبلواں
 نے جھنڈوی چپ چپ سن۔ فاطاں، گامی تہ یو باا دھروں اُدھرتہ اُدھروں اُدھر ڈنگراں کی
 لہنتے رہے، مگر آج پھانڈ اتہ ڈنڈول دستی وارنٹ لئی آیا ناسی۔

سارے پاسے ہنیراتہ چھٹی نابدل سی۔ بجلی نے ڈوہنگے کڑکاراں بچ یو باتہ
 فاطاں اک دُوے کولوں پچھڑی گئے سن۔ یو بادواں کولوں زنگا اک جھنڈ نے مُنڈ سُب
 دُھپ کری بئی گیا، مگر گامی تہ فاطاں اک دُوے کی لوڑ نے رہے۔

کنیاں سالاں تھیں فاطاں تہ گامی اس ناڑ بچ غیب ہین۔ سَمبلواں نے جھنڈ
 بلیں بلیں کہنئے جانے ہین، کالی پڑی ناپانی وی سَتی گیا نا ہے۔ رات ہونی ہے، اس ناڑ
 بچوں بیت بولنے نیاں آوازاں آونیاں ہین۔ اسطراں لگنا ہے جے گامی تہ فاطاں دُو ر
 دُو رکھوئی بیت بولنے ہین۔ مگر لوہ ہونیاں ایہہ سارا سلسلہ مُکی جانا ہے۔

یو با آجاں وی کدے کدے اپنے ڈنگراں نال کالی پڑی والے پاسے چڑھی
 جانا ہے۔ اُسُنیاں اکھیاں بچ آجاں وی فاطاں تہ گامی نی تلاش ہے، مگر انہاں کی سِل
 پتھر ہونیاں نے کئی سال ہوئی گئے ہین۔



چہلیاں سُراں

الغوزے بچوں مھٹنیاں بے شمار سُراں چو فیری کھنڈنیاں جانیاں سن۔ آسے پاسے نہ بندہ نہ بندے نی ذات۔ کچھ سملواں نے جھنڈتہ جھنڈاں اُپر اڈنیاں برنگ برنگ چڑیاں نیلا اکھڑا سمان کھنکھر پہاڑاں نی چھوٹی بچ بے یار و مددگار منہ موہندے ٹھٹھا ناسدھپ اکھیاں بیچی الغوزے نیاں سُراں بچ غرقاب۔ شاید مدتاں بعد میل ہو یا سی۔ دو چھڑیاں رو یاں نامیل دؤرتوڑیں بکنیاں ریل نیاں دو پٹریاں نامیل۔

”میں خیر ریہی ضرور فرموی آوساں۔ می اُمید ہے میں اپنے لو کی ٹھونڈساں۔ ماہڑا اللہ..... اُمتاں آکھنی سی آکھنی ریہی تہ اسے ڈپک بچ.....! اُمتاں توں جلدی ہار متی لئی۔ اُمتاں توں ماہڑے نال ڈاہڈا تھو کھا کیتا۔ ساتھ نیہہ دتا۔ اُمتاں تیرے اوٹھ..... پتلے پتنگ اوٹھ۔ اوٹھاں اُپر بے شمار گلاں نے بول تیریاں اکھیاں ڈوہنگے سمندر جیا در دلی ماہڑے دکھ تکنیاں رہیاں۔ بہتیرا کچھ آکھنیاں رہیاں۔ بہتیرے سوال نامرادی نے گھڈ بچ بے آسی نامیلا کفن پہلیٹی دفن ہونے رہے۔ اُمتاں تیرے دل بچوں پہنکھنا اُگی نادریا بکنا رہیا۔ دؤردو رتوڑیں بکنا رہیا۔ دیر دیر توڑیں بکنا رہیا۔ فرٹھنڈا ٹھار.....

سج ہوئی گیا۔ ماہر یے اُمتاں!“

ساہ پھوکنی انگلیاں مروڑنی، اُوٹھ چا پنی، اُکھیاں ٹمکورنی، اُس کُجھاں گلاں نے بول اپنی سرزمین وطن اُپر بے ترتیب کھلارے سن۔ اُج اُسکی کُہروں بے کُہر ہونا سی۔ وطنوں بے وطن ہونا سی۔ اُج اُسے کلجے اُپر پچھوڑے نے بے تحاشہ داغ لگے سن۔ اُمتاں نی بے وقت موت نادلدا از منظر اُوٹنی جُدا ئی نامہنگا سودا حسنی شکل تکتنے واسطے اُسُنیاں گول مٹول اُکھاں سچ اک ڈوہنگا سمندر چھلیاں مارنا سی۔ بیڑے سچ کُتے بُوٹے نیاں پتلیاں ادھ مانوں کُہونفریاں ٹاہلیاں جنہاں نے پتر پر پسی اوہ چچنی وُنی سی۔ تھتھیاں بولاں سچ گیتاں نیاں سُراں کی ڈبوئی وُنی سی۔ عاصمہ، شیخو، پنی، دانش، محسن، گڈیاں، کُتے، مٹی نے پہاڑیاں نال کھیڈنی وُنی سی۔ چلھے پُر پنی ادھ کچی پوجھو، چھپو، چھپو، لڑائی چھگڑا، چھٹ نی چھٹ رسی رسی رہنا۔ فرموی مودی کھیڈنا..... ہائے افسوس ماہریاں سا تھنا!“

دینہہ نیاں بے ترتیب بے چین رساں نال نال اُسنی دُنیا سچ ڈاکہ لگاسی۔ اوہ لٹے گئی سی۔ اُج سارا کُجھ اُس کولوں کھسے گیا سی مگر اُس نے نازک موہنڈھیاں اُپر یاداں نی پہاڑی ڈگی اجاں توڑیں چھوئی نی سی نہ ہتھے سچ اُوٹنی چھٹی ناہر زہر کپے کبوترے نی طراں تڑفنا سی۔ اوہ مودی مودی چھٹی پُر چھوڑے نے حرفاں کی ڈوہنگیاں اُکھیاں نال گرونی سی..... پھرونی سی، مگر شبنم!

میرا اس وقت نال زندگی ناسودا بیشک تیرے واسطے مہنگا سئی، مگر میں مجبور ہاں۔ تاہم ایہہ سمجھنا ہاں جے میری زندگی نا نکھار تیریاں یاداں سمیت زندہ ہے۔ میری امانت نا خیال رکھیاں۔ زندگی وفا کی جتنی ضرور ملساں۔

شب بخیر

الغوزے نیاں سُراں بچ برپک ترپڑاں پھٹن لکیاں سن۔ اوٹھاں اُپر لہونیاں
 مٹھکیاں تہ اکھیاں بچوں گئے اتھروں اک دُوے نال اکھ مٹاکہ کرنیاں بندوق نے
 دستے اُپر پُٹنے اُس نے ہوش و ہواس پُر اُپر تھلے وار کرنے رہے۔ اُسنیاں انگلیاں نے
 نازک پوٹیاں بچوں بدلے نی اگ نادریا ٹھنڈاٹھار ہوئی گئی اسی۔ چار چو فیری ہنیریاں
 بچ دُبتے آساں نے یو لے فرائ واری بڈھیاں پہاڑاں نی پسلیاں بچوں انگورن لگے
 سن..... پر.....!

”ساتھی“..... فرجد وں اُس زورنال چھوڑیا اوہ جاگی گیا۔“ ڈوہنگیاں یاداں
 تیرا سہ ملینا ہے۔ شاید کچھ مڑی جانے نادر دتیرے اندر جاگی گیا ہے۔ مگرتوں اس
 گل تھیں اتجاں بے خبر ہیں جے جس پل پڑوں لنگھی اُس اس پار آئے نے ہاں۔ اُسکی
 اُسے دن ساڑی چھوڑیا سی۔ ساتھی بندوقاں والے الغوزے نیہہ بجانے۔ می پتہ ہے
 تیرے الغوزے نیاں سُراں نال انہاں کھنکھر پہاڑاں نے چھوڑے سپیاں بچ وی
 اگ لگی نی ہے مگر..... ساتھی اٹھ دینہہ نیاں خود غرض رسماں اپنے اپنے دائرے اندر
 چھپن لکیاں ہن۔ سُنیا ہے اُج راتی اس پاسے تھیں گڈیاں نی اک لین لنگھسی۔ اُج
 ساتھی الغوزے نیہہ بجانا۔ اُج..... میں تیری بندوق نی نالی بچوں مٹھنا اگ نادریا
 تنکساں ساتھی جلدی کر.....۔“

تر..... تر..... تر..... ”ساتھی بس کر۔ اس ساتھی زیادہ نیہہ۔ ایہہ ریڈ کر اس نیاں
 گڈیاں ہن تہ اس بچ.....۔“

کہپ ہنیری رات نے کیلجے اُپر ڈوہنگے پچھ لگے سن۔ گڈیاں ٹپس نی ٹپس
 کھلوئی گئیاں سن۔ معصوم بچیاں نے اوٹھاں پڑوں ڈاراں نے ڈار نیڑے نے جنگلاں
 بچ اک کھونکارہ مچایا سی۔ یوٹیاں نے لچھے قلابے بچ انہاں تھو انیاں کی ڈکنے نی ہزار ہا

کوشش کرنے رہے مگر..... ایسہ بے قابو تھو انیاں چو فیری کھنڈنیاں رہیاں۔
گڈیاں لین ولین ٹرنیاں رہیاں۔ گڈیاں ناشدکا رتہ کچی سڑک پُروں اڈنی دڈڑ۔ رل
گڈ بے سُر یاں گیتاں بچوں بکنی اک چہلی سُر..... ”اُو ماہڑے اُو.....“
سڑک نے کنڈے میل پتھر ہوئی گئی سی۔

”ساتھی چل واپس چلے..... اُج نا وار خالی گیا..... فرسئی.....
اُج نا وار کدوں خالی گیا..... ساتھی اُج نا وار بڑا خطرناک واری..... ایسہ تک
لہونیاں پھٹکیاں تہ انہاں پھٹکیاں نے شکم پتوں انگور نیاں گلاں نے بول.....
اُو ماہڑے اُو..... مکی تو اہڑی تلاش سی۔ شکر ہے میل ہو یا۔“
امجد نے ہتھ بندوق پُروں کیہڑے ویلے غائب ہوئی اک واری فر الغوزے
نی چھاتی پُرجن لگے سن۔ الغوزے نیاں چہلیاں سُراں اک واری فر نرگس نے لہونیاں
پھٹکیاں تھیں لئی شبنم نی قبر توڑیں کھلرن لکیاں سن۔



ٹھہلا

اُتجاں اُسے ہتھتاں ور مہندی نیاں گجھ اُدھ کچیاں پھکیاں لکپراں موجود سن۔
اُتجاں وی گھپ ہنیریاں راتاں نے بجے کھنگر نیاں مٹھیاں مٹھیاں سُراں اُسے کٹاں
نال چڑیاں نیاں سن۔ اُتجاں وی اُسے اُدھ موئے وجود بچ حرص نیاں پننگاں لارے
کھانیاں سن۔ اُتجاں وی اُسنیاں گول سڈول اکھیاں بچ اک اک بلنی سی۔ اُتجاں وی
اُسنیاں اُٹھاں اُپرٹھاں مارنا گلاں ناک دریا بکنا سی۔ اُتجاں وی اُسے اندر آساں تہ
اڈپکاں ناڈو ہنگا کھو نکاری۔

جی..... آہو..... ایہہ تہ بس کل نی گل ہے۔ بس کل نی گل شاید تئساں

کی وی یاد ہوسی۔ ہوسی وی کیاں نہ۔

وقت اپنے کچیاں رنگاں نال گنکیاں تہ ڈوریاں اُن من تہ الہڑ بد شکل تہ بے
سُریاں سڑکاں پُر بازی لانا رہیا۔ سٹھے کھتے اُدھ بڈھیاں کندھاں تہ کندھاں نے اُن
کھڑے پتھراں پُر گجھاں گلاں نے پھکے بول حمیر نارہیا..... مگر میں چکھے مڑی سروں
نیہہ تکیا۔ تکاں وی تہ کے تکاں ماہڑے چکھے تھو کراں تہ ٹھہلیاں ناک سلسلہ بدھنا
رہیا۔ ماہڑے اگے نذیرے کمہارے نی دُپری نیاں کندھاں پُر لکھنے کہاؤ نے تپے جھنڈ
گھر نڈاؤ دیاں کھڑکیاں کھڑکیاں نی چکھے اُدھ کھلے پٹ..... کھڑ..... کھڑ.....

پھاٹدے نال ڈولنے..... پچیاں ارلاں نال لمکنے، لنگھنے پلنگنے لوکاں ورتئی تکی ہنسے، فر
چپ چپ..... گم سُم..... دُڈے بچ ڈبے..... کندھاں نے پھراں نال گوشے کرنے
..... دروازہ ہگاڑ پسار..... دروٹی بودی..... سروں بودی..... ٹھوکران کھائی کھائی چھی نی،
کتنیاں سالان تھیں رنڈیپ کٹنی۔ نہ بندہ نہ بندے نی ذات..... ٹکمر ہے جے ٹکمر
پہائی کدے کدے ڈنگراں کی باڑے باڑن آئی جانا ہے۔ ڈنگر..... تہ ڈنگراں نے ادھ
کدھے پیراں نی خر خر۔ ڈنگ پہونگے سڈگاں نال اک دُڈے کی تہنکا ٹھہلا
دینے۔ شکرے پہائی نی چھوچھو، جیے، لہنگے بچھے نی تڑوں، کالی جمی گاں نا صبر نال جوی
مڑی ٹھکی ٹھکی پیٹی جانا بس ماہڑی جندو نی حرارت بنی گئے ہین۔ نذیرے کمہارے نی
دُپری بچ آج وی رونق ہے۔ شکرے پہائی نے ڈنگر جدوں وی رامنے ہین۔ صیدونے
گیتاں نیاں رنگ برنگیاں سُراں ماہڑے دل بچ کھبیاں ہین۔ چوایاں کاگاں نے
آہلنے..... آہلنیاں بچ لگنے بیسا کھانڈے تارنیاں چوایاں پچیاں نی چہیں چہیں کھر بسنا
رہنا ہے۔

”اُف ماہڑے کھر نا کے ہوسی؟ میں تہ صیدو وی اسکی بسانے واسطے بڑے جتن
کیتے سن۔ چند نا اک اک ساہ لایا سی۔“

ہاں ایہہ تہ اُس دن نی گل ہے جدوں ماہڑے باغ نے سارے مھل مھلی
گئے سن۔ ساریاں رنگاں نے مھل..... جہاں کی آج توڑیں جس وی سوگھیا بے ہوش
ضرور ہو یا۔

صیدو سوہنا بابا نکا جوان ایہہ مھل سوگھی بیٹھا تہ بے ہوش ہو یا تہ مرنے دم توڑیں
فراسکی ہوش نہیہ آیا۔ مھل سوگھنے تھیں پہلیاں کجھ اشارے ہوئے، کجھ گلاں ہونیاں
تہ کجھ وعدے ہوئے سن مگر.....!

وعدے جیہڑے کدوں توڑ چڑھے۔ جہاں نی قسمت بچ اُدھ راہ دُ بنا ہے۔
وعدے ناکے ہويا، کتھے کتھے تڑے مہن جدّوں وی ایہہ دل ناویا ہستی جانار ہنا ہے فر
اک لوتھ نی لوتھ ہوئی جانی ہے۔ اگل بگل کڑیاں منڈے تکی خوش ہونے ہین۔ شاید
بے مری گئی ہے۔

”دیکھو میاں جی گاؤں اور شہر میں بڑا فرق ہے۔ آپ نے شہر کو بھی گاؤں سمجھ رکھا
ہے۔ اس نقش نگار کو وہیں چھوڑ کے آنا تھا۔ اور اب اگر ساتھ لائے ہی ہو تو پھر اسے
دروازے کیساتھ کمرے میں بند کر دو۔ دیکھو ادھر اڑوس پڑوس سے میری بہت سی
سہیلیاں آتی ہیں۔ اور یہ دن بھر کھانستی رہتی ہے۔“
مگریہ..... یہ تو..... میری.....“

بیشک ماہڑے واسطے آج ایہہ گل کوئی نویں نیہہ سی۔ ماہڑے چو فیری انہاں ٹھوکران
تہ ٹھہلیاں نا جاڑ جی آیانہ ہے۔ ایہہ گلاں ماہڑی مجبوری تہ عادت بنی گئیاں ہین۔ میں ہسنے
متھے ہتھ لیساری انہاں صدمیاں کی اپنی چھوٹی بچ رکھی لیاں پر کچر توڑیں ماہڑی تہ خیر سی
میں ٹھہلے کھانے کی ہٹی نی ہاں۔ صیدو نے ٹھہلیاں تھیں لئی نو نہہ پترے نے ٹھہلیاں توڑیں
چلھے نی تھلی تھیں لئی باہر نے دروازے توڑیں میں قسم قسم تہ رنگ رنگ نے ٹھہلیاں نال
سودا کیتا ہے۔ بس مہن اک ٹھہلے نی لوڑ ہے۔ سارا جھنجٹ مکی جاوے۔ بس اک ٹھہلا موت
نا ٹھہلا جیہڑا اس شہر اس گلی تہ اس کھر بچ نایاب ہے۔ جس نی تمنا ماہڑیاں گھنڈ لیاں تہ
گھٹلے کی چھوڑ پاس کھر نے بندیاں تھیں لئی پتھراں توڑیں ہے۔

ہائے افسوس میں تہ ٹھہلا کھائی دروازے تھیں قبر توڑیں جاساں اٹھی پر ارشدنا
کے ہوسی۔ کدے ٹھہلے ماہڑے ارشد کی نہ چڑی جاوے۔ ماہڑی قبر سڑنی رہی۔



ایہہ لاش کس نی ہے

ایہہ لاش کس نی ہے؟ اسنے چوفیری اتنے لوکاں نابدھنا ہجوم کیاں ہے۔ اسکی دفن کیاں نیہہ کرنے۔ اسنے وارث گتھے ہین۔ اس نا قبرستان گتھے ہے۔ اُسناں اُگریاں اکھیاں بچ کے سنیا ہے۔ اس نے گھلے اوٹھاں ہر کھجا ہاسہ ہے۔ اسنے متھے پُر کے لٹکنا ہے۔

ایہہ لاش کس نی ہے؟..... اک سوال جیہڑا چوفیری لوکاں نے دلاں بچ ڈوہنگیاں چھریاں مارنا سی۔ جس نی پکڑ بچ سارے لوک ہین جیہڑے بلیں بلیں اپنے اپنے دائرے تھیں باہر ہونے جانے ہین۔ شکار ہونے جانے ہین۔ جہاں کی اُسے متھے نی شکار پھنڈ نی جانی سی۔ جہاں کی اُسے متھے ناسیک گالنا جانا سی۔ جہاں کی اُسے اوٹھاں ناہاسہ ہراک نے دل کی لپراں لپراں کرنا جانا سی۔

ادھر لوکاں نا ہجوم باہدے پُرسی تہ ادھر دینہیاں ناسیک جیہڑا اُجاں توڑیں باہدے پُرسی بے بس ہوئی نامرادی نے ڈوہنگے گھڈ بچ ڈبنا جانا سی۔ دُور کہتے پہاڑاں پُروں اڈنے کالے بدلاں نے ڈارڈاریاں مارنے مارنے اُس مدان توڑیں آنی پچھتے سن جتھے لوکاں ناک بہت بڑا ہجوم اپنے آپ دواں حصیاں بچ تقسیم ہون لگا سی۔

مدان نے اک پاسے اُدھ مونیّاں لاشاں ناٹھیر تہ دُوّے پاسے خالی ہڈیاں نے
 برنگل جہاں نے وجود پُروں دینہیاں نے سیک نال مانس گلی گلی ٹھیر لگی گیا سی۔ کالے
 بدلاں نے تھمّے بچوں بھٹنے بجلیاں نے کڑکار چُچی چُچی تہ بہتیریاں اُدھ مونیّاں لاشاں
 کی جانے بچ مصروف سن۔ ہر پاسے ہنیر اسی۔ ہر پاسے کہرام سی۔ ہر پاسے تھو انیاں
 سن۔ اک رولاسی۔ رواس سی۔ اُتھے کے نیہہ سی۔ مگر اوہ لاش جیہڑی ماہڑے پھر نی
 ہے..... ماہڑے لٹو نی ہے..... ماہڑی ہے..... چُپ ہے..... خاموش ہے۔
 ”شاید اُسنیاں اڈپکاں ناویلا مکنے اُپر آیا ہے۔“



اَدھا خاب

ہنیری رات ہر پاسے چھنکھڑتہ پھانڈا کھڑو کیاں کدے بندتہ کدے آپوں
گھٹلی جانیاں سن۔ دروازے نی ارل ریزہ ریزہ ہوئی گئی نی سی۔ دوئی پٹ گھٹلی تہ ٹہنی
پے نے سن۔ زوردار بارش نال ہُن اندروی ٹپ ٹپ نی آواز ناخجر کمرے نے اندر آنے
ماحول کی زخمی کری گیا ناسی۔ اچانک می اُج اوہ گل فریاد آئی..... ”اُج اوہ ضرور جاسی تہ
اُج اوہ ضرور مرسی۔“

کڑا کے نی سردی نال سارے کاروباری اڈے سُن سُن ہوئی گئے نے سن۔
راجو کھڑے ویلے نی رُٹی کھائی بستر بچ لم لیٹ ہوئی گیا ناسی۔ اُسکی اُج کجھ وی سمجھ
نیہہ سی آونی۔ اُج اوہ کدھر جاسی۔ اُدھی راتی توڑیں اُسکی دور دراڑے اُس پہاڑی نی
تصویر اُجاں اکھیاں بچ سرکئی سی۔ اُس نادِل تہ دماغ سنی لکڑی نی طراں سڑنا سی۔ ”ہاں“
تہ ”نیمہ“ نے سُمندر بچ ڈبی ڈبی جانا سی پر اُج..... اُج..... راجواک نقطے پر
اڑی گیا سی۔ اُج راجواک پہاڑی بنی گیا سی۔ ارج سارا ڈرتہ چٹک اس نے اندروں نسی
گیا ناسی۔ اُج اُسُنیاں آساں تہ اُمیداں ناشپش محل تیار ہوئی گیا سی۔ اُج اوہ ضرور

پہاڑی نے اُس پار جاسی تہ دم لیس۔ راجو بلیں بلیں اپنے بستر پُروں اٹھی تہ ہُن ٹُن لگاسی۔ خوفناک تہ کنڈیاں نال پھرے رستے جہاں نیاں چھاتیاں پُر ہزاراں مہلاں نا سفر چڑیا ناسی۔ جسنی چھاتی پُر کتئیاں مسافراں نیاں آرزواں نا قتل ہو یا نا ہے۔ مگر آج..... آج راجو نے پکے ارادے اس سارے ماحول کی ہڑپ کری رکھیا ناسی۔ آج اُسکی احساس ہونا سی جے ایہہ سب کہانیاں ایہہ سب گلاں چھوٹھیاں ہین۔

راجو بستر اچھوڑی اندروں باہر دُور نکل آیا ناسی۔ بغیر کسے خوف تہ چٹک نے اوہ اگے اگے ٹرنا رہیا۔ آج منزل اُس نے نیڑے سی تہ آج اوہ زمانے نا اک فاتح سی۔ آج سارے رستیاں نے روڑے غرقاب ہوئی جاسن۔ آج کنڈیاں اپنی جگہ مہل سٹے نے سن۔ آج رستہ صاف سی۔ تہ آج راجو..... ”کیہڑا ہیں توں؟“

راجو اچانک رُکی گیا۔ اُسنیاں اکھیاں اگڑی گیاں۔ اُسنیاں اکھیاں پتھر بنی گیاں۔ اُسکی اسطراں محسوس ہو یا جے کوئی اُسے پچھے پچھے ٹرنا ہے تہ ہُن اُسکی اوہ..... اک زوردار کلہاڑا اُسے سرے اُپر کسے ماریا اوہ کھلوئی گیا تہ ادھر ادھر تکن لگا۔ اپنے اُبے نی گل اُسکی یاد آون لگی۔ سارا وجود کمَن لگاسی۔ پر پتہ نیہہ کیہڑی گل اُسے اندروں جاگی تہ اُسکی احساس ہو یا جے ایہہ کوئی انسان ہے۔ ایہہ مگی کے کرسی؟

”توں کیہڑا ہیں؟ ذرہ ٹھہر سئی۔“

اک واری فر راجو کی چھٹکا لگا۔ راجو فر کھلوئی گیا۔ برابر تکنا رہیا۔ آونے والے نا سایہ تہ آواز راجو کی زندگی تہ موت نے بٹکار کھلائی گیا۔ سایہ بالکل نیڑے پہنچی گیا۔ تکنیاں تکنیاں ایہہ سایہ اک انسان فی شکل بچ بدل گیا سی۔ اسطراں لگنا سی جے اُسنیاں موہنڈیاں اُپر پروانے وقتاں نے ظلم تہ نا انصافیاں فی اک گھٹھڑی ہے۔ اُسنیاں اکھیاں بچ خوف نے اتھرواں نا اک سُمندر ہے تہ اُسے ہتھتاں بچ بڑے بڑے خنجر ہین۔

اوہ جوں جوں نیڑے آؤنا گیا راجو خوف تہ ڈر نے سمندر بچ ڈبنا رہیا۔ اک معمولی آس نا دیا اُسے اندر جگنا رہیا۔ اُج میں ضرور کامیاب ہوساں۔ ایہہ سایہ..... ایہہ نسانی شکل نا درندہ ایہہ ماہرے اگے کجھ وی نہیں ہے۔ راجونا حوصلہ بدھنا گیا۔ ہُن اُس فردوئی واری ٹرنا شروع کیتا پر اس واری اوہ سایہ کجھ نیہہ بولیا تہ بس چکھے چکھے ٹرنا رہیا۔ راجواک نیلے تلے بچ بچتی تہ فر کھلتی گیا۔ اُسکی شاید اپنی منزل نا احساس ہون لگا سی۔ اُجاں راجواہیہ سوچنا ہی سی جے چکھوں فر آواز نا خنجر اُسے سپنے بچ آن لگا۔

”توں کبھدا ہیں؟ توں کدھر جانا ہے۔ توئی پتہ نیہہ اِس وادی بچ..... اِس پہاڑاں نی وادی بچ جیہڑا وی آیا اوہ نامُراد واپس نیہہ جائی سکيا۔ اوہ دکھ کتنے برنگل اُتھے پئے نے ہِن۔ توئی اپنے پیو نی کہانی نا پتہ نیہہ۔ توں اُتھے کیاں آیا ہیں۔ ایہہ ساری وادی میں لوکاں نے لہوناں رنگی نی ہے۔ اُتھے صرف خون پکنا ہے۔

تکت چنگی طراں تکت..... اوہ پہاڑی..... جیہڑی خیالاں تہ خاباں نی اک کہانی نا حصہ ہِن۔ اُج چنگی طراں تکت..... شاید فر تگتی سکیں۔

راجو ساریاں گلاب سُننا رہیا پر اُسکی ٹس تھیں مس نیہہ ہوئی۔ اوہ اندر واندری خوش سی۔ اوہ اپنی منزل اُپر بچگی گیا نا سی۔

”راجو واپس مُڑی جا..... توں اُتھے آئی ماہرے نال ظلم کیتا ہے۔ میں آدم خور ہاں۔ ماہرے اُٹھاں نال انسانی خون ہے۔ توئی پتہ نیہہ..... ماہرے اندر انسانی فطرت نا کتنا بڑا طوفان ہے۔ راجو واپس مُڑی جا.....!“

ہُن اُسنی آواز پتلی ہوئی گئی سی۔ اُسنا قد وی کھٹی گیا سی۔ اُسنے چہرے اُپروں خوف نیاں ساریاں لکپراں بے وطن ہوئی گیاں سن۔ شاید اُسے اندر پُرانا درد جاگی گیا سی۔ آخر اوہ وی تہ اک انسان سی۔ راجو مُڑی جا.....!

سراہنے اُپر بیٹھی اُمتاں نیاں اکھیاں بچوں اُتھروں جاری سن۔ اچانک اک
اُتھروں راجو نے منہواں پُر آنی ٹھٹھا سی۔ راجو جاگی گیا۔ راجو نا سارا بستر اُتھرواں
نال سچی گیا سی۔

”اُمتاں توں رکیاں رونی ہیں، میں کل اُس پار فر جا ساں۔“



مگراک شرط ہے!

کہہاں نابننا تہ اُجڑنا کوئی نویں گل نیہہ۔ اس دُنیا بچ بڑے بڑے امیراں نے
محل وی ویران ہوئے تہ غریباں نیاں چھگیاں وی اُجڑیاں۔ بسنے شہروی اُجڑے تہ
اُجڑے گراں وی بسے، مگر فرق صرف اتنا ہے جدہ وں نویں محل تیار ہوئے نویں شہر بسے،
پُر انیاں یاداں ڈوہنگیاں کھڈاں بچ دفن ہویاں۔ کوئی رولا دپانی ہویا، پرجدہ وں چھگیاں
بسیاں کہہ کہہ گلاں ہویاں۔ مگر نگر رولا ہویا۔ رستے رستے کچھریاں لگیاں۔ بیہڑے
بیہڑے قصے ہوئے۔ دراصل ایہہ اس زمانے نی رہت ہے۔

کتنیاں دقاں تھیں ماہڑے کیجے بچ اک آس گھننی ہے..... اک سیک مھٹنا
ہے..... اک آرزو ہونی ہے۔ ماہڑیاں اکھیاں بچ پُرانا دادکی کہہ سرکنا ہے، جسکی
اُجڑیاں نے تھوڑے سال ہوئے ہین۔ ”ہائے افسوس جے اک واری فرمڑی اُس کہہ
جاں..... اُنہاں کندھاں کی قلاے ماراں..... کندھاں نے پتھراں نال گلاں کراں
..... کوئلے نال لائیاں اُنہاں لپٹاں کی تگیاں، جہاں نال ماہڑا بچپن جُویا ناہے۔ لپٹاں
جیہڑیاں ماہڑی اتناں ماہڑی عمر نے بابدے نال لانی سی، فر گنتی سی تہ اک گڑا کا ماری
آکھنی سی..... ”ماہڑا بچہ اتنیاں سالاں نا ہوئی گیا ہے۔“ ماہڑا دادکی کہہ جتھے میں جمیا

ہاں۔ نیہہ..... نیہہ..... میں اُتھے مڑی کسٹراں جاساں۔ کسٹراں پھت کھولساں تہ
کسٹراں!.....!

دِن سال گذرنے گئے۔ ماہڑے اندر و اندر اُس اُس ناؤٹا بدھنا گیا تہ آخر اوہ
دِن وی آئی گیا جد وں ماہڑے پیر آپ مہارے ماہڑے وجود تھیں باغی ہوئی اُس پاسے
ٹرن لگے۔ میں اپنے آپ تھیں بکھ ہوئی اپنے بیوی بچیاں کی چھوڑی اپنے پکے مکان
تھیں نکلی اپنے سپنے اُپروں موٹی موٹی کالی چادر نا پھڑکا لہوائی اُس پاسے ٹرن لگساں
’جتھے نیاں کمزرو ماہوس تہ نازک یاداں نا کچا تہنا گا مگی اپنے پاسے جھکن لگاسی۔

”جی صدقے..... انہاں قدماں اُپروں سوواری صدقے..... می اُمیدی
توں ضرور آوسیں..... اک دِن ضرور آوسیں..... آ..... ماہڑے سپنے نال لگ..... کھول
ماہڑے سرے نی بوڈی چادر نی چوک..... میں تیرے آونے نی اُس اس بچ کھوٹی
بھٹی رکھی نی ہے..... مگر اک شرط ہے.....!“

دروٹی نال ماہڑے پیر جوی گئے سن۔ ماہڑے کٹاں بچ تہتی سچ نے سرا کے دُور
ماہڑے کلیجے توڑیں بھٹی گئے سن۔ میں سُن سُن کھلوتا نا شاید اپنی غلطی نا اعتراف کرنے
والا ساں جے اک واری فراق آ لے نا بر چھا ماہڑے سپنے اُپر آنی لگا پر اس واری درد
بڑا مٹھتا مزے داری۔

”پُتر..... تیریاں اڈپکاں بچ دُبا تیری اُمتاں نے کھر تگی خوش آمدید آکھنا
ہے۔..... آ..... اندر آ..... ماہڑیاں چھاتیاں بچوں بگنے دُدھ نے اک اک توپے نال
مُنہہ لا..... چُساں مار تہ اپنے اندرے نی اُگ ہسال۔ پُتر تیری اک امانت وی
ماہڑے کول ہے اُس کی ہٹی جا۔ اپنے نویں تہ پکے مکان بچ رکھیاں..... سمبھالی رکھیاں
..... دو تر پوتر کی کم آوسی۔“

دروازہ کھلنے نال نال میں اندر چھٹ کری چھال ماری سی۔ اڈھی کھوڑہ لگنے نال
 ٹھٹھی پیاساں۔ چین چک ماہڑیاں اکھیاں چھتے نال لگی جانیاں ہین جتھے بوڈے
 کاٹھے نال صرف اُلی لگی نی ہے۔ اسطراں لگنا سی جے بے نے بیاہ نے ویلے نی چٹی
 مٹی نے مھل دوہری واری جی آئے ہین۔ اک خُدا کری میں فر اٹھی کھلوتا ساں۔
 ماہڑے ہتھ چو فیری اندرے بچ تو ساں مارن لگے سن۔ اندرے نا پھنکا پھنکا چھانی
 ماریا سی۔ میں جس پاسے ہتھ مارنا ساں تہ ماہڑے ہتھ کندھاں نال وجرے نے
 جالیاں بچ پھنسی جانے سن۔ ایہہ اوہ جالے ہین جیہڑے اپنیاں یاداں نا حساب منگنے
 ہین۔ شاید انہاں کی اس گل نا پتہ میہ جے ماہڑے وجودے نا اک بال حرص تہ
 ہوس نے قرضے بچ دُٹانا ہے۔ جے ماہڑی غیرت نا بکنا دریا کدوں اُپروں زمی نے پٹھ
 پھری گیا نا ہے تہ ماہڑیاں سوچاں نے بٹیاں ناقد کتنا نیواں ہوئی گیا نا ہے۔

تو ساں مارنے تہ جالیاں بچ پھنسنے پھنسانے ماہڑے ہتھ اخیر کندھالے نے
 اُس تاشقے توڑیں پہچی جانے ہین جتھے کپڑیاں نی اک پوڑ رکھی نی ہے۔ شاید خزانے نی
 پوڑ ہے۔ میں چھٹ ماری کپڑیاں نی پوڑ باہر کڈھی آنا آں۔

”ایہہ..... ایہہ تہ اُتیاں نے سرے نی چادر ہے جیہڑی اک پاسے چھنگی
 میں اُتیاں نی چھاتی نال چھڑی جانا ساں۔ آہو..... اوہی چادر..... جیہڑی ماہڑے بابے
 اُتیاں نے مرنے تھیں بعد اپنے سراہانے رکھی سی..... چالی سال توڑیں..... اوئی چادر
 جیہڑی بابے جی نی نیندر تہ آرام نی اک علامت سی۔ می یاد ہے..... چنگی طراں یاد
 ہے..... میں ایہہ چادر بابے جی نے سراہانے تھیں کڈھی چھپائی چھوڑنا ساں۔ فر
 بابے جی کی..... آہو..... اوہ خوب ڈنڈ رولا کرنا سی۔ میں چھٹی جانا ساں..... فر.....
 فردسی (دس پیسے) ہتھ ساں تہ کندھالے نے اس تاشقے چھو کڈھی دینا ساں۔“

ایہہ لے پھلئے لوکے..... توں آج توڑیں ٹوں ٹوں لائی نی سی..... پکے مکاناں
 بچ آئے ساں تہ گجھ وی حصہ میہ سی لیٹھا..... سامی رکھیاں..... بڑی مشکل نال لیٹھا ہے
 اس بچ پورا خزانہ ہے۔ اس خزانے نی مالک توں تہ تو اہڑے دوتر پوتر ہین؛ مگراک
 شرط ہے.....!



شیشہ

پُرانے زمانے بچ لوک سویرے سویرے عبادتِ الہی بچ لگی جانے سن۔ اللہ تعالیٰ کولوں کامیابی نہ خوشحالی نیاں دُعاواں کرنے سن۔ زندگی نے قیمتی سفر کی سادگی نال گذارنے نی کوشش کرنے سن۔ دینہہ نیاں رسماں نال نال اپنی اپنی ڈوہنگی بنگل بچوں اپنے آپ کی بکھ کری تہ ح رص نے کھوڑے نی لگام پگڑی نکلی جانے سن..... مگر آج.....؟

پتہ نیمہ ایہہ کیہڑا ہے؟ میں کھڑی کھڑی اٹھی باہر تلنا ہاں۔ پتہ کھولی دُور دُور توڑیں تلنا ہاں پر کوئی وی ماہریاں اکھیاں بچ نیمہ آونا۔ میں کمبل پھیلٹی اپنے آپ کی چھپائی لینا ہاں۔ مگر نالوں کوئی ماہرے بڈھے تہ پُرانے پتہ کی ٹھکورنا ہے۔ میں ڈری جانا ہاں۔ پتہ نیمہ ایہہ کیہڑا آدمی ہے..... ایہہ ماہرے اندر کیاں آیا ہے..... ایہہ می اتنا کیاں ڈرانا ہے..... می کس گناہ نی سزا ہے..... ایہہ ماہرے معصوم تہ سدھی سادھی ذاتی نے کلجے بچ پھر کیاں مارنا ہے.....؟

ایہہ سوچنیاں سوچنیاں میں اپنے آپ بچ ڈبی جاں آں۔ پتہ اتجاں وی کھلا ہے۔ کالی تہ ہنیری رات مچ کالی ہوئی گئی ہے۔ سوں..... سوں..... ہر پاسے..... سوں..... سوں..... می اسطراں لگتا ہے کوئی ماہرے نیڑے آئی گیا ہے تہ ہُن.....

میں بس اک پتھر نی طراں ہوئی جانا ہاں۔ چو فیری برفونا تہواں کھنڈی جانا ہے۔
 اُدھر کوٹھے نی اگوالی دینہہ چڑھی آیا ہے۔ گراں نے سارے لوک اُدھر اُدھر
 مُرن لگے ہن۔ کجھ لوکاں نے گیتاں نیاں بولیاں وی ماہڑے پہتے نال ٹکر کھائی مُڑی
 جانیاں ہن۔ مگر میں اُجاں وی کھلے پہتے نے باوجود کمبل پھلکیٹی زندگی نی کشمکش بچ
 مشغول آں۔ ماہڑا سارا جسم سڑی سڑی کوئلہ ہوئی گیا ہے۔
 کوٹھے نے اندر نیاں ساریاں چیزاں پریشان حال ماہڑا منہہ تلکیاں ہن۔
 ماہڑیاں کتاباں ماہڑا میز تہ ماہڑی گُرسی میزا اُپر چٹا کاغذ تہ بچ چر پٹھاں اک وین تہ اک
 لفافہ۔

اللہ ایہہ کیہڑا جل مسان شام ویلے ماہڑے اندر اُٹھی آیا سی۔ ایہہ نہ ماہڑی جان
 چھوڑنا ہے تہ نہ اندروں باہر نکلنا ہے۔ ماہڑیاں اکھیاں بچوں لہوے نے اُتھروں.....
 ٹپ..... ٹپ..... ہُن نکلن لگے ہن۔ اوٹھاں اُپر پھلکی جٹی گئی ہے۔ ہتھ پیر نپلے ہوئی
 گئے ہن۔ میں جدھر وی تکلنا آں اُسی مُسرندی شکل ماہڑے سامنے آئی جانی ہے۔
 کتیاں دتاں تھیں میں اِس چھمیلے بچ پھسیاں نا آں۔ اکھیاں بند ہن تہ ہُن
 کھولنے نی طاقت وی نیہہ۔ میں سوچنا ہاں اک واری اکھیاں کھولاں تہ چنگی طراں
 اُس کی تنکاں جس می..... مگر.....؟

اُف! اُجاں توڑیں میں سِکے سُمندر بچ دُبیانا آں۔ کتنے مدوجزر ماہڑے نال
 کھیڈی مُڑی گئے ہن۔ پتہ نیہہ میں کیہڑا گناہ کیتا ہے؟
 میں ذرا اک دروٹنی پُر کھسکی آیا ہاں۔ کجھ گلاں اُجاں توڑیں ماہڑیاں کتاں بچ
 سُرنکیاں ہن۔ میں اکھیاں کھولنا آں تہ ساری دُنیا مُڑی تہ ماہڑے قلاوے بچ آئی جانی
 ہے۔ اک اک چیز شیشہ بنی جانی ہے۔ میں جلدی جلدی پہتے نی پلکنی بچوں تکلنا

آں۔ اک بڑا شپشہ نظر آونا ہے۔ بڑا سارا شپشہ ماہڑا شپشہ تہ ماہڑے دادے نا شپشہ!

شپشہ تکلنیاں ماہڑیاں اکھیاں بچوں فر اتھرواں نی لین لگنی ہے۔ می فر ڈر لگنا ہے۔

کتنیاں تہیاڑیاں تھیں گراں نی اس کنڈہ اک شخص منہہ موندھاپیا نا ہے۔ لوک اُسکی تکی تکی تہ ڈری جانے ہین۔ اوہ گجھ آکھنا وی ہے پر کوئی وی اُس نی گل نہیہ سُنناں۔

”لوکو! اپنے خریدے نے شپشے تکلنے چھوڑی دیو۔ تَس روز سویرے اپنے اپنے شپشے بچ منہہ تکلنے او۔“

لوکو! یاد رکھو اوہ تہیاڑا وی ضرور آوسی جد وں تَساں کی دادے نے شپشے سامنے کھلا کیتا جاسی۔

لوکو! شپشہ تکیا کرو شپشہ جیہڑا تہاڑے دادے نے تَساں واسطے اندراں بچ بنگی رکھیا نا ہے۔ تَس اپنا اپنا شپشہ تکلنا چھوڑی دیو!



اک توپہ لہونا

اُس نیاں گول مٹول اکھیاں بچوں ٹھنڈا ٹھارا اک لہونا توپہ ٹھاہ کری ٹہنی گیا تہ سدا
 گلو نے اوٹھاں نال چمڑی گیا سی۔ گلو چھٹ پہٹ بگنے اس لہو نے توپے کی چٹی لیا
 سی۔ اُس نے اندراک پہنجل ہويا۔ اُس نیاں کمزور رگاں بچ زوردار چھٹکے لگے اوہ کئی
 گیا۔ چھٹ فی چھٹ اکھیاں بچ ہنیرا بھری گیا۔ فر اکھیاں اسچیاں کھلیاں جے
 اتجاں توڑیں بند نیہ ہونیاں۔ اُس نے اوٹھ اتماں فی چھاتی نال چمڑے رہے۔ اوہ بچے
 کھتے ڈاودین لگا۔ اُسکی اسطراں لگا جے کالی کانگ اُس نے بیڑے بچ بگنی ہے تہ اوہ اس
 کانگ بچ دُبتا ترنا دُور بہوں دُور اک ایچے کاڑہ بچ جائی لگتا ہے جتھے نہ بندہ نہ بندے فی
 ذات۔ بس اک لہونا توپہ امی نیاں اکھیاں بچوں مسافر ہوئی اُس نے اوٹھاں نال چمڑی گیا ہے۔

اوہ خالی پیپے فی طراں بولی اٹھیا۔ اُس کی اسطراں لگا جے اک واری فر..... فر
 گلاں..... گہمن کھیر گلاں فی کالی کانگ..... چو فیری یاداں نا ہے ٹھاٹھا پھانڈا..... گجھ
 نکلیاں ہونیاں نے ہنکے ٹھہیلے..... گجھ ٹھنڈے چلھے بچوں اُڈرنی سچی..... ماسی بیگاں

نے تیتے تیتے تہ کھوہرے آلے اُمتاں نے ٹھنڈے ٹھنڈے بول..... ہاڑی نے بوٹے پُر
آلے بچوں چوں چوں کا گنی نے بچیاں ناچول..... میہ..... میہ..... ایہہ سب کجھ
چوٹھ ہے چوٹھ ہے۔

تہ اگر سچ ہے تہ بس امی نی اکھیاں بچوں بگنے لہونے توپے۔ انہاں توپیاں بچ
بسنی اک یاد..... اک ادھ مانوں جتن تہ اس ادھ مانوں جتن نی ساڑھ تہ اس ساڑھ بچ
تہ کھنیاں آساں۔

آہو مگی یاد ہے۔ بالکل یاد ہے اک اک کہڑی تہ اک اک گل یاد ہے۔ اوہ
کہڑی وی یاد ہے جدوں ماہڑے اُن کہڑے موٹے منڈھارا وٹھاں اُمتاں نی چھاتی
بچوں بگنیاں مٹھے مٹھے دودھ کی بس اک چوس ماری سی۔ دودھ تہ سکی گیا سی پر اکھیاں
بچوں لہونی فوار پھٹتی سی تہ لہونا اک توپہ کھسکی ماہڑے اوٹھاں نال چھڑی گیا سی۔ اُمتاں
چُپ ہوئی گئی سی۔ چھاتی نا دودھ سکی گیا سی۔ اکھیاں بے شک کھلیاں سن در انہاں
بچوں لوہ مکی گئی سی۔ اوٹھاں پُر گلاں کی کورا لگی گیا سی۔ گوشے بس گوشے..... چو فیری
گوشے..... اندر نے جند کھند لے بچ وی گوشے..... کوٹھے نی بٹی نے پتھراں بچ وی
گوشے ہون لگے سن۔ چلھے نی ٹھنڈی تہی اُڈرن لگی سی۔ کندالے بچوں تہواں نسن لگا
سی۔ اگر چُپ سی تہ بس دروٹی..... پلو رانی مری گئی۔ گیدراڑی کھلی پلی جاسی۔ ماہڑے
نہ سینی اُس نے پہناڈے تہوسی۔ نمبردارے نال مال چاری۔ آپوں بڑا ہوئی کدرے
ٹری جاسی اساہڑی خلاسی ہوسی۔ بیگاں ماسی نے تیتے تیتے کھورے بول لوکاں نیاں
کٹاں بچ ریگنے رہے۔

گلو ایہہ سب کجھ تکتا رہیا۔ اپس نے اُن کہڑے موٹے منڈھارا وٹھاں پُر گلاں
نی کالی کا نگ بگنی ریہی۔ اُس بڑا لیل بلاس کیتا..... بڑا ترفیا چھڑکیاں بہتیریاں

کھڑیاں رگڑیاں..... روز ورنال پتھر مروڑے..... دوّاں دوّاں ہتھّاں چھاتی گئی،
پرائی نی چھاتی بچوں اک توپہ وی دودھ نانیہہ مٹھا۔ امی نی چھاتی ناندوہ سگئی گیاسی تہ
ہُن اگر کجھ باقی سی تہ بس اوہ اک توپہ جیہڑا اس نی اکھیاں بچوں پھٹی اُسے اوٹھاں نال
چڑی گیاسی۔

اوہ اک لہونا توپہ..... اُس توپے بچ دُبنیاں تہ ترنیاں لسیاں تہ پھکیاں آساں تہ
انہاں آساں بچ کھڑی کھڑی نا پہنجل۔

گلو ہُن جوان ہوئی گیاسی۔ رشتہ داریاں، تعلق داریاں..... یعنی کہ ہر قسم نیاں
داریاں گلو کی اپنے پاسے چھکن لکیاں سن۔ آہنڈ گواہنڈ کے پورے گراں بچ گلو ہر دیگی
نا چچہ بنی گیاسی۔ کتے تھیں لئی بڑے توڑیں گلو کی جانے سن۔ جس طراں کوئی دہسنا اُسے
طراں کرنا۔ ہر بیڑے بچ کھلوتا نا..... ہراک ناکم کرنا۔ نہ کرنے نی اُس کی پھوم ہی میہہ
سی۔ کوئی رُٹی دیتی چھوڑے کھائی لینا..... نہ دے تہ کدے وی میہہ منگنا۔ لوک
اندرواندری گلو کی گنگا، ڈورا تہ چہلا آ کھنسن۔

گلو لوکاں نیاں گلاں سُنتا رہیا۔ اُس کسے نی گل نا جواب میہہ سی دینا۔ اُس کی
پتہ سی اُس نے اُن کھڑے موٹے منڈھار اوٹھاں پُروں انہاں ساریاں گلاں نے
جواباں کی اُس نی امی بن باس دتا نا ہے تہ اُس نی جگہ لہونے اک توپے کی پہرہ داری دتی
نی ہے۔ اوہ اک لہونا توپہ جیہڑا ساری ساری راتیں گلو نال گلاں کرنا..... گلو کی اسطراں
لگنا جے شام ہونیاں اک کالی گلاں نی کانگ کھن کھن بدلاں نال اُسے اوٹھاں پُروں
بکن لگ پنی۔ اُسے کتاں بچ ٹھکورے ماری..... ”گلو! اس گراں تہ اس شہر بچ لال لہو
نیاں لہراں نا کوئی مُل میہہ۔ اِتھاں اک اک ساہ نی خریداری ہونی ہے..... اِتھاں
کوکاں گنگیاں ہوئی جانیاں ہن..... اِتھاں آساں نے بوٹے کدے وی میہہ پھلنے

..... اِتھاں رُٹی نے اک اک چٹے واسطے سجریاں جوانیاں نی بولی ہونی ہے۔ گلو.....
 تیرے اُن کہڑے موٹے منڈھار اوٹھاں پُر لہو نے تو پے نال لکھیا نا اشتہار کیہڑا
 پڑھسی۔ بس چُپ جا..... چُپ ہوئی جا.....“ ہُن اِس بستی اِس گراں بچ نکلیاں جکتاں
 کی کوئی وی جکتا لی اپنی چھاتی بچوں دودھ نیہہ پلان لگی۔ نہ کسے نیاں اکھیاں بچوں لال
 لہونا تو پہ کسی..... ہُن بازاروں ر بڑی نیپل خریدی جکتا لی ڈبے نا دودھ پلاس۔



رتا نوٹ

اوہ اُج بڑا خوش سی۔ اُج رتے نوٹ نال شکارہ اپنیاں سب ہیرا پھیریاں نال
اُس نے اندر غوطے کھانا سی۔ شام نے ہنیریاں نال نال اُسنی آس ناؤ تا جی آیا سی۔
اک پاسے ٹھنڈے چلھے نی اُگ تہ دُوے پاسے رتے نوٹ نال شکارہ۔ آپ ماہرے
ہنسنا..... کھد کنا، موٹے موٹے اُن کھڑے اوٹھاں اُپر چٹی سفید چیمہ پھیرنا۔ مٹھیاں
بٹنا، دغہ رکنا، چٹیاں مارنا، گیت بولنا، ڈبیاں بچ چاہنکیاں مارنا، پھولیاں تو سنا، ٹرٹی نی
بندری پڑھنی ٹھہری جانا، پیس پیس جرننا، فر پسیلے مارنا مارنا اُپر اٹھی جانا۔

”بشیریا توں بازیمہ آونا..... نہ لیٹنا نہ لیٹن دینا۔ تہیاڑی پھرنا رہنا۔ روز آکھنا
رتا نوٹ آنساں۔ بہانے کرنا..... بہانے خور.....!“

گھمن گھمن گھلاں ناٹھاٹھاں مارنا سمندر بشیرے کی اپنے کلاوے بچ لئی کوکوں
مارن لینا تہ اسنیاں بے درد لہراں بچ ڈبنا جانا۔ ایہہ تہ اوہی لہراں ہین جہاں اُس نی
زندگی نے اک اک ساہ نال سودا کیتا نا ہے۔

میہ.....میہ.....میہ.....بابا میں تہ سٹنا ناہاں، میں میہ جاگنا، میں رولا میہ کرنا،
میں تہ چپ ہاں۔ ماہری لڑھکھاں پرتہ بڑا سارا جندرا لگانا ہے۔ میں بالکل میہ بولیا۔ با
با! میں سٹنا ناہاں۔ ماہری تقدیر سستی نی ہے۔ ماہری تدبیر سستی نی ہے۔ ماہری فکر سستی نی
ہے۔ ماہری ہوش سستی نے ہین۔ مگر ماہری روح.....بابا.....ماہریاں
اکھیاں نیندر بچ ڈبیاں ہین۔ بس دل پڑوں ساڑا اٹھنی ہے۔ رتے نوٹ نی ساڑ.....
.....رتے نوٹ.....ادھا کلو آٹا.....چار رٹیاں۔

بابا شاید لیٹی گیا ہے۔ کھنی پہنار ہوئی اک واری اُس فرا پڑھی تنکیا۔ بلیں بلیں
پسلیٹے کھانا اوہ فر چلھے نی بروہی کول جائی پچھا۔ سچی گرو لن لگا.....مدے کوئی آلو ہووے
تہ اوہ.....سچی گرو لنیاں گرو لنیاں اُنے سنگھے بچوں ٹانک نکلی سی۔ پوٹیاں بچوں
تھوواں بھٹن لگاسی۔ ٹھنڈی سچی نا تھوواں.....جسکی تکی آندراں بچ صدیاں ناکلیوں ہین
لگاسی۔

لوہ ناڈ پکوان بشیرا کھپ ہنیریاں نال مقابلہ کرنیاں کرنیاں بیشک تھکی گیا سی
مگر رتے نوٹ نامٹھا مٹھا سیک اتجاں توڑیں اُس نے اندر زندہ سی۔ آج اُس سر بچ نی
لا دی بچ جانا سی۔ رتی رٹی کھانی سی تہ رتے نوٹ لینا سی۔

”چل دفع ہو بشیر یا.....ماہری لا دی بچ بھنگھیاں تنکیاں واسطے کوئی گنجائش
میہ۔ رزق نی سختی آٹے نا ازلی دشمن۔ گتھاں ہے تیرا پیو۔ نمک حرام.....احسان
فرا موش۔ میری روڑی نا پلو کڑ۔ مڑ چکھے۔ تیری کوئی ضرورت میہ۔ ماہری نیاز مکروہ نا
کریاں۔ سویرے سویرے آنی پچھیا ہے۔ تیرے جیاں پھیکھڑاں کولوں کھڑا پچھ لوانا
ہے۔ چل مڑ چکھے.....چل مڑ چکھے.....مگی تیرا پیو سی ہے کل اُس ماہری
ڈنگراں کی آلوں والی سگاڑی بچوں پتھر ماری ماری لہنیا سی۔ شکر ہے اُس کول کوئی بڑی

زمین نیہہ۔ ماہڑے ڈنگراں کولوں توں تہ تیرا پیو چنگے تہ نیہہ۔ کسر میل ساں جدّوں داء لگا۔“

بشیرا ٹھٹھن ٹھار کھلوئی تکلنا رہیا۔ اُسے منہہ اگے سر پنچ نے کوٹھے نی لادی۔ نیاز تہ رتا نوٹ۔ اُس نے اک اک ساہ نال بازیاں لانا رہیا۔ نیہہ اُسنی کنڈی چکھے ٹھنڈے چکھے ناسیک بدھنا رہیا۔ اوہ چکھے مری اپنے کھر واخ تکلن لگا۔ اُسے پیر کئی سو من پہارے سن۔

دینہہ دُور ٹہلی آیا سی۔ بشیرا لم سلماں بروہی کول آجاں توڑیں سٹنا ناسی۔ اُس نا اک ہتھ بروہی نی سچی پنچ دُبی ناسی تہ دُوا ہتھ چھاتی نے سیک نال گلنا سی تہ اکھیاں پنچ آجاں توڑیں رتے نوٹ نال شکارہ سی۔



اڈھا کہنٹھ

اک عرصے تھیں جیہڑا ماہڑے لوہڑے گوئی سڑک نا وجود کر ہیٹنا رہیا۔ جدوں
ماہڑے موہنڈھے پڑ چھیا تہ زور زورنال اس جگ نے سپنے بچ تھوایاں نے چوہتے
دین لگا۔ فر ماہڑے سرے نے بالاں کی چھٹکن لگا پر جدوں اُسکی ایہہ گل راس نہ آئی،
اُس اپنے گوچے بچوں بڑا سارا ہتھوڑا کڈھی ہندا تہ زور زورنال ماہڑے سرے اُپر
مارن لگا۔ اوہ ایہہ چاہنا سی جے اپنی پوری طاقت لائی ماہڑے سرے پڑ ہتھوڑا اسطراں
مارے جے ماہڑا سر چکنا پڑ رہوئی جائے تہ فراوہ سارا گجھ لٹئی لوے۔

مگر اُس کی اس گل ناپتہ نیہہ سی جے ماہڑا سر اُس دن بنیا سی جدوں دیہنہیاں نا
اک قافلہ زئی پڑ تھئی آیا سی۔ چار چو فیری اگ لگی نی سی۔ سارا گجھ سڑی گیا سی۔
فراک دو توپے پانی نے تہ دو چار چھوٹے ٹھنڈی ہوانے آئے سن اگ ہسی گئی
سی۔ اک سنگلاخ مورتی نمودار ہوئی سی جیہڑی کدے برف نے تھوویں بچ مستی نال
بل مارنی رہی تہ کدے ڈوہنگیاں سمندراں بچ غوطے کھانی سی۔ کدے چھکھڑ تہ

پھانڈے نال ڈاریاں مارنی سی تہ کدے سُپ دُھپ کھلوئی اپنی بے بسی نے بیت بولنی
سی۔ اُسکی اُج وی فتو پہنائی نی مسکین بلی پُروں لمکنا نمر اڈھینگر دِسناسی۔ مگر.....!
موہنڈھے پُر بیٹھا بیٹھا بڑے مروڑے کھانا رہیا۔ کدے سچے تہ کدے کھجے۔
اُسے بڈھے ہتھے نیاں لمیاں کمیاں انگلیاں اُجاں توڑیں ماہڑے بالاں پنج پھسیاں
نیاں ہین۔ اسطراں لگنا ہے جے انہاں انگلیاں پنج کئی سالوں نی پھنگھ ہے تہ ہُن ایہہ!
کدوں نا موہنڈھے پُروں ٹہٹکی ماہڑے سامنے کھلوتا نا ہے۔ اُسنا لم سلماں
وجود کدے کہننا تہ کدے بدھنا ہے۔ اُسنیاں اڑھاں پُروں بہتیریاں گلاں نادریا بکنا
رہیا۔ اکھیاں پنج اُگی نے پہنا نبھڑیلنے رہے..... پر.....!
گُہپ ہنیری رات پنج اُجاں توڑیں ماہڑے اندر نا پہنجل اُجاں توڑیں زندہ
ہے.....!
اُدھا کہنٹہ..... بس اُدھا کہنٹہ..... تہ اڈھے کہنٹے نے بعد.....!



اعتراف

دُور توڑیں کھنڈیاں نیاں قبریں تکی اُج ادھ ڈریا سی۔ کیا سی۔ اُسے لم سٹے وجود
 نیاں بڑھیاں ہڈیاں بچوں اک زوردار کڑکار پھٹا سی۔ نیہہ..... نیہہ..... اک
 دُور پھٹا سی۔ دُور جیہڑا اُسُنیاں رگاں بچوں نسی ہڈیاں نے بشکار کئیاں سالوں تھیں
 چھٹی بیٹھنا سی۔ جسکی رگاں بچ چٹے لہو نیاں پھٹکیاں اپنے آپ نال رلانے نے
 خاصے ہاڑے کیتے سن مگر ادھ.....!

بڈھا تڑاہ کری مجیدے نی قبری نے سراہا نے ٹھٹھا سی۔ اُسُنیاں اُٹھاں اُپروں
 ڈکیانا گلاں نادریا لگی پیا سی۔ ”مجیدیا..... توں مگی ضرور پہچانی لیا ہو سی؟ میں اپنیاں
 غلطیاں نا اعتراف کرنے واسطے اتھے آیا ہاں۔ ماہری زندگی اک عذاب بنی گئی ہے۔
 میں جدّوں وی کوئی خاب تکیا..... تہ ماہرا خاب..... مجیدیا شاید تکی اُس دن نا
 وی پتہ ہے جدّوں میں خاب تکنیاں تکنیاں بیمار ہو یا ساں تہ ڈاکٹراں می سدّھا ہسپتال
 نیتا سی۔ جتھے ماہریاں رگاں بچوں لال لہو نیاں لہراں نچوڑی دُور اک پاسے دریانے
 کنڈھے پھینکی چھوڑیا سی تہ نامر ادخا ہاں نا چٹا لہو ماہریاں رگاں بچ پھر یا سی۔ اے نیہہ!

ڈاکٹر اچھے لہونیاں لہراں نال نال کالے لہونیاں باس والیاں کھسکں وی پہریاں سن۔ اُنہاں کی اندازہ سی جے میں ہمیشہ ہمیشہ واسطے زندہ ہوئی جاساں تہ ماہری بیماری نا علاج ہوئی جاسی، مگر کم راس نہ آیا۔ بیماری فر بدھن لگی۔ ڈاکٹر اچھے ہسپتال نیتا۔ اس پھیرے ماہرے سارے ہنگواکھی میز اُپر پُٹھیر کیتے۔ بڑی تلاش کیتی جے بیماری نامنڈھ لیجے، پر سب کجھ بے سود۔ ڈاکٹر اچھے فر مشورہ کیتا تہ ماہرے کپتے نے ہنگواء کجھ کجھ کری آپریشن تھیٹر نیاں کندھاں اُپر لنگی چھوڑے۔ بہت بند کری باہروں بڑا سارا جندرا لائی مڑی گئے۔ شاید اس خیال بچ جے ہڈیاں سٹکی جاسن تہ دُکھنا در دسری تھی ہوئی جاسی، مگر اُنہاں کی اس گل نا پتہ نیمہ سی جے ماہی بیماری نا علاج بند آپریشن تھیٹر بچ نا ممکن ہے۔ کتیاں سالاں بعد ڈاکٹر فر آئے فر مشورہ کیتا..... اُج نی واری اُنہاں کی یقین ہوئی گیا ناسی جے بیماری سڑی تھی ہوئی گئی ہوئی۔ آپریشن تھیٹر نا دروازہ فر کھلیا..... ڈاکٹر اچھے اک اک کری ماہرے سارے ہنگواء کندھاں اُپروں لہوائی جوڑے شروع کیتے۔ ماہریاں رگاں بچ فر چٹے لہونیاں لہراں پہریاں۔ ڈاکٹر اچھے اپنی کامیابی پُر گڑا کا ماریا۔ میں فر جا گیاں..... مگر..... مگی اسطراں لگا جے اُج نی واری گراں نے ساریاں لوکاں اپنیاں اپنیاں رگاں بچوں لال لہونیاں لہراں چٹے لہونیاں لہراں پہریاں ہین تہ اُنہاں بچ کالے لہونیاں باس والیاں کھسکیاں کجھ زیادہ ہی ہین۔ ماہریاں ہڈیاں بچ اک لستا جا کڑکار ہويا۔ پر کسے وی شخص اپنیاں کتاں نال نیمہ سُنیا۔ ساری بستی لنگی تہ ڈوری ہوئی گئی نی سی۔ ماہریاں اُٹھاں پُر آپریشن تھیٹر والے دروازے نا جندرا سی۔ میں وی چپ رہیاں۔ ڈاکٹر پر ہیز دہ سنا سی۔

مجید یا..... اوہ تک نپلے اسمان پُروں لال لہونی بارش نے کہنے کہنے تو پے کھنکر پہاڑاں نی اکھیاں نال اکھ مٹا کا کرنے ہین۔ شاید تیرے لال لہونیاں لہراں

چو فیری کھنڈی گئیاں ہین۔ لوکاں چٹے لہو نیاں لہراں پہر انیاں چھوڑی دیتیاں ہین۔
ہُن اک اک کری گراں نے لوکاں نیاں رگاں بچوں دژ دھٹسن۔ بیماری عام ہوئی، فر
جائی تہ بیماری نا علاج ہوئی۔

تکلیاں تکلیاں بڈھے نالم سلماں وجود غائب ہوئی گئیاں سی۔ مجیدے گڑا کا مار یا
سی..... سارے قبرستان بچ ہا سے پھٹے سن..... موڑ تہ مڑ یا پر کس کاری۔



سزا

ننگا جیا کمرہ پہنچی نی گھٹلی ٹڑٹی نی بندری کھیڑیاں نی جوڑی دو کھنڈیاں پتلیاں
اک چٹا کٹورا اک ادھ منہواں چچہ پُر اناٹھ تہ اک میں۔ بس ایہہ سب گجھ ماہری
وارثت ہین۔ رات ہونی ہے اُتیاں نے دا بے نا ادھ منہواں چچہ تہ دادے نی وراثت نا
پُر اناٹھ آپس بچوں کجھ گلاں نے بول بولنے ہین۔

”تیرے اندر نا تھواں تہ تھویں نے جالے اپنے آپ چو فیری کھنڈی جاسن۔
یک لخت ماہرے اوٹھاں پُر پہرے لگی جانے ہین۔ اکھیاں کھلیاں نیاں کھلیاں
رہی جاناں ہین۔ پیر آپ مہارے زمی بچ تہری جانے ہین۔ سارا وجود سُن راتی
نے ہنیریاں بچ ڈبی جانا ہے۔

کیناں دتاں نی ٹھنڈ برف تہ کورا اندروں باہر نیمہ نکلن دینا۔ ٹپلا جھنڈ کھنڈا
چلھے بچ پھوکی پھوکی اُسنا سدا خشک تہ اکھیاں ڈیلیاں بچوں باہر آئی گیاں ہین۔ ہر
پاسے تھویں نے غبار چو فیری کندھاں پُر تھویں نے جالے تہ جالے نے اندروں
کندھاں نے بڈھے پتھراں نے گوشے خالی کھنڈیاں پتلیاں نا کھڑکارا ادھ منہواں
چچہ نارولا تہ چٹے کٹورے نی پُپ ٹڑٹی نی بندری ناصر دواں کھیڑیاں نی کھسپٹ پہنچی

نی کھٹلی نی چپیں چپیں دادے نے ویلے نی تھئے نی گروگرو۔ آشونی اکھیاں نے اتھروں
..... ماہڑے کلجے نے چہر..... اُف اللہ کدوں مٹکسن۔

دروٹنی پُر کھلوئی دل آونا ہے۔ زور زور نال تھوئی ماراں۔ سارے لوکاں کی اپنا
حال دہستاں۔ مگر اس بستی نے لوک اُپے چو باریاں پُر رہن آلے کاراں تہ موٹراں پُر
پھرن والے جِرس تہ ہوس بچ ڈبے پیسے نے پھنگھے اکھیاں تھیں اُنھے کتاں تھیں
ڈورے کدوں کسے غریب نی گل سننے ہین۔ انہاں کی کدوں ایہہ پتہ ہے جے کسے
نے کوٹھے نے بڑھیاں پتھراں پُر تھواں ہے تہ تھوویں نے جالے ہین تہ انہاں جالیاں
بچ کتیاں حسرتاں تہ کتیاں مجبوریاں بند ہین۔

اک واری فر ماہڑے کلجے نے زخم سرن لگے ہین۔ پر آج نی واریں ماہڑے
اندروں تھواں نسی چار چو فیری کھنڈی جانا ہے۔ آشونے اکھیاں نے اتھروں ماہڑے
کلجے نے چہر بڑھیاں پتھراں پُر تھواں تہ تھوویں نے جالے۔ سارا کجھ ماہڑیاں اکھیاں
بچ آئی جانا ہے۔ اُماں نے ادھ منھوویں چچے تہ دادے نی وراثت نے تھئے بچ آج گل
بات مکی جانی ہے۔ تھواں سارے پاسے کھنڈی جانا ہے۔ ہُن تہ اوہ ماہڑیاں کندھاں
پُروں کھسکی لوکاں نے دلاں پُر کھنڈی جاسی۔ ہُن ہر پاسے تھواں تہ تھوویں نے
جالے ہون مگر اُسنا کے ہوسی..... جیہڑی چلھے نے ڈلھے نال بیٹھی ماہڑیاں گلاں
سُننی وئی سی۔ فر اُس ماہڑے پُر اعتبار کیتا سی۔ اپنا آپ ماہڑے حوالے کیتا سی۔
اکھیاں بند کری اُس چھال ماری سی۔ نہ ڈولی تہ نہ سہاگ..... شاید میں دغا کیتا
سی۔ آشو کتھاں ہے..... مگی سزا کیمڑا دیسی.....؟



ساڑھے اٹھ

”بچ، چھ سٹ، اٹھ ساڑھے اٹھ..... بس اس تھیں زیادہ نیہ۔ آج کل ناریٹ
ایو ہے استھیں زیادہ نیہ۔“

فراک پہنچل اپنے آپ بھٹکا۔ دینہہ چن، تارے سارے اپنے آپ بے نور
ہوئی گئے۔ ساری دُنیا گھپ ہنیریاں نی چھولی چھپن لگی۔ بھگھے دروازے اپنے آپ
گھلن لگے۔ حسرتاں نیاں پنگاں لارے کھان لکیاں۔ آساں نے دیے ہسن لگے۔
حرص نے بٹے پھلن لگے۔ دلاں نے زخم سرن لگے۔ اوٹھاں پرتھوایاں نے بول
کھسکن لگے۔ سھل پیراں بچ سرت پین لگی۔ اکھیاں پُر کالے کڑے تہ متھے پُر
لکیراں چمکن لکیاں۔ اندرو اندری تفوں تفوں تھویں نے غبار اُڈن لگے۔ کئی دِتاں نی
فاقیاں ماری ڈوہنگے سمندر بچ ڈوبن لگی..... ہائے..... افسوس۔

”ایہہ ساڑھے اٹھ ناہند سہ ماہری جان نیہہ چھوڑنا۔ نکلی ساں تہ سکول جانے
نی کہنٹی ساڑھے اٹھ بجنی سی۔ عارف نال نال سکول جانی ساں۔ فرمڑی شام ساڑھے
اٹھ توڑیں اُس نال کھیڈنی تھنی ساں۔ پر جدوں ماہری عمر ساڑھے اٹھ سال ہوئی

ماہڑا سکول جانا وی بند ہوئی گیا۔ ہُن عارف کدے کدے ساڑھے اٹھ بجے ماہڑے
 بیہڑے بچوں لنگھی سکول جانا سی۔ آخر اوہ دن وی آیا، راتی نے ٹھیک ساڑھے اٹھ بجے
 ماہڑی اُتارن ماہڑیاں بالاں بچ انگلیاں پھیرنی پھیرنی شوپیا گانی چُپ ہوئی گئی سی۔
 اُسُنیاں اکھیاں بچوں دو موٹے موٹے اُتھروں تھیں ماہڑے سپنے نال چڑھی گئے سن۔
 چو فیری بجلی کڑکی سی۔ آساں ناباغ سڑی تھی ہوئی گیا سی..... تہ میں.....!“

ٹھیک ساڑھیاں اٹھاں سالان بعد ماہڑیاں متریریاں ماواں ماہڑی رخصتی نی
 تیاری کیتی۔ پر ماہڑا نکاح..... جدّوں سویرے ساڑھے اٹھ بجے ہون لگے سن
 سارے مُلک بچ اگ لگی گئی سی۔ تہواں چو فیری کھنڈی گیا سی۔ بندوقاں نیاں گولیاں
 تہ بتماں نے گڑکار سارے لوک اندروں اُٹھی نسی گئے سن۔ اپنے کیتے نی سزا پہون گئے
 واسطے اُج کوئی وی تیار نہیہ سی۔ پر جدّوں جدّوں گناہ اسمان چڑھیا، لوکاں اک دُوے نا
 خون پیتا۔ یتیم تہ مسکین لوکاں نیاں عزتاں کی لٹیا۔ کوئی نہ کوئی حادثہ ضرور ہو یا زِمی
 گجھاں دتاں واسطے ضرور پاک ہوئی پر..... کُہن نال سُسلی وی پس گئی۔

”ساڈھے اٹھ تہ بجی گے ہِن ساڈھیاں اٹھاں والا کد رگیا۔ میں ساڈھے اٹھ

توڑیں فرڈ پکساں جے نہ آیا تہ کے کرساں؟“



جہلم تھیں چناب توڑیں

اوہ جگہ بڑی اُچیاں شانناں تہ گماناں والی سی۔ اُس نے اگل بگل اُچیاں بر فونیاں
 چوٹیاں ستاں بادشاہاں نے تاجاں تھیں وی سوہنیاں لگنیاں سن۔ اُس نے دلفریب
 کھیتراں پُر اُس اِسطراں چمکنی سی جے تاریز مین اُپر ٹہلی آئے ہوون۔ اُس نے دُور
 دُور توڑیں کھنڈے نے باغاں نے رنگ برنگے پھلاں نی خوشبودلاں نے درداں نی
 دوا کرنے سن۔ اُس نی چھاتی بچوں جہلم نا دریا ساری دُنیا نے گیتاں نیاں مٹھیاں
 مٹھیاں سُراں نال بکنا سی۔ لوک اُس نے کنڈھے کنڈھے رسنے بسنے اِس نیاں سُراں
 نال اپنی زندگی نے گیتاں نیاں تالاں جوڑنے سن۔ مولوی نی بانگ تہ مندر نی ٹلی نال
 نال اِس نیاں لہراں چو فیری کھنڈی جانیاں سن۔ اپنی چھولی بچ شمشو نا تھ تہ کیرے ڈار کی
 لوریاں دینا سی۔ ستاں پھٹاں تھیں پیار محبت نے گیتاں نال لوہ کرنا سی۔ دینہہ اِسنیاں
 لہراں نال اکھ مٹک کرنا سی۔ بستی نے سارے لوک اِس نی مستی نال مست اِسنیاں لہراں
 بچ ڈبے رہنے سن مگر.....!

اچھین چیت ہونی پڑ ماریا۔ جہلم نیاں سُراں گنتیاں ہوئی گئیاں۔ اسطراں لگن لگا جے اِس نے ہتھّاں پیراں بچوں ساہ منگی گیا۔ شہونا تھ تہ کبیر ڈار اُسنی چھو لی بچوں آپ مہارے کئی کئی ہوئی گئے۔ پھٹتاں تھیں جوے نے سارنگی نے تار بکھ بکھ ٹہنی ٹہیر ہوئی گئے۔ دوستیاں راستیاں پھانڈے نال اُڈرن لکیاں۔ آ لے دوالے نے مھلاں بچوں خوشبو منگی گئی۔ اگل بگل پہاڑاں نیاں چوٹیاں پُروں پچھے پچھے غلاف غائب ہوئی گئے تہ تھوہیں نے کالے کالے شاہ داغ انہاں چوٹیاں پُرنجی آئے۔ دینہہ نیاں مہکیاں مہکیاں لہراں شہونا تھ تہ کبیرے ڈار نے بیڑے پنج بنیں کری رون لکیاں۔ مگر اوہ چپ چاپ ایہہ سب کچھ تنکار ہیا۔ شاید اُس نے اوٹھاں پُرو کوئی بڑا سارا چندرا چندری گیا سی۔ شہونا تھ نی جدائی نے صدے نال اُس نیاں اکھیاں بچوں نیر منگی گیا سی۔ مگر اُس نے دل نادرد بدھنا جانا سی۔ اُس نے کیلجے پُرا اُس ویلے ڈوہنگے ٹھریاں نے پچھ لگئے سن۔ جدوں کبیر ڈار کھل مکھلا اُس نے کندے پُرجھٹیں چھوئیں آونا تہ مڑی جانا سی۔ جہلم نیاں سُراں نال نال اُس بستی پنج چوٹیاں نے گیت دی گئے ہوئی گئے سن۔ شہونا تھ تہ کبیرے ڈار نی حویلی پنج انہاں گیتاں پُرا پھرے لگی گئے سن۔

بلیں بلیں اِس بستی بچوں سارے چوٹیاں نے ڈاردو رڈو راڈری گئے سن مگر..... شہونا تھ تہ کبیرے ڈار نی حویلی پنج بسنے والا چوٹیاں ناڈار، جہلم نے کندھے بھی جہلم نیاں مٹھیاں مٹھیاں سُراں نال اپنیاں سُراں نے تال جوڑی۔ اِس اڈپک پنج چوٹیاں نے ڈار روزانہ کدے حویلی پنج ٹنگے نے بڑے سارے شہونا تھ نے نوٹوناں چھٹی چھٹی گلاں کرنے سن تہ کدے کبیرے ڈار نی حویلی پنج اپنیاں آساں نادیا بالنے سن۔ انہاں کبیرے ڈار نی آساں نال اپنیاں آساں جوڑی رکھیاں سن جے شہونا تھ جیہڑا راتی نے گھپ ہنیریاں پنج غائب ہوئی گیا سی اک دن ضرور مڑی آسی تہ فر..... جہلم

نیاں سُراں نال نال چوایاں نے گیتاں بچ وی اوہ لے مُڑی آسی جیہڑی جہلم نے
 کندھے کندھے بسنے والے لوکاں نے دلاں نے درداں نی دوائی کرسی.....
 کبیرے ڈارنیاں اکھیاں اس آس بچ جے شہونا تھ بس لوہ ہونیاں مُڑی آسی چٹیاں
 مہری گنیاں سن۔ اوہ روزانہ جہلم نے کندھے جانارہیا تہ اُسنی چھاتی بچوں اٹھنیاں
 لہراں نال گلاں کرنا رہیا۔ شام ہونیاں جدوں چوایاں ناڈا اُسنی حویلی بچ آئی اُس نے
 اگے گریہ زاری کرنا سی۔ اوہ لاجواب ہوئی جانا سی۔ اُسنی سمجھ بچ ایہہ نیہہ سی آونا جے اوہ
 انہاں چوایاں کی کے دسے جے شہونا تھ کدوں تہ کیاں راتی نے ہنیریاں بچ غائب
 ہوئی گیا سی۔

آخر اک دن سپنے پُروں پہنار پتھر چائی اُس چوایاں کی اوہ ساری داستان سُنائی
 چھوڑی۔ جنہاں ایہہ سارا واقعہ سُنی اک دم چچول مچایا۔ ”کبیر ڈارڈر نے مارے پُپ
 ہوئی گیا۔ اُس انگلی نے اشارے نال انہاں کی پُپ رہنے واسطے آکھیا:
 ”چو پو پُپ! تُساں کی پتہ نیہہ ہے جہلم نے کندھے اُساں نی بستی بچ اُج
 کریک ڈاؤن ہے۔ تُساں واسطے ایو چنگا ہوئی جے لوہ ہونیاں گرے دُور اُڈی
 جاؤ۔ اِس بستی تھیں دُور جتھے شہونا تھ بسنا ہوئی۔ شہونا تھ ماہڑا سگی ماہڑا یار! اک گل یاد
 رکھیو شہونا تھ ضرور چناب نے کندھے بسنا ہوئی۔ چناب نیاں مٹھیاں تہ ولفریب لہراں
 نال اپنیاں سُراں جوڑنا ہوئی۔ چناب نے کندھے تُس وی اُس بستی بچ بسیو۔ اپنیاں
 مٹھیاں گیتاں نال ماہڑا سلام آکھیوس۔ ایہہ وی آکھیوس جہلم نیاں گنٹیاں سُراں بچ
 دُبیاں ماہڑیاں سچیاں تہ سچیاں آساں تیری اڈیک بچ ہین۔“



خاکی لفافہ

بڑی پُرانی گل ہے جدّوں اوہ انہاں لمیاں تہ گندیاں نیاں کندھاں بشکار بہئی
 لتاں لمیاری اُس نال دُکھ سکھ بنڈیا سی، بیت بولنا سی، رُسی سُسی رہنا سی، مگر آج.....
 آج اوہ ویلا وی آئی پہنچا ہے جے اِس کوٹھے نیاں ادھ مویاں کندھاں تہ کندھاں
 نے دُڈڑے بچ زبڑے نے پتھر پھوڑے نے بیت بولنے ہین۔ دروازے نارنگ برنگا
 چوکھاٹ بے رنگ تہ بوڑا ہوئی اک پاسے نامرادی نے ڈوہنگے گھڈ بچ ٹھٹھانا ہے۔ ادھ
 پٹ گھلیاں کھڑکیاں اک پاسے لمکی گیاں نیاں ہین۔ روشندان اک نامر اد شخص نیاں
 اکھیاں فی طراں اتھرواں نا اک سمندر رُنی سُب دُھپ بیٹھے نے ہین۔ پتہ نیہہ کدوں
 انہاں نے ٹہینے فی باری آوی۔ شاید اِس اڈ پک بچ کئی سال لنگھی جان۔ تلن مٹی تہ
 پتھراں نا اک ٹھیر بنی گیا نا ہے۔ ہُن تہ اِس نے شکم بچوں پہنگے نے بہتیرے وٹے وی
 جی آئے ہین۔ مگر طاقے بچ اتجاں وی خاکی لفافہ دُروں دُڈڑے بچ پھڑکنا تہ تھڑکنا
 دِسنہ ہے۔

”آج اُسکی فر خاکی لفافہ آیا ہے۔ آج اُسکی فر روپے لمھسن.....“
 ”اچھا..... اِس پھیرے میں وی..... مگر ماہڑے کول خاکی لفافہ تہ
 نیہہ..... فر میں..... کے کرساں؟“

اک سوال.....؟..... اک استھاں تہ ڈورا سوال..... جیہڑا اک
ناگ نی طراں اُسے کلجے پنج ڈنگ مارناسی۔ اک ڈوہنگی ڈاب پنج ڈی ڈی جاناں تہ فر
!.....

اُج نی واری مشاعرہ شروع کرنے پنج جیہڑا چر لگی گیا سی۔ خاکی لفافیاں والے
ادھروں ادھر تہ ادھروں ادھر چکر لانے تہ بھرنے سن۔ مگر اوہ..... جیہڑا چپ اک
پاسے کھلوتا ناسی جس نی آس نادیا ہسنا تہ بلناسی جیہڑا آپوں روناسی۔ اُسنا سدا خشک تہ
چپھہ گزلمکی گئی نی سی۔ اُسناں ہتھاں پیراں پنج کنیاں سالاں نی کنی سی۔ اُج اوہ حرص
نی ڈوہنگی ڈاب پنج کہڑی ڈبنا تہ کہڑی ترناسی۔ فر اُسے ادھ موئے اٹھاں پُروں گیتاں
ناک سلسلہ شروع ہوئی گیا۔ سارے لوک چپ ہوئی گئے۔ خاکی لفافیاں والے مکنے
وی رہے تہ ہنسنے وی رہے (سکے تہ مل ماہیا)۔ مگر اوہ.....!

پر جڈو چالی روپیاں نی گل آئی اُسنا دل زور زورنال تہڑکن لگا۔ اوہ لکھی لکھی تکنا
رہیا۔ چر توڑیں..... فر جڈو لفافیاں والے سارے ٹری گئے اُس وی اپنا
صندو کڑا بند کیتا۔ اُسنا رنگ فق ہوئی گیا۔ ہائے افسوس!

سارے لوک اُتھوں ٹری گئے مگر اوہ تہ اُج اسمانوں ٹھٹھا ناسی۔ اُسنا سارا وجود
ٹوٹے ٹوٹے ہوئی گیا سی۔ گوڈے بے جان ہوئی گئے سن۔ اُج اوہ کہہ کسٹراں جاسی
تہ کے جواب دیسی۔

خاکی لفافے نادر داندرو اندری اُسے کلجے ناچہر ڈوہنگا کرنا رہیا تہ سوچنا رہیا جے
می وی خاکی لفافہ ہونا تہ میں وی..... ”جی..... ہاں..... میں..... ماہڑا..... بالکل.....
لفافہ..... ماہڑے ناں نالفافہ.....!“

خاکی لفافہ اپنے ناں ناتکی اُسناں خوشیاں نی اُج کوئی حد میہ رہی۔ لفافہ

کھولنے تھیں پہلاں اوہ چاہنا سی جے پہلاں اُسکی دہستے فر کھولے تہ تگے۔ اُسکی اپنا سارا سلسلہ یکدم بدلنا دسیا۔ مگر اُسکی ایہہ نیہہ سی پتہ جے اُسنی آس نے دیے بچوں تیل کدوں نامگی گیانا سا۔ ہُن تہ باقی صرف کچھ دیے نیاں جھکیاں ہن۔

”اُنا..... ایہہ قرضہ تُساں کدوں ہندا سی۔ ہُن تہ پورا اک ہزار دینا پسی۔ ہُن تہ گورنمنٹ نیہہ چھوڑنی۔“

”قرضہ.....؟ اک ہزار.....؟ پورا.....؟ خاکی لفافہ.....؟“

تکلیاں تکلیاں فر اوہ اوہ اک مٹی نا ٹھیر ہوئی گیا۔ سارے کھرے نے لوک اُسے اگے پچھے جمع ہوئی گئے۔ اُف چند ایہہ کے ہويا۔ ایہہ کیہڑے پاسے فی نیلے نمبلوں بجلی کرڑکی ہے۔

لفافہ اتجاں توڑیں اُسے ہتھاں بچ اُسناسارا تناشہ تکلنا رہیا، مگر اُسنا کے ہوسی؟ اُسکی کتھاں ٹنکسی؟ اُسکی کتھاں پھینکسی؟ اُسنا کے ہوسی.....!

خاکی لفافے اِس گراں بچ ہر سال آونے رہسن۔ ٹوٹے ٹوٹے ہوئی رستیاں بچ رُلنے رہسن۔ فر چھکھو چھولیاں نال دُردُردو رتوڑیں ڈاریاں مارنے رہسن۔ مگر.....! اُسنا کے ہوسی جیہڑا اتجاں توڑیں طاقے بچ دُڑے بچ دُبیانا پھر کنا تہ کنا ہے۔



بختی

بخت ڈوہنگیاں سمندراں بچ ڈبے وی تے نشان بنے تہ مٹے وی تے۔ ٹھڈاں
اُپر ہاسے بھٹے وی تے۔ دلاں نے گوشے ٹڑنے وی تے۔ تاجاں والیاں کی رستے بچ
رُنیاں وی تکیا۔ رستیاں والیاں کی تختاں پُر چھلنیاں وی تکیا۔ اکھیاں والے اُنھے تہ
کٹاں والے ڈورے وی تے۔ چھٹاں والے وی تے تہ گنگے چلے وی تے۔ آساں نے
باغ بھلنے تہ اُجڑنے وی تے۔ یاداں نے دیے ہسنے تہ بلنے وی تے۔ میں کے نیہ
تکیا.....؟ جے دہستاں تہ ٹساں ساریاں لوکاں ناچور..... جے چپ رہواں ماہڑے اندر
نا روگ می ہرویلے ڈسنا ہسی۔ ماہڑے اندر فی دُنیا برباد ہوئی جاسی تہ فراک تہیاڑے
!.....

لوک آکھسن..... ضرور آکھسن..... بڑا گجھ آکھسن..... اپنی اپنی مرضی نال
آکھسن..... اُوٹھ جوڑی جوڑی گجھ آکھسن..... ہتھ پیر پھڑکائی پھڑکائی آکھسن.....
ماہڑیاں اُگڑیاں اکھیاں ایہہ سن گجھ تنکسن۔ ماہڑے کن ایہہ سب گجھ سنسن۔ ماہڑے
کلیجے نے ٹوٹے ہوئی جاسن۔ دوچار لہوے نیاں بھٹکیاں دوچار چھکیاں اُوٹھاں پُروں
ڈاری مارن۔ بے یارو مددگار تھویں نے اک غبار بچ ڈبی جاسن۔ فرسارے لوک

اتھوں اک اک کری کھسکی اپنیاں اپنیاں کہہاں نے ہیریاں بچ چھٹی جاسن.....!

”ماشرانی! اللہ تیناں آباد رکھیو..... ہاہا.....!“

بختی اپنا بخت ٹہٹی دروازے نے اوہ گھلے پٹ نال چڑی نی گجھ بول بولے۔
فر کھڑ کھڑ ہستی۔ فر چپ سُن سُن تکی رہی۔ چرتوڑیں گجھ میہ بولی۔ اکھیاں پرتی پرتی
ادھر ادھر تکی رہی۔ گجھ گجھ سوچتی وی سی۔ آج اُسے اندر نا لاوا پھٹا سی۔ اوہ چپ
کسٹراں رہوے۔ اس کوشش بچ اُسے اوٹھاں پُر بے تحاشہ گلاں دُبنیاں تہ ترنیاں
رہنیاں۔ کدے..... بختی چھوٹ لئی رنگ کالا، متھا چوڑا تہ چمکنا، ٹھڈاں پُر گلاں نا
ٹھیر، دغاں پُر بناوٹی ہاسے، ہتھاں پیراں بچ کمنی، کالے سوف نی گروتی تہ تمسی، جگہ جگہ
اڈل بدل تنہا گیاں نال سپڑیاں نیاں رنگ برنگیاں ٹاکیاں، دو چاندی نے میلے
کڑے دوان انگلیاں نال چڑے نے چاندی نے چھلے، اک اُدھ پُرانی چادر.....
زندگی نی ہر گل تھیں ٹھوگری نی بختی کسٹراں اس سارے ماحول نا مقابلہ کرنی سی۔ بس
گجھ بولی..... فر ہستی..... فر چرتوڑیں چپ ہوئی جانی۔

ماشرانی اللہ تیناں آباد رکھیو.....! بختی نے اوٹھاں پُر فر گل
پھٹتی۔ ماشرانی جیہڑی اجاں توڑیں اپنے کم کاج بچ مصروف سی، چھٹے مڑی بختی کی تکی
حیران ہوئی گئی۔ فر بولی..... ”ماسی کے گل ہے؟ ٹساں ناڈیرہ کتھاں ہے؟ بال بچے کی
چھوڑی توں کدھر مکنی پھرنی ہیں؟ ایہہ تو اہڑی عمر..... تہ ایہہ کم.....!“

بختی جس گل تھیں چمکنی تہ ڈرنی سی اوہ گل فر ہوئی۔ اک زوردار ہتھوڑا بختی نے
سر اُپر آنی لکيا۔ بختی نے سارے اندازے غلط ہوئی گئے۔ تکلنیاں تکلنیاں اک ٹھیر ہوئی
گئی۔ اُس نے اندر اک واریں فر زلزلے ہویا۔ اوہ کسٹراں اپنا سپنہ چہرے کے دہستے۔
اوہ کیہڑے کیہڑے زخم نی دوا کی کرے۔ اُس کے گجھ ہاریا نا ہے۔ اُس نا بخت کیہڑے

کیہڑے ڈوہنگے سمندر رانچ ڈُبیانا ہے۔ ہائے افسوس ماہڑے مَتّھے نا اشتہار لوک پڑھی
 مہہ سکے۔ میں باری لگی نی ہاں۔ ایہہ وی تہ باری لکسن۔

اِس سال بختی نی بھوک وی کھسے گئی سی۔ متریریاں بختی بڈھی اُمتاں نا اُدھر رستے
 چھوڑی دتا سی۔ کجھ چب کھڑے پہنا نڈے۔ دو بوڈھے صدیاں پُرانے جندھے اک
 رنگ برنگا تمبو ایہہ ساری کائنات بختی نے جھسے بچ آئی سی مگر بختی فر وی با حوصلہ
 سی۔ بختی نا بخت اُس دن ڈُبیاسی جدّوں صرف اک دن نکاح نے بعد اُسنا خصم دریا
 بچوں رُہڑی ہمیشہ واسطے ٹری گیا سی تہ فر متریریاں پھر جائیاں!.....

بختی وی رنڈی تہ بختی نی اُمتاں وی رنڈی..... اک دُوڑے نارنڈیپ اک دُوڑے
 نے گل پئی گیا۔ سارے اپنے اوپرے ہوئی گئے۔ ساری زندگی ہنیریاں بچ ڈُبی گئی۔
 ساریاں آساں نا باغ اُجڑی گیا۔ پر بختی اُجّاں اِس اڈک بچ اک اک ساہ گزارنی
 ہے..... ”میں باری لگی نی ہاں..... انہاں نی باری کدوں لکسی!.....“



کا گاجے تہ بول

راتیں ناہنیراتہ ہر پاسے دِسنّا ہے مگر دِتاں نی لوہہ نی کُجھ خبر نہیہ۔ اک اندرو
اندري ساڑ..... کُجھ بے چینی..... ساریاں نزاکتاں مگیاں مگیاں نیاں ہیں۔ بس اگر
کُجھ ہے تہ بودیاں ہڈیاں نا کھڑکار ہے۔

کا گا اُج تہ سَچے بول۔ بس کُہڑی نی کُہڑی۔ جے توں اُج سَچے بولیں میں
انہاں اُگڑیاں اُکھیاں نال اک واری فراپنے سائیں کی تگاں، فر اُکھیاں پیچی
چھوڑاں، کدے نہ کھولاں تہ اِس تھیں بعد توں کھبے بولنا رہیاں۔ شاید فر میں تیرے
بول سُناں نہ سُناں.....!

کا گا! میں جیساں تہ توں کوٹھے نی اگوالی آنی بولیا سیں۔ فر توں روز بولنا
رہیاں۔ میں تہ ماہڑے کُہر والے سُننے رہے۔ میں تیرے نال نال کاں کاں کرنا رہیا،
مگی یاد ہے۔ جدوں میں کا..... کا کیتا، ماہڑے لَبے مخانے بندے سن۔ ماہڑی اُمتاں
مگی لوریاں دینی۔ توں ٹُری وی جانا مگر میں کا..... کا..... کرنا رہنا۔ کا گا توں فروی کھبے
بولنا رہیاں۔ ماہڑے اندر آساں نا دیتا، سنا تہ بلنا رہیا۔ ماہڑیاں اُکھیاں بچ تیری محبت نا
دریا بکنا رہیا۔ مگی یقین سی جے اک دن توں ضرور سَچے بولیں تہ فر.....!

شاید آج برف برسی۔ کالا سیاہ چھڑ..... ہر پاسے زنگا زنگا بدل۔ میں اپنے اندر بندری نے اک بوڑے ٹوٹے پُر بیٹھا نا کھڑکی نا اک پٹ کھولی باہر تکتائیاں۔ ماہڑے سامنے کتئیاں دِقاں نا ٹھنڈا چلّھا تہ اگے کچھ کھلے نے سلورے نے پہناڈے ہین۔ میں اک نظر بار تہ اک اندر تکتائیاں۔ آج کاگ بلیں بلیں کیاں بولنا ہے۔ آج کوئی گل ہے.....؟

تکتئیاں تکتئیاں ماہڑے اندروں پہیڑی جی کھنگ بھٹی۔ لہو نیاں پھٹکیاں اوٹھاں پُر ٹہیر ہوئیاں۔ شاید عقت اخیر ہے۔
 کاگا..... آج تہ سچے بول۔ آج انہاں اگڑیاں اکھیاں اپنے سائیں کی تگّاں۔ بس کاگا..... اک واری..... کاگا.....!



دروٹی

پُرانی تہ بڈھی دروٹی پُر گھریاں رگڑی رگڑی ہُن اوہ نشتا ہوئی گیا ناسی۔
 نامُردی، محرومی تہ بیکسی نیاں تتیاں لہراں نے اُسنا سارا وجود ساڑی رکھیا ناسی۔ ایہی
 نہہہ بلکہ کالیاں راتاں نے وی اُس نے وجود پُر وں مانس گھر جی گھر جی ایسکی ہُن
 ہڈیاں ناک برنگل بنائی چھوڑیا سی۔ اُسنیاں اکھیاں بچوں روشنائی کدوں مکی گئی نی
 سی۔ آلے دوالے نے نیا نے ہُن اُسکی سپے تہ گپٹے مارنے سن۔

بڈھی عمر تہ اکھیوں اتھاں بے اولاد تہ نامُرد جُماں دینہہ چڑھنیاں دروٹی پُر
 تہو کھسپٹنیاں لنگھی آو ناسی۔ ساری ساری جہیاڑی ڈوہنگی بکل ماری اوکرنار ہناسی۔ شام
 نا اندازہ ہونیاں فرمڑی اندر جانا سی۔ ساری ساری رات خاباں نے جالیاں بچ ہتھ
 بائی رکھنا سی۔

میں زنگا جاساں جد وں میں جے پہنائی کی تکیا سی۔ می چنگی طراں یاد ہے جُماں
 جد ہروی جانا سی دس چچے اگے تہ دس چچے اس نے چچھے رُ نے سن۔ جے ناڈو ہنگا صاف تہ
 لہماں شملہ ہتھے بچ بڑا سارا کھونڈا..... جد ہروی جانا سی پھانڈا پھیرنا ٹر ناسی۔ کدے لگو
 تہ کدے تالے پروٹھے۔ انڈے تہ مانس کھائی کھائی بڑا موٹا ہو یا ناسی۔ لوہ ہونیاں
 کچہری لگنی سی تہ اڈھی راتی جائی کوئی فیصلہ ہونا سی۔ مگر وقت اک جیا نہہہ رہیا۔ فراوہ
 زمانہ وی آیا جد وں جے نیاں زیادتیاں تہ ظلماں فی حد ممکن لگی سی۔ می یاد ہے۔ اک دن
 حسبِ عادت جُماں اپنی دُپری پُر کھلوئی زور زور نال گلاں کرنا تہ گلو کی گراں چھوڑنے

نیاں جہمکیاں دینا سی۔

حمید جیہڑا اک غریب کُہر تھیں تعلیم نے اک اعلیٰ مقام توڑیں پہنچا سی، اچانک
اس کچہری بچ آئی لگا سی۔ کے گل ہے.....؟ کے گل ہے.....؟ جہاں حمید کی تکی بیشک
کُجھ کُہرا ئی گیا سی مگر اپنیاں کونڈیاں مچھاں پُر اسطراں ہتھ پھیرنا سی جے حمید اُس تھیں
ڈری جاسی تہ اوہ.....!

حمید کی مکتب بچ اُستاد نال کیتا وعدہ یا دآیا سی۔ اُس اسطراں لگا جے اُج اُسنا پہلا
امتحان ہے۔ حمید فٹ بولی پیا..... ”کے گل ہے؟..... گلو پہنائی.....!“
گلو نیاں اکھیاں بچوں ساون نابدل بٹھی پیا سی۔ اُسنیاں اوٹھاں پُر تیاں
ساریاں گلاں جام ہوئی گیاں سن۔

حمید لوکاں والے پاسے مڑی اک آواز نا سودا کیتا سی۔ ”لوکو.....!“ اُس
کدوں انسان بنسو۔ کدوں تُساں بچ خُدا نا خوف آوسی۔ تُس ظالم نا ساتھ کدوں توڑیں
دیسو۔ اُج گلو نی گڑی نی باری ہے تہ کل.....! جاؤ مڑی جاؤ اپنے اپنے کُہراں نی
راکھی کرو۔ تُساں نیاں دروٹنیاں پُر پتہ نیہہ کدوں لیجے لوک کھوٹا پھڑکا سن۔“
دراصل دروٹنی وی زندگی نی اک حرارت ہے جیہڑی آدمی نے دُکھ تہ سکھ بچ
ساتھ دینی ہے۔ جدوں بندہ سکھی ہونا ہے تہ لوک اپنی دروٹنی نا ایڈرس دینے ہین۔
امیراں نی دروٹنی پُر غریباں نیاں آساں نا سودا ہونا ہے، مگر غریباں نیاں دروٹنیاں پُر بے
بسی تہ مجبوری نے سترے اوکمر نے رہنے ہین۔



کچھری

دل آکھنا ہے جے اِس کی مُنڈ وں پٹاں۔ تہروئی تہروئی اِس ناک اک اک جوڑ
ادھیڑی رکھاں۔ فر..... دُور دریا نے کنڈھے سٹی آواں۔ لوک وی آکھن تہ اِس کی
وی پتہ لگے۔

مگر فر کے ہوسی؟ کے میں اِس کی مُنڈ وں پٹی وی سکنا ہاں۔ اِس نیاں جڑاں تہ
چو فیڑی دُور دُور توڑیں کھنڈیاں ہوسن۔ اِس نے ٹاپے تہ ٹاہلیاں..... ٹاہلیاں اُپر پتر
..... پتراں نی چھاں..... کہو نفریاں ٹاہلیاں نے کچھے بچ چریاں نے آہلنے..... یوٹے
نے مُنڈھ دینہہ نیاں رسماں نال نال کچھریاں تہ شام ہونیاں چو نیاں گنٹاریاں نا
کہنکارہ.....! اُجھاں تہ ماہڑی کچھری باقی ہے۔ اِس ناویلہ کدو آوسی؟

ڈوہنگیاں جڑاں والے یوٹے کدو توڑیں گئے رہنے ہین۔ اک نہ اک دن
ضرور ٹہمئی پینے ہین۔ جڑنالوں جڑ تڑی جانی ہے..... مُنڈھ نالوں ٹاہلا..... ٹاپے نالوں
ٹاہلیاں تہ ٹاہلیاں نالوں پتر۔ پھڑکی پھڑکی..... تڑنی تڑنی..... بے رنگ تہ بے شکل
پھانڈیاں نیاں موہنڈھیاں پُر ڈاریاں مارنے ہین۔ کوئی مشرق کوئی مغرب۔ کسے
جا بے بچ سر دتا ہونا ہے تہ کوئی رستیاں بچ تڑفنا چھڑکنا ہے۔ کوئی ادھ موئی پھنڈر
کنڈھے پُر چڑیا ناک اشتہار بنی گیا نا ہے۔

مگر اس بوئے ناکے ہوی۔ جتھے اُجاں ماہری کچہری لگنی باقی ہے۔ اس نے پتر
تہ پتراں نی چھاں..... چو فیری مُنڈھ نے بودیاں تراڑاں نا تھڑا..... اگل بگل قبرستان
..... قبرستان بچ رنگ برنگے جھنڈاں نا جاڑ..... ایہہ سارا کجھ ماہریاں اکھیاں بچ سرکنا
ہے۔ ماہریاں اڈپکاں نے کلیجے بچ ڈوہنگے چہر لانا ہے۔ ماہریاں اوٹھاں پُرگلاں نا نجوم
ہے۔ می بس اتنی فکر ہے جے ماہری کچہری کدوں..... تہ کے..... کچہریاں والے کدھر
گئے..... ماہری کچہری نال کے ہوی۔

کتیاں دتاں تھیں ایہہ بوئے ماہرے قلاوے بچ ہے جیہڑ اچپ چاپ ماہریاں
ہاڑیاں تہ صد میاں کی اپنی بے بسی نے اندر دبانے نی کوشش کرنا ہے۔ ماہرے اندروں
تہواں پھٹی پھٹی اس بوئے نے اگل بگل کھلری جانا ہے۔

تکلیاں تکلیاں ٹاہلے تہ ٹاہلیاں نے پچنے نی کر کر..... ٹاہلیاں پُروں پتراں
نے پچھوڑے..... چڑیاں نے ادھ کچے آملنے بچوں لمکنے سکے کہناہ نے نامراد تپلے.....
تھڑے نے چو فیری پہنگ تہ تھوڑا..... تھڑے نے بشکار بودیاں تراڑاں پُ پتراں نا
ٹہیر..... قبرستان تکی ماہرے لنگاں بچوں ساہ سکی جانا ہے۔ ہر پاسے کنڈیاں نا
ٹہیر..... سمبلواں نے جھنڈاں نا کہتا جاڑ..... اس طراں لگنا ہے جے اتھوں کچہری مکی
گئی ہے۔ رونقاں والے لڑی گئے ہین۔

تو شاید ہُن اپنیاں کہراں اندر کچہریاں لاسن۔ مگر ماہرا کے ہوی؟ ماہری
کچہری کدوں تہ گتھے لکسی؟



چر پٹھاں

چین چک ماہڑے کلیجے بچ اُس گل نا احساس چمٹن لگا ہے جے سامنے کھلوتا نا
چوکیدار می آج ضرور اک باہی گُرسی پُر بہنے واسطے آکھسی، جسکی تکلیاں بے اختیار
ماہڑے ہتھوں پیراں بچ بے بسی نیاں سنگلاں پئی گیاں ہین۔ دروازے تھیں اندر
آونیاں ادھ باہی گُرسی نا ڈرمپو فیری دِن لگاسی۔ سارے وجود بچ اک رولا چُکی گیا سی۔
شاید اس گل نا اصراری جے می اس ادھ باہی گُرسی پُر آج بہنا پئسی۔

دُور کھلوتا نا چوکیدار اس اڈ پک بچ سی جے میں اُسنا آکھائی اُسنیاں اپلاتیاں
خوشیاں نی حوصلہ افزائی کراں، مگر گُرسی پُر بہنے نا خوف ماہڑے ہر فیصلے کی رَد کری
چھوڑنا سی۔ اللہ خیر کرے۔

اوکھیاں سوکھیاں میں اک باہی گُرسی پُر ٹہنی گیا ساں۔ مگی اسطراں لگنا سی
جے ایہہ گُرسی میہہ بلکہ جہنم نی گھیری ہے۔ جتھے ماہڑا برنگل اُگی نے پہنا نمبر بچ چمٹن
ہونا سی۔ پتہ میہہ کے گل ہے۔ اپنے اگل بگل لوکاں کی تکی می اس گل نا اندازہ کرنا
کیاں مشکل تھیں مشکل دِسنہ ہے۔ جے ماہڑے اندروں تہواں جدوں چو فیری کھنڈی
جاسی تہ ایہہ لوک..... ایہہ گُرسی..... انہاں نا کے ہوسی؟

”بچہ ذرا تکلیاں اس کا پی پُر بابو کے چر پٹھاں لانا ہے۔“

تکلیاں تکلیاں دروازے تھیں لئی ماہری اک باہی گُرسی توڑیں اک لین لگی گئی۔
 ماہریاں اکھیاں کاپی نیاں چر پٹھاں تھیں ہئی دروازے نے باہر توڑیں بھری گیاں۔
 ماہرے اندر نے ڈرے نا اک نواں بٹا جمن لگا۔ 1..... 2..... 4..... 8.....

ایہہ اخیر پُر میں تہ نہیہہ.....!

کھونڈا کہسپٹی کئی بڑھی ماہرے کول آنی چٹتی سنگا کر ہیڑی کر ہیڑی اُس کجھ
 بول بولے مکر کے دہستاں اُسے اوٹھاں پُر پوری گل وی نہیہہ سی بھٹی۔ ماہرے اندر چین
 چک اک لگی گئی۔ ماہریاں اکھیاں بچوں لوہ مکی گئی۔ ہتھاں پیراں بچوں اُگی نے
 سرا کے مٹھن لگے۔ اُسی ادھ موئی گل تہ گُرسی نی چہیں چہیں ماہرے واسطے اک عذاب
 بنی گئے۔ اک واری فر میں اس سارے ماحول تھیں نسنے نی کوشش کیتی مگر..... گُرسی
 نے قلاوے بچوں نکلتا ماہرے واسطے کوئی آسان کم نہیہہ سی۔ شاید آج واپسی نادن سی۔
 نگا جاساں اتماں نی چھاتی نال منہہ لائی مٹھیاں مٹھیاں چوساں مارنا ساں۔
 اتماں ماہرے منہواں پُر ہتھ پھیرنی پتہ نہیہہ کیہڑے کیہڑے خاباں بچ ڈولنی وئی سی۔
 ہتھ پیر چائی چائی گیت بولنی وئی سی مگر میں..... میں تہ اپنیاں ہتھاں نال اُس نا
 منہہ چر پٹھنا رہنا ساں۔ فراوہ لاڈے نال ماہریاں انگلیاں نے پوٹے توسنی وئی سی۔
 چپ تکی وئی سی۔ چر توڑیں کجھ سوچنی وئی سی۔ ماہرے پتلیاں پوٹیاں نا خوف اُسے
 کالجے کی چر پٹھنے سن مگر.....!

جد وں کہسپٹی نی باری آئی ماہریاں پوٹیاں ناسیک بدھن لگا۔ میں دواں دواں
 ہتھاں تلن چر پٹھن شروع کیتا۔ ایو نہیہہ بلکہ کندھاں نال کھلوئی کندھاں چر پٹھیاں۔
 اتماں روز لمنی تہ میں روز چر پٹھنا..... ماہریاں انگلیاں نے پوٹے پتلے ہونے
 رہے۔ میں اپنی حرکت تھیں باز نہیہہ آیا۔ اتماں ٹھاکنی رہی۔ ہائے افسوس جے گل اُتھ

مکی ہونی۔

بلیں بلیں میں اندروں باہر نکلی لوکاں نیاں لٹکنیاں رنگ رنگی کندھاں،
دروازے تہ کھڑکیاں چر پٹھیاں۔ لوک کدوں ماہری اُتّاں ہاروں اِس گل کی برداشت
کرنے سن۔ روز ماہرے بوڑے دروازے نال شکایتاں نی اک پنڈ لکائی جانے سن۔
اُتّاں ایہہ سب کچھ برداشت کرنی ریہی، مگر اُس نے دِل پُر چر پٹھ ڈوہنگی ہونی ریہی۔
ماہری ضد نی بیل پھلنی ریہی۔ ماہریاں پوٹیاں بچوں حرص نی اُگ کدوں ہسنی سی۔ اِسنا
سیک لٹکنیاں مٹھیاں تہ سچیاں دلاں توڑیں بچی گیا سی..... تہ فر.....!

ایہہ سامنے تحصیل نادروازہ ہے۔ دروازے نے مُنڈ پتھراں نیاں بودیاں سلاں
..... اُسنی کاپی نا ورق..... کمئے ہتھ پیر..... لٹکنا مٹھا..... بوڈا کھونڈا..... اک باہی
گُرسی..... کندھی مچھے خزانے نی کھڑکی..... تہ بے شمار چر پٹھاں۔

”بابو جی سارے لوک ٹری گئے ہین۔ پینشن والے سویرے آو سن۔“

چوکیدار نی کھوری گل نال میں جاگی اُٹھیاں۔ اک باہی گُرسی می اپنے قلاوے
بچوں چھوڑی دتا ناسی۔ ماہریاں انگلیاں نے تپلے پتلے پوٹے دندان بشکار کدوں نے
پھستی گئے نے سن۔ پورا زور لائی میں پوٹے چھلکی کدھی آندے سن، مگر انہاں پوٹیاں
پُر دو ڈوہنگیاں چر پٹھاں پئی گیاں سن۔ اک چر پٹھ تہ ماہری اُتّاں نے مُہویں نی
ہے۔ دُوئی نا پتہ کُن دیسی.....؟



کریک ڈاؤن

اوہ بڑی ہی سونہی بستی سی۔ ابھی بستی جے دُنیا بچ شاید ابھی کوئی مثال ہووے،
خاص کری موسم بہار۔ لوہ ہونیاں کُلوے نے مٹھے مٹھے بول نکیاں بڑیاں نی نیر کھسی
لینے۔ چڑیاں، کاگ، کبوتر، آئلیاں بچوں باہر اڈری آوے پھیری مٹھی مٹھی ہواتہ اس
ہواؤ نال ناچ کرنے چڑیاں کا گاں نے بول۔ ادھر باولیاں تہ ڈبوریاں پُر کدے
کڑیاں نے آپسی گوشے تہ کدے گبرواں نے کھڑ کھڑ ہاسے۔ ادھر باوے صدمے
نی لمبی کھنگ۔ جے کدے کھنگار پھسی گیا تہ باوا ٹلی ہوئی جاسی۔ ماسی بیگاں نے چلے
نے پھیری لوکاں نی پھیر۔ چچے تہ پیالیاں ناں کھڑ کار۔ دُلی خان نے الگو جے نیاں
اُچیاں، لمیاں تہ مٹھیاں سُراں اس بستی نی رونق سن۔

میں ایہہ ساری کچھ پھلتی جاساں۔ پر عبدل پہنائی نے داندانے گلے بچ چمکنی
مہیل تہ اس مہیل نی چھنکار۔ جے ستیاں وی یاد آئی جائے، ترس کھائی اٹھنایاں، سونا،
بانکا، عبدل، عبدل نے تیلے تیلے داند اٹھ گٹھاں اُچے، گنڈے سنگھ، لپے بچ جدوں وی
داندانے دڑائی ہوئی عبدل نے داند جتی جانے عبدل تہ عبدل نے داند سارے گراں
بچ مشہور سن تہ فراک دن کے ہويا۔ کے میہ ہويا۔ اُس گراں بچ چر تکر لوہ میہ ہوئی۔

لگو نیہہ بولیا..... لوک نیندروں نیہہ جاگے، باندے صدے نے گلے بچ کھنگ پھسی گئی۔
ماسی بیگاں ناچلہا ٹھنڈا ہوئی گیا۔ دروازے نیہہ کھلے، کھڑکیاں نیہہ کھلیاں، دُٹی خان
نے الگو جے نیاں سُراں ڈونگے سمندراں بچ ڈُبی گئیاں، بمب، گولیاں، نے گنکار ساری
بستی کی چُپ کرائی گئے۔

زندگی بچ پہلی واری عبدل دروازے پر آنی کھلوئی گیا۔ اُسناں اکھیاں بچوں
تیلے داندناں نی شکل غیب ہوئی گئی۔ کناں بچوں مہیلاں نی چھکار مکی گئی۔ اوہ کھلو تے تکنا
رہیا، اُسے اوٹھاں ہروں گلاں غیب ہوئی مہیلاں، اُسے ہتھ پیر جام ہوئی گئے، اُسکی
اسطراں لگا جے آج اوہ ننگا ہوئی گیا ہے۔ اُسنی جوانی نے ٹال، مکی گئے۔ تیلے داندناں نی
دوڑائی کیہڑا کرسی۔ ایہہ سوچنیاں سوچنیاں تڑکری نہیں گئی تہہ فر۔

اوہ اجاں وی باہر جانے نی ضد بچ سا۔ پر آج اُسے چاھڑے کیہڑا چڑھیا، اُس
کس نال بُرائی کیتی ہے۔ اوہ کس نے لپے بچ نیہہ گیا۔ اچن چیت اُس نی گردن بچ
گُرول پئی گے۔ اُسناں اکھیاں بچوں لہونیاں مھٹکیاں مھٹن لکیاں۔ آج اوہ کھلا ہوئی
گیا۔ آج اوہ شرمندہ سا۔ اُسناں اکھیاں بچ دُور سڑک نے منڈ تکر ہر چیزنگی ہوئی گئی۔
اوہ فردروٹن لگا سی۔ اوہ فرنگا ہوئی گیا سی۔ اُسکی اسطراں لگنا سی جے اوہ اجاں وی دوڑنا
ہے تہہ اُسے مگر اک لشکر ہے۔ نامرادیاں تہہ نا اُمیدیاں نا لشکر۔ عبدل فر کھلوئی گیا، ہن تہہ
اُسے سارے وجود بچ گُرول پین لکے سن۔ اوہ مُڑی مُڑی پیچھے کچھ تکنا سی مگر اُسناں
گٹیاں بچ اک ترش آلے نی رسی بدھی نی سی۔

میں عبدل ہاں..... عبدل..... ماہڑا..... اوہ بوٹے نی بکھی نال نا چھپر ہے، اُس
چھپرے نے اندر ماہڑی بدھی اماں نیاں پیڑاں دفن ہن۔ ایو نیہہ بلکن چواں پہناں نا
سہاگ تہہ بیمار بیوی نیاں حسرتاں ناوی اک سمندر ہے۔

اپنا ناں اک واری فردا ہس۔

ماہڑا ناں عبدل ہے..... عبدل..... جیہڑا اس گراں بچ تیلے دانداس فی دڑائی کرنا
سی میں اک ایچے چھیر بچ رہنایاں حسنیاں کنداں پُر دکھا درداں فی مٹی نالیپ ہے تہ
جس فی چھت آسمان نال جُوی فی ہے۔

”تیرے کُہر آج کریک ڈاؤن ہے..... پوری بستی بچ کریک ڈاؤن ہے“.....
ماہڑے کُہر تہ اُس دن کریک ڈاؤن لگا سی جدوں ماہڑا ابامری گیا سی تہ اُس تھیں بعد
ایہہ کریک ڈاؤن آج تکر اس کُہرے بچ آباد ہے۔ مہنگھے نا، عزت نا کریک ڈاؤن۔
اچھا..... اٹھ..... دروڑ..... اُس منہڈارے تکر دروڑ..... پیچھے مڑی نہ تکیاں
..... جلدی جلدی دروڑ..... ایہہ دروڑ تہواڑی اخیری دروڑ ہے..... جلدی کر..... جلدی
دروڑ..... فراک ٹھاہ ہوئی..... اک لہونی فوار بھٹی..... عبدل فی گردن بچ اکڑا گول پیا۔
اوہ اپنا گوجا تلوسن لگا۔ اُسے ہتھے بچ اک کاغذ آیا..... اک لمی ساس ماری اوہ چپ ہوئی
گیا ریشماں فی دوائی دارو کیہڑا کرسی۔



دروازہ

زُئی پُر اوکرنے ستاریاں کی اسطراں تروڑ مروڑ کرنا سی جے ہُن ریزہ ریزہ کری
چھوڑ سی۔ پر جَد وں اچانک اُسُنیاں پیراں بچوں آتش فشاں مھٹن لگے تہ اوہ بے سمت
لمکن لگا۔ دوڑن لگا۔ پچھتے دُردُرتوڑیں رستیاں نی چھاتیاں پُر شیشیاں نے خنجر دینا گیا۔
پتہ نیہہ ایہہ اوہ کیاں کرنا سی۔

دیہہ نے لستے وجود بچ اک زوردار دھماکہ اک واری فر ہو یا۔ اسطراں لگنا سی
جے اُج فر کسے ڈوہنگی ڈاب بچ ڈُئی جاسی۔ اک واری فر ہنیریاں نا جھگٹھا اس دُنیا پُر
وار کرسی۔

ذَرّے ذَرّے کی اپنیاں خوفناک بچیاں بچ لئی مروڑ دیسی۔ دروازے اپنے
آپ گھٹی جاسن..... معصوم رستیاں پُر مجبور قدماں نی چھنکار ہو سی۔ کائنات نے کیلجے بچ
مُھر یاں چلسن۔ لہونیاں نہراں مھٹسن۔ چو فیری شُرکاں گنکیاں ہوئی جاسن۔ آسمان
تروڑ ہا سے بے جان ہوئی جاسن۔ اُٹھاں پُروں بس دو چار بول کھسکی تہ نامرادی نی
دل دل بچ ڈُئی جاسن۔ دروازے فر بند ہوئی جاسن۔

ماہڑے دروازے اُگے ننگا مُنگا چھاتی پُر نواں نال کر ہیڑے بے شمار زخم
اُکھیاں پُر چو فیری کالے کڑے ہتھّاں پیراں بچ کمئی مُنہواں پُر بے آسی نے پیلے
جنگل اُوٹھاں پُر بے مطلب لفظاں ناٹھیر..... پتہ نیہہ کدوں پُر وں اپنے آپ نال
جنگ کرنا اتھ آئی پہنچا ہے۔ پتہ نیہہ ایہہ ہے کیہڑا.....؟

ماہڑا دروازہ کدوں پُر وں بند ہے۔ ماہڑے اندراک میں نیہہ گجھ پُر انیاں
تصویراں ہین۔ ایہہ اُنہاں لوکاں نیاں تصویراں ہین جہاں نے مُنہویں پُر خوفناک
زاویے ماضی نیاں جنگی علامتی بنی گئے ہین تہ اوہ.....!

ایہہ کُہر جدّ وں بنیاسی۔ ماہڑے دادے بلیں جے مکی اندر تھگی باہروں دروازہ
بند کری چھوڑیاسی۔ دروازے نے باہر لوہے نیاں موٹیاں موٹیاں سچّاں لائی گیا سی۔
اندراک لفافہ تہ اک کاغذ چھوڑی آپوں پتہ نیہہ کیہڑے پاسے ٹری گیا سی۔ اس کاغذ پُر
کالے تہ پیلے حرفاں ناٹھیر ہے تہ ایہہ ٹھیر ہمیشہ ڈراؤنیاں اُکھیاں نال ماہڑے واخ تکنا
رہنا ہے۔ اس نے ڈرے مارے میں کندھے نال چھڑی جانا یاں۔ اک آس دل بچ
پہنکھنی وُنی ہے ”دورازہ کدوں کھلسی.....!“

بچّاں ہوئیاں نہ دروازہ کھلنا ہے تہ نہ اندر ناٹھیر امکنا ہے۔ ماہڑیاں اُکھیاں
ماہڑے ہتھ پیر..... اک اک انگ ماہڑے نالوں بکھ ہونے جانے ہین۔ ہنیریاں تہ
سویریاں نی ایہہ پاگل جنگ ماہڑے اندر روز ہونی ہے۔ فر گجھ گلاں نے بول اس
کال کوٹھڑی نیاں بڈھیاں کندھاں بچ دفن ہوئی جانے ہین۔ ہائے افسوس ماہڑا
کے ہوسی.....؟

ایہہ اُس دن نی گل ہے جدّ وں احساس نی کوکھ پھٹّی سی تہ دو حرف نامُرا دی نی
چھاتی بچ پھسّم ہوئی گئے سن۔ دروازہ..... سچّاں..... تروڑی مروڑی فر اُس وار کیتا

سی۔ ماہڑے اندر پہنچل پھٹا سی۔ اکھیاں تاڑے لگی گئیاں سن۔ ہتھ پیر ٹھنڈے ہوئی گئے سن۔ یاداں نیاں فصلاں پکن لکیاں سن۔

”اک واری فر شپے اگے کھلائی آپوں ٹری گیا ہے۔ اندر کسٹراں آیا.....
 دروازہ کسٹراں کھلیا..... سپنہ کس ٹھپیا..... فر کدوں آوسی..... دروازہ کدوں کھلسی
 میں تہ فر ڈپکساں..... شپہ روز تکساں..... جے فر نہ آیا..... ربتا کے کرساں.....؟
 دروازہ ضرور کھلسی..... دادا فر مڑسی.....!“



اڈپکاں

زندگی بڑی پہیکھ تہ بلاھویاں نی بنی گئی ہے۔ سویریاں نی سُر تہ دیگر اں نا
 راگ راتاں نی چُپ، دناں نا رولاً ساون نا بدل ہر پاسے نا سبزہ، مٹھی مٹھی تہند،
 دریاواں نی سُوں سُوں ہاڑے نیاں تہنپاں تہ جیٹھے نے چھلے..... پتہ نیہہ کیہڑے پاسے
 ٹری گئے ہین۔ سارا کجھ کھروں بے کھر ہوئی گیا ہے۔ ایہہ دینہہ چڑھیا تہ اوہ چھکھڑ
 چھولا۔ بے خصماں پھانڈا پتہ نیہہ کیہڑے پاسوں ہٹو دیکری آئی جانا ہے۔ نہ موسماں
 بچ کوئی رنگ ہے نہ دلاں بچ کوئی چین۔ کائنات نا اک اک ذرہ محرومی نی ڈونگی ڈا بے
 بچ ڈبیا نا لھنا ہے۔ شہراں نا رولا تہ جنگلاں نی چُپ اک دُوے کی تکی تکی کجھ اندرو
 اندری رونے ہین۔ دواں نیاں بے چین اکھیاں ڈیلیاں تھیں باہر آئی گیاں ہین۔
 دواں نے اوٹھاں پُر لہو نیا پھٹیاں جی گیاں ہین۔ دواں نے مٹھیاں پُر بے شمار زخماں
 نے نشان دے ہین۔ سارا عالم چُپ ہے۔ بے بس ہے تہ شرمسار ہے۔ آج.....!
 آج سارے رسم و رواج بے رنگ لفافیاں بچ بند ہوئی گئے ہین۔ جہاں پُر کوئی
 وی اتہ پتہ نیہہ لکھیا نا۔ آج زمی اسمان نا رشتہ وی ختم ہونا دسنا ہے۔ سویریاں نے

ہنیریاں تہ ہنیریاں نے سویریاں نی مٹی پلپٹ کری چھوڑی ہے۔ حرص نیاں سُنڈ طرار
لہراں فطرت نے نظاریاں کی چٹی تہری چھوڑیا ہے۔ گناہ تہ ثواب خلط ملط ہوئی گئے
ہین۔ اک افراتفری ہے۔

”اُتا.....؟..... ماہڑا اُتا کشمیر وں کدوں آوسی؟ اُتاں..... ماہڑا اُتا.....!“

اُس نی طوطی آواز جد وں وی نازک اوٹھاں پُر پھٹتی۔ کائنات نے کلیجے پُر
مُھری لگی۔ لہو نے فوارے پُھٹے۔ عرش و فرش کیا۔ پر نیڑے تھیں کسے وی اُسنی گل نا
جواب نیہہ دتا..... اُسا اُتا کشمیر وں کدوں آوسی..... اُس نی ڈپک نا ویلا کدوں مگسی
..... کدوں اُسا بابل کھر آوسی..... کدوں اُس نی چھول ٹافیاں نال پھر سی..... کدوں
منہہ نال منہہ لاسی؟

حادثے انسان نی عقل تہ شکل بگاڑی چھوڑ نے ہین۔ جد وں جد وں وی اس
زُمی پُر حادثہ ہویا۔ غماں نے سُمند ریکساں تہ مجبوراں نے سینے اندروں پھٹنے رہے۔
معصوم تہ مظلوماں نے کھراں پُر بجلی چمکنی ریہی۔ آساں تہ امیدیاں نے چھپر سڑنے
رہے۔

کُجھ ہی دن ہوئے ماہڑے گماہنڈ نیلے نمبلوں بجلی کڑکی سارے ناسارا کھر سڑی
گیا۔ کالا سیاہ تھواں سارے گراں بچ کھنڈی گیا۔ سارے لوکاں نیاں اکھیاں
اتھرواں بچ ڈٹی گیاں۔ اللہ کے ہویا۔

ارشدا یہہ ساریاں گلاں سُنٹا رہیا۔ لوکاں نے اتھروں تکنا رہیا، پُر اُسکی ایہہ پتہ
نیہہ سی جے جد وں اُسے رونے نی باری آوسی۔ ایہہ سارے لوک ٹری گئے ہوسن۔ سارا
کُجھ پُہلٹی جاسن۔ سارے لوک اپنے اپنے کن کھٹی گوہجیاں بچ رکھسن۔ اکھیاں بند
کری حرص نی گنگنی سڑکا پُر دروڑسن۔

اُج پہلی واری ارشد چہمے بچ جا گیا۔ اُدھر کڈا بانگ دتی اُدھر اُسُنیاں اوٹھاں پُر
اک مٹھا پر زخمی بول کھسکی تہو ائی بنی گیا۔ ”اُمّاں..... لوہ تہ ہوئی گئی ہے۔ اُج ماہڑا
اُبا آوسی۔ سارے لوک کشمیر وں مڑی آئے ہین۔ اُمّاں..... منجیاں.....
کھوڑے..... پہاروں..... سارے آئے گئے ہین۔ اُمّاں چٹاں کھوڑاوی
مڑی آیا ہے۔ اُمّاں اُبا کدوں آوسی..... ٹافیاں کیہڑا دیسی.....؟



فرق کیہڑی گل ناہے؟

چچی گوری گندل جی..... بس اڈے ہر ادھر ادھر بھرنی، اس طراں لگنا جے
 کوئی رنگ رنگ پلاسپ پسلیٹے مارنا..... نیہہ..... نیہہ..... ایہہ پتہ لگنا جے
 اکھیاں وی کوئی فیصلہ کرن تھیں قاصر سن۔ تکدیاں تکدیاں گئی گئی جانی..... فر لہیہنی
 فر اڈے ہوئی جانی۔ ماہرپاں ہتھیاں پیراں بچوں اگی نے سرا کے نکلی
 جانے۔ اڈھاں پُر گلاں نے دھبکار بھٹی بھٹی جانے۔ آکھاں تہ کے آکھاں
 تگاں تہ کے تگاں۔ دل نی تہو کن کیہڑا مسمی۔

ہائے افسوس میں کیہڑی کمی اگے لگیاں۔ ہے تہ اک گڑی ہے نا پری تہ نیہہ
 نیہہ..... نیہہ..... ایہہ پری ہے۔ پری میں وی آج توڑیں اس
 طراں نی گڑی نیہہ تکی..... اگر تکی وی ہو سی پر اسطراں نی ٹیالی چال والی نیہہ تکی
 ٹک..... ٹک..... اُچی اڈی والی چلی نارولا اُس نی مست ٹورنچ
 ستاں سُراں کی آباد کرنی سی۔ ہائے اللہ اس شہرنچ ہو ردی اس طراں نے پکھنو ہوسن۔
 ماہڑے آلے دوالے وی تہ بہتیریاں رنگ برنگیاں چڑیاں اڈرنیاں رہنیاں ہین پر.....
 ایہہ تہ کچھ ہو رانی تماشا ہے۔

چلو.....چلو.....میں مجھے مڑی تکیا.....کنڈیکٹر ہتھ نال اشارہ
 کیتا.....بیٹھو.....بیٹھو.....گڈی چل پئی اے اپنی اپنی سپٹ پر بیٹھو۔
 میں اک واری فرادھر ادھر تکیا۔ ماہڑیاں اکھیاں بچ ہنیر ابھری گیا۔ چوڑی اڈری گئی۔
 گڈی زور نال کُک ماری۔ پہارے پہارے قدماں نال میں مجھ کھرے ہوئی گڈی
 والے پاسے ٹرن لگاں۔ ماہڑیاں اکھیاں ماہڑے تھیں اوہلے چوڑی کی اُدر نیاں تکیاں
 رہیاں۔

سارے لوک گڈی بچ بیٹی اپنے اپنے کُہراں نے نقشیاں بچ رنگ پھر نے
 رہے۔ اپنے اپنے بال بچے نال گلاں کرنے رہے۔ بڈھے پڑیاں نے ڈوہنگے سُوٹے
 مارنے گڈی بچ تھوئیں نے غبار چھوڑنے رہے۔ مگر میں.....میں اکھیاں میچی بس
 اڈے پُر کھلے نے اپنی اکھیاں نے اتھروں تہ اتھرواں بچ چکنے اُس نے مٹھے پُر
 بالاں نیاں تاراں گننے رہے۔ گڈی شُرک پُر دروڑنی ریٹی۔ ماہڑیاں آساں کی تر ہونی
 ریٹی۔ گڈی والے ماہڑا کوئی سرفہ نیہہ کیتا۔ شُرک پُروں اڈر نی دودڑ زور نال گڑا کا
 ماریا۔ گڈی اچین چت کھلوی گئی.....بس اِس تھیں اگے نیہہ.....شُرک
 خراب ہے.....سارے لوک گڈی بچوں باہر آئی گئے۔ ماہڑیاں اکھیاں شُرک کے
 نے کنڈے پُر آنساں پھرون لکیاں۔ سارے لوک ٹری گئے۔ میں دواں ہتھّاں سپنہ
 کہوئی اک پتھر نی پُلی سل پُر بیٹی گیاں.....اٹھاں پُر فر بول نچن لگے.....
 تُس.....تُس.....میں.....میں.....اٹھاں پُر گنکیاں گلاں
 کہنکارہ باہیا.....تُس.....میں.....ایہہ بیگ.....ایہہ تَساں نا
 بیگ میں چاہی لیاں.....لوک ٹری گئے ہین۔ دینہہ نیاں رِساں اپنا بوری بستر ا
 بٹھی لیا اے۔ ہنیرے اِس فی کاڑھ بچ ہین۔ ماہڑیاں بے سُریاں گلاں سُنی اُس نیاں

گول مٹول اکھیاں بچ حیا نے موتی چمکن لگے۔ اُس کی ماہڑے خلیے تھیں شاید خوف لگن لگا سی۔ اُس ماہڑے اوٹھاں پُر نکلیاں گلاں ناکھنکارہ سُنی لیا سی۔ اُس کی کُجھ شک ہوئی گیا سی..... اوہ ڈری گئی..... کھری تھپ بچ اُسکی سپت کندے چڑھی گئے۔ اوہ کمن لگی..... دریا کیہڑاٹپا سی..... کھر کدوں پچساں..... اس اُپر بندے نیاں حرکتاں تھیں پتہ لگنا ہے جے..... خُدا خیر کرے.....!

دپدی..... اُس چچھے مُڑی تکیا..... میں فر دپدی آکھیا..... دپدی..... اُٹھوچر ہوئی گیا..... میں تُساں نا بیگ چھنگساں..... میں تُساں کی دریا ٹپاساں۔ تُس..... اُٹھوچر ہوئی گیا..... دہنہہ ڈُبناجانا اے..... پنیڈا دُراے۔

ماہڑے اوٹھاں پُر کھلرے نے بولاں کی اُس کس طراں قبول کیا۔ اس گل نا می نہہ پتہ پراہہہ گلاں سُنی اوہ تاوولی تاوولی اُٹھی..... منہہ جوڑی بس اک گل کیتی..... بھیا..... بھیا..... اُس نے انہاں بولاں تھیں پتہ لگنا سی جے ایہہ بول بڑے زخمی بول ہن۔ اوہ کسے کی وی بھیا آکھنے واسطے تیار نہہ۔ پتہ نہہ کیاں بھیا نا بول اُسے سنگھبے بچوں اڑکی اڑکی نکلنا سی۔ ماہڑے خلیے تھیں آجاں وی اوہ خوفزدہ سی۔

خُدا ناٹھلر ماہڑے اوٹھاں پُر وں گنگے بول غیب ہوئی گئے۔ ہنٹھاں پیراں بچوں مہنٹنے آلی اُگی نے سراکے اُسے متھے پُر ششتر کاہنٹیاں بچ گم ہوئی گئے۔ اُس اک نیس بچ سو سو واری می بھیا آکھیا..... اُسناں اکھیاں بچوں حیا نیاں سجریاں سجریاں لہراں ماہڑے ہوش و حواس کی جان بخشی۔

بھیا چلو..... ماہڑے کھر توڑیں چلو..... اُس نے آکھے بچ عجیب

لڈت سی..... میں نیہہ سچھی سکیا۔ نیہہ..... دپدی..... نیہہ..... نیہہ..... نیہہ.....
جاؤ..... رَبت خیر رکھی فرِ مِلساں..... میں تُساں نابڑا پیر آں..... پیر.....
..... اُس اک نظر نال می فر تکیا۔ تکیاں تکیاں اوہلے ہوئی گئی۔

ٹھکراے امانت بچ خیانت نیہہ ہوئی۔ جے تہ ماہڑی نیت پُر اس سفر نادار و مدار
ہونا فر گجھ اُلٹ پلٹ سی..... پر اللہ کیتا خیر ہوئی گئی۔ کھر جائی گل کرسی.....
اُج اُس کی ضرور پتہ لگا ہوسی جے رشتے سچے ہوون تہ ہنیریاں بچ وی کوئی ڈر نیہہ۔

جی..... آہو..... میں کل شام ویلے آیا ساں..... خیر ہے نا.....
..... شاباش..... اوہ توں تہ ماہڑا نگ رکھیا..... ماہڑا ہی نیہہ بلکن پوری قوم نا
نگ رکھیا..... مگی اُو اُمید سی..... جس گڑی تو اہڑے نال کل سفر کیتا، اُس
ماہرے سامنے بڑا رویا۔ میں کے دہساں کتنا رویا..... روئی روئی اُسناں اکھیاں
سوتری گئیاں..... مگر میں..... میں تہ اُس نا بیگ چھنگی آندا..... اُس کی
دریاں پٹایا..... خیری نال کھر پچایا۔

نیہہ..... نیہہ..... اُس تیری کوئی شکایت نیہہ کیتی۔ اوہ جس گل کی روئی
سی، اوہ گل ای ہور اے۔ تہ اوہ کے گل اے؟..... گل بڑی اوکھی اے۔ اُس گل بچ
اک دلدوز کہانی آباد اے۔ اُس کہانی واسطے لفظاں کی بن باسی ملینا نا اے۔ میں وی اوہ
گل نیہہ اکھی سکناں..... کوئی وی نیہہ اکھی سکناں۔ دوستا..... اوہ گڑی نیہہ
کالج نی پروفیسر اے..... آکھنی سی جے جس ماہڑی جان بچائی، عزت بچائی.....
..... اوہ کیہڑا انسان اے؟ اسے جے انسان ذادے ماہڑے پیر نا قتل کیتا سی.....
..... اوہ کیہڑا سی؟..... ایہہ کیہڑا اے؟..... فرق کیہڑی گل نا اے.....؟



داغ

شاید کاگ بولیا سی۔ کاگ کالا شاہ کاگ..... کاگ نے بول.....
 بولاں بچ بُجھارتاں..... لوک آکھنے ہین جے کاگ سویرے بولے تہ خیر ہی خیر
 مزمان آنے ہین..... تہ..... جے کاگ شام ولے بولے.....!!
 کاگ شام ویلے بولیا سی۔ کاگ کالا شاہ کاگ۔ کاگ نے پھلے پھلے بول.....
 بولاں بچ بُجھارتاں..... گل گُجھ مندی لگنی ہے۔ پتہ نہیہ کے ہوسی۔ اللہ خیر
 کرے.....!!

کاگ بولی ٹری گیا۔ پر ساری رات اُسنی اکھیاں بچوں نیندرے نے ہو لے
ناچ نچنے رہے۔ سینی جانی ہے تہ کاگ نے بول..... بولاں بچ بچھارتاں اُس کی
سین نیہہ دینے۔ جے جاگنی ہے تہ کوٹھے نے اگل بگل کتیاں نیاں بے مہاریاں
کو نکاں اُس نے سپنے پُر ڈوہنگے پچھ مارنے ہین۔ ادھر راتی نا ڈوہنگا منیرا چو فیری
چھلیاں مارنا ہے۔ اس طراں لگنا ہے جے ہُن لوہ نیہہ ہون لگی۔ ہُن چو فیری ہنیریاں
باڑ لائی چھوڑی ہے۔ ہُن ماہڑیاں اندراں بچ اک ڈاب..... اک غماں نی ڈاب

.....ڈوہنگی..... بہوں ڈوہنگی ڈاب مُنہہ گاہڑی ماہڑے واخ تکی رہسی.....
کھورنی رہسی..... شاید اوہ اُس ویلے نی تاڑنچ جدوں اس ڈوہنگی غماں نی
 ڈاب بچوں اک ناگ..... اک زہریلا ناگ..... ستاں سراں والا ناگ نکلی
 آوی تہ فر..... فر کسے نی سگری جوانی پُر داغ لکسی۔ ایہجا داغ جس بچوں اگی نے
 سرا کے مھٹسن..... تھویں نے غبار اُڈرسن..... ہنیرے گڑا کے مارسن۔ لوک
 اپنے اپنے اندراں بچوں نکلی گئی سڑک پُر نسنے رہسن۔ اُج کس نی باری ہے.....
 کل کس نی باری سی..... فر کس نی باری..... اُس نا کے ہوسی۔ ہُن اُس نے
 سارے چلے وکیلے تھیں تھیر ہوئی جاسن..... سُن ہوئی جاسن..... بے مطلب
 ہوئی جاسن..... بے زبان ہوئی جاسن..... میہہ..... میہہ..... ہُن
 اک اگی ناہولہ مھٹسی..... تہ فر اس نیاں لہراں چو فیری کھنڈی جاسن۔
 دینہہ نیاں رسماں چُپ سن..... بالکل چُپ سن..... بے بس سن.....
آپ ماہرے کھلر نیاں جاتیاں سن۔

لوکو.....! اُج نی راتی نے ہنیریاں نامان نہ کریو..... اُج نی رات نا
 ہنیرا..... ڈوہنگا..... کالا شاہ ہنیرا..... تہ اس ہنیرے بچ کتیاں نیاں
 بے مہاریاں کو نکاں..... ساری ساری رات اک ساہ پُر بولنی مھنڈ..... پتہ
 نہہہ کے ہوسی..... انسانیت اک واری فر ہاری جاسی۔ سوچاں چورستیاں پُر کھلری
 کھلری جاسن۔ اکھیاں بچوں لہونیاں مٹھیاں مٹھلیاں کی بن باسی ملی جاسی۔
 اُٹھاں پُر گلاں..... گلاں نا انبار..... تہ انہاں گلاں کی مٹی نے اندروں
 پہنکھنے اگی نے ہو لے چوساں مارسن..... ناگ..... کالا شاہ ناگ.....
 ستاں سراں والا ناگ۔ کالی غماں نی ڈاب بچ چھلیاں ماری..... اک شکار باہسی

.....چپھ.....لٹی چپھ پلار نارہسی.....فر ڈنگ ماری.....فر غیب
 ہوئی جاسی.....“

گڈی.....گڈیاں.....موٹراں.....شڑک پُر گڈیاں ناشدکار
گڈیاں نی سواری.....کدے تہ دل نیاں خوشیاں کی لئی منزلاں توڑیں
 پہچانے ہین پر کدے کدے ایہہ گڈیاں.....کونکاں ماریاں.....شڑک نی
 چھاتی پُر رینگلیاں۔.....آساں.....دل نیاں سجریاں آساں کی بے نشان
 منزلاں توڑیں لئی جانیاں ہین جتھے دل نے ارمان پہلے پتراں نے موہنڈیاں پُر اُڑی
 کوہ قاف بھکی جانے ہین۔

اچن چت گڈی کھلوی گئی۔ کتیاں اک کھنکارہ باہیا۔ گڈی نے ربڑی
 پاویاں (پہیاں) کی اک زوردار کھسپٹ لگی۔ پاوے چپیں چپیں کرنے رہے۔ کالی
 ڈابے بچوں ستاں سِراں والا ناگ باہر نکلی آیا۔ اُس نیاں اکھیاں بچوں اگی نے
 پہا مہو مھٹن لگے۔ ستاں سِراں بچوں ست چپھاں پھڑکن لکیاں۔ اُس نے اک اک
 انگ پُر ڈوہنگے پچھ مارن لگے۔ سوچاں سکلیاں سمندر بچ ڈُبن لکیاں۔ آساں پاتال گم
 ہوئی گیاں۔ لہو نیاں سجریاں لال لال مھٹکیاں ہنیریاں نے منحوس منہ پُر کالچ ملنیاں
 رہیاں۔ کتے لگاتار پھونکنے رہے۔ کتیاں نیاں کونکاں چو فیری کھنڈ نیاں رہیاں۔
 ہنیرے آپ ماہرے شرمسار ہون لگے۔ گڈی بلیں بلیں چلنی رہی۔ گڈی نی چھولی
 بچ اگی نے ہولے مھٹنے رہے۔ گڈی نے ربڑی پاویاں اُج پہلی واری ڈوہنگی رگڑ
 کھاہی۔ گڈی کھلوی گئی۔ گڈی نے ربڑی پاویاں نی چپیں چپیں بدھنی رہی۔ ربڑی
 پاویاں تہرتی ماں نال بڑیاں گلاں کیتیاں.....بڑیاں حسرتاں کھاہدیاں.....
 بڑے دکھ پھرو لے۔ اُج نی اِس نی کالی گھپ ہنیری راتی بچ کے ہو یا.....کتیاں

اک لمی کوک ماری۔ پاوے فر سر کن لگے..... فر کھلوی گئے..... فر چیں
چیں کرنے رہے۔ آج انہاں کی اپنی بے بسی نا پورا اندازہ ہو یاسی۔ آج انہاں فی
حُرمَت پُر کا لاشاہ داغ لگاسی۔ کتیاں نیاں بے مہار کو نکاں نال ستاں سراں والا ناگ
پسلہٹ ماری غیب ہوئی گیاسی۔

توبہ..... توبہ..... اس شہر نے گئے..... انہاں کتیاں نیاں بے
مہار کو نکاں..... انہاں کو نکاں بچ ڈنیاں تر نیاں آساں۔ اُس فی سحری جوانی
نے اُچے اُچے خاباں نے مینار..... اُس نے اوٹھاں نے مٹیا لے گیت.....
کتیاں بچ مٹھیاں مٹھیاں سُراں..... ہتھیاں بچ مہندی تہ پیراں نیاں چہا نجر اں
فی چھنکار..... آج اُس نے کھر پُر ڈاکہ لاسی..... بجلی کڑکی سی..... اگی نے
پہا مڑاں اُس نے بڈھے ماء پیو کی ساڑی سچی کری چھوڑیا۔

آ..... بچہ..... آ..... نیلو فر تہ آسیہ وی اتھے ہین..... آ.....
..... ماہری چھولی بچ آ..... ماہرے واسطے ایہہ کوئی نویں گل نہیہ۔ آ کھنے ہین ”بلی
سینہہ پڑھایا مڑ بلی کی کھان آیا“۔ ماہرا تو اہڑا رشتہ ادھر آدم تھیں ہے۔ تگی وی ماء
آ کھنے ہین تہ مگی وی ماء آ کھنے ہین..... آ..... آ..... ناہری چھولی بچ
آ.....!

سَت منہواں ناگ ساری راتی ڈاب بچ پسلیٹے مارنا رہیا۔ فر پاتال ہوئی گیا۔
لوک سَپ دھپ بکنے رہے۔ ساریاں نیاں اوٹھاں پُر اک گنگا سوال..... اک
لہجہ سوال جس نے حرفاں نے جوڑاں بچ تھکھنے درداں نیاں لہراں..... لہراں نال
بگنے سحرے اتھرواں فی چھم چھم..... ڈبی ڈبی جانے یاداں نے گلچے..... گلی گلی
جانے سُچیاں سوچاں نے موتی..... ربڑی پاواں فی چیں چیں، گھپ ہنیریاں

نال کلاوے ماری آسمان وراڈری گئے۔ اُس نے اوتھاں پُرگلاں نے دروازے بند ہوئی
گئے۔ راتی ناہمیر اکتیاں نیاں بے مہاریاں گونگاں نال پتہ نہیہ کیہڑے پاسے ٹری
گئے۔

ذراتکو لوہ ہوئی ہے۔ لوہ تہ ہوسی پر اُس نا کے ہوسی جس نے متھے پُر راتی نے
ہمیریاں اک ڈوہنگ داغ لایا سی..... داغ.....!!
لوکو.....! لوہ ہوئی ہے..... اٹھو..... اپنے کھراں بچ کھراں
نیاں کندھاں پُر تہ اپنے بیڑے بچ تلو..... اُس نے متھے نا داغ..... داغ
نی سیاہی ہُن چو فیری کھنڈ رسی..... چو فیری جنڈ بوٹا.....!!!



رام سنگھ

ماہڑاناں رام سنگھ نیہہ ہے۔ توں می کہڑی کہڑی رام سنگھ کیاں آکھنا۔ میں تگی
 کتنی واری آکھیا جے ماہڑاناں رام سنگھ نیہہ ہے..... نیہہ ہے..... بالکل نیہہ
 ہے..... اُس نے آکھے پنج بڑی تختی سی..... روسی..... اسطراں لگنا سی جے
 اُس نے اُتھاں پُر لاوہ پھٹا ہے۔ ہُن اُج تھیں بعد می رام سنگھ نہ آکھیاں۔ اگر اک
 واری توں فر آکھیا، کلیجہ کدھی آنساں تیرا مندا حال کرساں۔ اُس اپنے اُٹھاں کی زور
 نال مروڑیا۔ دواں ہتھناں نیاں انگلیاں تہ انگلیاں نیاں چنچاں پنج سیک پھٹن لگا۔ زور
 زور نال دند رکن لگا۔ جے اک واری فرمی کسے رام سنگھ آکھیا..... سنگھ کہوٹی
 چھوڑساں..... چپھہ کئی چھوڑساں..... ناں لین جوگا رکھن نیہہ لگا.....!
 رام سنگھ نے اُتھاں پُر گلاں ناں دریا بکنا رہیا۔ اس طراں لگنا سی جے اُج اُس نے
 اندورں گلاں ناں سیلاب پھٹی جاسی۔ اوہ گلاں جہاں کی اُس ٹھنڈی ٹھار برفونی سِلے پٹھ
 دئی رکھیا ناسی۔ رام سنگھ نیاں لال لال بلنیاں آکھیاں پنج اُج اوہ گل نیہہ سی۔ اُج اُس نیاں
 آکھیاں پنج اُتھرو سُن..... اُتھرو..... اُج اُس نا اکھڑ جسم گلی گیا ناسی۔ دوئے ہتھ
 پیر لمیاری کنڈے نال ٹیک لائی اوہ چپ ہوئی گیا سی۔ نیہہ..... نیہہ..... میں رام سنگھ
 نیہہ آں..... میں رام سنگھ نیہہ آں..... لوکومی رام سنگھ نہ آکھو.....!!

”اگر توں رام سنگھ میہ ہیں تہ فر تیراناں کے ہے؟“

رام سنگھ اکھیاں کھولی چو فیری تکیا۔ اک سوال..... شاید کوٹھے نیاں
کندھاں بچوں پھٹا سی۔ سدھا اُس نے کٹاں نال چڑی گیا سی۔ سپنے بچوں اگی نے
البع اٹھن لگے سن۔ سپنے پڑوں ساریاں لکھتاں باہر نکلی اُسے اوٹھاں پڑمکی گیاں
سن۔ اوہ ساریاں لکھتاں جیہڑیاں اُس سامی سامی رکھیاں سن۔ اوہ لکھتاں جیہڑیاں
سیاہی نال تہ میہ لہوناں لکھی لکھی رکھیاں سن..... لکھتاں..... روز اول نیاں لکھتاں
..... ماہری اُمتاں نیاں لکھتاں..... ماہری باجی نیاں لکھتاں..... لکھتاں..... بلا
عنوان لکھتاں..... شہر نے کالے بزار نیاں لکھتاں..... سیٹھ نیاں لذتاں نیاں
لکھتاں..... حریص انسان نیاں لکھتاں..... بس لکھتاں ہی لکھتاں.....!!

کیشو..... اُج توں ماہرے سپنے اُپر ڈوہنگا پچھ ماریا ہے۔ ایہہ توں کے کیتا۔
ایہہ توں کے پچھیا..... جے پڑھنا لکھنا آونا ہے ای تہ پڑھ ماہریاں لکھتاں۔ ماہرے
مٹھے نیاں لکھتاں..... ماہرے اوٹھاں پڑوں لکھتاں نیاں لکھتاں۔

کیشو ماہری اُمتاں ماہراناں بڑے چاہ نال رام سنگھ رکھیا سی۔ بڑیاں آساں تہ
اُمیداں نال رکھیا سی۔ سوچی سمجھی رکھیا سی..... یا..... می میہ پتہ پر ماہراناں رام سنگھ رکھی
بعد بچ اُس بڑا پچھتایا سی۔ اک دن..... فر اُس تھیں بعد اُس می رام سنگھ میہ
آکھیا۔ اُس نے سپنے بچ رام سنگھ نے الفاظ تڑفنے چھڑکنے رہے پراوٹھاں پڑ کسے جندرا
لائی چھوڑیا سی۔ ماہری اُمتاں..... ستیاں جاگنیاں..... رُنیاں پھر نیاں..... گل گل
نال ماہراناں لینے والی..... سو سو واری ناں لینے والی..... ساری ساری رات مٹھے مٹھے
گپت بولنی۔ انہاں گپتاں نے بولاں بچ ماہراناں کہڑی کہڑی لینی۔ آپ ماہرے
ہنسی۔ آپ ماہرے چپ ہوئی جانی..... ہائے افسوس تہ اُس تھیں بعد..... جدوں دیہہ

نیاں بے بیتیاں لہراں دُبنیاں ترنیاں رہیاں جدوں حرص نیاں نامُراد بیلاں
 منڈھیریاں اُپر چڑھن لکیاں جدوں پہنکھ ناں پہنکھنا تندور اُس نے اندروں
 پُھٹا بس اُس دن سیٹھ نیاں حرص پُہریاں اکھیاں اُس نی چٹی چادرے پُداغ
 لایا۔ ابھجا داغ لایا جے ماہری اتناں ماہرے کولوں ہنٹی دُور کھلوی گئی۔ ماہریاں اکھیاں
 تھیں اوہلے ہوئی گئی۔ اُس پہنکھنے تندورے بچ تہ چھال ماری سی پر اُس نیاں اُٹھاں
 پروں رام سنگھ نے بول غیب ہوئی گئے سن۔ سیل پتھر ہوئی گئے سن۔ فر اُس تھیں بعد
 نہ اُس می رام سنگھ کری بلایا نہ اپنی چھاتی بچوں بکنا دودھی پلایا۔ اُس کی اس گل نی
 برابر خبر ہوئی گئی سی جے اُس نے لال لال لہو نیاں لہراں بچ سیٹھ نیاں حر یص لڈتاں
 آباد ہین۔ ہائے افسوس جے تھوڑے پُصبر کیتا ہونا !!

کیشو جے گل اتھے ہی مکی جانی تاں وی خیر وی پر آنے والی اک اک
 کھڑی واسطے ڈوہنگیاں پڑاں لئی ماہرے دروازے کی ٹھکوری ریہی۔ ماہرے متھے پُ
 غریبی نے چار لفظاں کی پڑھی شہر گراں نے لوک نفرت کرنے رہے۔ ماہرے اک اک
 ساہ بچ نفرت نیاں پڑنگاں لارے کھانیاں رہیاں۔ میں کسے نال مندہ نیہہ کیتا
 میں تہ رام سنگھ ساں رام سنگھ نفرت کیتی عداوت کیتی ضد کیتی نیہہ
 نیہہ فر میں رام سنگھ وی نیہہ ساں فر ماہری اتناں می رام سنگھ آکھنا چھوڑی دتا
 سی۔ لوکاں وی رام سنگھ آکھنا چھوڑی دتا سی مگر نفرت نفرت نفرت نے
 پہاڑ ماہرے سر اُپر آباد رہے۔

کیشو گل اتھے ہی ختم نیہہ ہونی اگے سُن میں اُس دن اُس کھڑی
 اُس لہولہان آ لے کی کس طراں اپنے سپنے بچوں کڈھاں جدوں ماہری باجی
 لاڈلی پیاری باجی جس نے اُٹھاں پُٹھے بول تہ بولاں نیاں سجریاں سُراں

آج وی ماہرے اندر آباد ہین جیہڑی مُنہ تھوئی آلے مارنی سی لاڈلے بولاں نال رام
سنگھ آکھنی سی جس نیاں اکھیاں بچے موتی بسے سن..... کیشو..... اوہ ماہری باجی.....

اوہ.....!!

رام سنگھ ناساۂ بہوں پہنارا ہوئی گیا سی۔ گل پہناری ہوئی گئی سی۔ اوہ فر زور زور
نال دند رکن لگا سی۔ ہتھ مروڑن لگا سی۔ اُس نیاں اکھیاں بچے اُس خوفناک آلے نا
دروازہ کھلی گیا سی جس اُس نے اندر اک سیک لایا نا سی..... کیشو..... اُس ہنیری
رات بچے تارے ڈُٹی گئے سن..... جن ڈُٹی گیا سی..... چو فیر چنگھڑ پھانڈ اتہ ڈنڈول سی۔
لوفر منڈیاں نے ہتھاں بچے ماہری باجی..... ماہری سوہنی موہنی باجی کھیل تماشہ بنی گئی
سی۔ اُس زور زور نال می آلے مارے سن۔ اُس نے آلے ماہری بے بسی نی کال کوٹھری
بچے ڈُٹی گئے سن۔ اوہ آلے تہ انہاں آلیاں ناسیک..... کیشو فر اُس تھیں بعد..... کے
کے ہويا..... کیاں ہويا..... کدوں ہويا..... ماہرے ہتھ پیر..... ماہریاں اکھیاں.....
ماہرے اوٹھ تہ اوٹھاں اندر چچلے دند..... سیٹھ نیاں لذتاں..... تھیں لئی باجی نے
آہلنیاں توڑیں ماہرے اندر قید ہوئی گیاں۔

کیشو..... کل پھانسی نا دِن ہے۔ کل ماہری کہانی ختم ہوئی جاسی..... پر انہاں نا
کے ہوئی..... انہاں کی کیہڑا پھانسی دیسی جہاں نے کالے کرتوتاں ناسیک چو فیری
کھنڈی گیانا ہے۔



تریاں

تاجہ نی پتھی، تاجہ نی غریبی تہ تاجہ نی محرومی نے سارے نقش، ساریاں عمارتاں تاجہ
 نے حُسن، تاجہ نی جوانی تہ تاجہ نے سچے سچے کرتوتاں بچ چھٹی گئے سن۔ گراں ناک اک
 گبرو تاجہ نی اس گل تھیں نہایت مُناثری۔ غریب تھیں لئی امیر توڑیں ہر گبرو تاجہ نال بیاہ
 کرنے ناشوق رکھنا سن۔ تاجہ نے بیاہ نیاں گلاں گراں نے گبرواں نیاں چپھاں پُر
 ڈھیر الایا ناسی۔ پر..... اپر غریبی نال کدوں سودا کرنے ہین تہ غریب پتھی کی بہانہ
 بنانے رہے سن۔ اسطراں تاجہ نے بیاہ نے گپتاں بچ آجاں سرنا نیاں سُراں مہندی تہ
 ڈولی نیاں سُراں..... تاجہ نے بیڑے بچ کھلوی بے آسی نے یوٹیاں پُر سن۔ بلیں
 بلیں نابیانے نے بہانے گراں نے پنگے پنگے پُر آباد ہون لگے سن۔ تاجہ کچھ گھری
 ہے..... تاجہ نے متھے بچ ناگنی ہے..... تاجہ گوری ہے پر تاجہ نے لیکھ.....
 لیکھاں بچ تریاں.....!

وقت نیاں پپنگاں پُر تاجہ نی البیلی زندگی لارے کھانی ریٹی۔ رات نے
 ہنیریاں بچ کندھاں نے پھراں نال گلاں کرنی ریٹی۔ سوٹھے کرنی ریٹی۔ لوہ ہونیاں
 روزگار نے چلے ہاڑے کرنی۔ تاجہ نابیاہ آج ہوسی..... کل ہوسی..... اس نال

ہوسی..... اُس نال ہوسی..... تاجہ ڈولی بچ بیسی..... عبدال مراسی ٹھول
 سرنائی..... خوب بحسن..... خوب پہا نگڑہ ہوسی..... تاجہ نے
 بیڑے بچ شوقی گبر و بگدر چھٹکسن..... پنی پگڑسن..... چھھی کرسن.....
 ٹھول اگے نحسن..... داج..... داج چاسن..... تاجہ انہاں غوطیاں نال
 کدرے ڈبئی..... کدرے ترنی..... کدرے رونی..... کدرے ہنسنی
 کھڑ کھڑ ہسنی..... چپ ہوئی جانی..... اپنے بے مہار اٹھاں پُر گلاں
 نے جوڑ جوڑنی۔

آخر جس گل ہوناسی ہوئی گئی۔ تاجہ نارشتہ شوکت نال طے ہوئی گیا۔ گنڈھاں
 پئی گئیاں۔ سارے گراں بچ گل کھنڈری گئی۔ گراں نے گبرواں نے منہواں بچ لیل
 سٹی گئی۔ سارے ٹھٹھن ٹھار ہوئی گئے۔ اک دُورے کی پچھن لگے۔ پُر چر کرن لگے ”او
 شوکت نال جگاڑ کسراں بنیا؟“..... مگر اک گل ہے شوکت تہ تاجہ کولوں دُور بڑا
 ہے۔ نہ عقل تہ نہ شکل..... جوڑ بچ کجور دِسن ہے۔ تاجہ نے رشتہ داراں کوئی ذات
 جماعت نہ تکی..... ہان جوڑ نہ تکی..... کھر باروی نہ تکی..... کم کاج
 وا کھوں شوکت نے لنگھ پہارے ہین..... زمی ڈوگی وا کھوں وی نقد ہے..... کے
 کما سی..... آپوں کما سی..... تاجہ کی کھلا سی..... کے کرسی..... !!

شوقن گڑیاں باولی نے پچھوالی تاجہ نامو جو کسئیاں گلاں کرنیاں..... گپت
 بولنیاں..... ٹپے بولنیاں..... بجھارتاں سٹنیاں..... محول کرنیاں.....
 سٹھنیاں مارنیاں..... ٹچکراں کرنیاں..... لاڈے نکلیاں نکلیاں چوٹیاں
 مارنیاں..... کدے مہراج نے گپت..... کدے ڈولی نے گپت..... تاجہ دہنہ
 دیگر باولی وا کھڑی آونی۔ گڑیاں نی اڈ پک بچ بیٹھی رہنی۔ گپتاں نیاں سُراں بچ ڈوہنگے

لارے کھانی۔ گُریاں نیاں ٹچکراں کی اپنے بولاں نال پھیرا دینی..... خوش ہونی
 کہڑے نال گلاں کرنی..... کہڑا بجانی..... رستیاں پُر گڑیاں کی لکئی
 لکئی تھنی..... گڑیاں آؤ سن گئیاں..... ماہڑے بیاہ نے گہت بوسن.....
 ماہڑے گہت بوسن..... ماہڑے ماہیے نے گہت بوسن.....!

وقت نیاں بے درد لہراں تلجہ نے اُن کہڑے خاباں تہ خیالاں نال کدے وی
 میل نیہہ کھادا۔ تلجہ خوبصورت سی۔ جوان سی۔ کروتوتاں والی سی پُرتھے بچ ناگنی ناناچ
 اُس کی گھری کھیہ نیہہ لگن دینا۔ جی سی تہ ماء مری گئی۔ جوان ہوئی تہ پیو مری گیا۔
 دُکھاں درداں چو فیری کہیر اباہیا۔ سماج نیاں رتگاں بچ چٹے لہو نیاں مٹھلیاں آباد ہون
 لکیاں۔ دہنہ نیاں رسماں تہ راتی نے ہنیریاں بچ..... گلاں..... گوشے
 ہون لگے۔

شوکت اپنی بٹھاری کی جٹی مٹی نال لمایا..... منڈھیرا نویں طراں باٹیا.....
 پھینے کی نویں مھٹے لائے..... روشن دان کی جالی لائی..... ٹانڈیاں نانواں
 دُبر لایا..... چلھا چو کھاسا می سوتی رکھیا۔ ہُن تہ تلجہ اس کہر نی مالکن ہوسی.....
 آپوں کون کسر کدھسی..... نویں تھیں نواں پہنا نڈا آنسی..... نویں بندری آنسی
 نویں کہڑے آنسی..... پہنا نڈیاں کی چھٹی اُپر رکھسی..... پر.....
 اُتّاں نے دا بے ناڈ ڈر کھیر کتھاں رکھساں..... شوکت سچے ہتھ نی انگلی دنداں پٹھ
 رکھی سوچنا رہیا..... سوچاں بچ تریڑاں پینیاں رہیاں پر.....!

بیاہ اپنیاں کچیاں پکیاں رسماں نال ہوئی گیا۔ تلجہ نی خوشی نے تہیاڑے بنجر
 زمین بچ آساں نے بوٹے پالن لگے۔ راشد ساجد ماجد واقع شوکت تہ تلجہ نیاں
 آساں وقت نیاں گنگیاں شردکاں پُر رواں دواں ہوئی گئیاں۔ اڈھی اڈھی راتی توڑیں

چرخہ پھیرنی..... اوُن کتنی..... اوُن تمنی..... گلاں کرنی..... شوکت
 کی نکلیاں نکلیاں گلاں دہسنی۔ بچیاں نیاں پڑھائی نیاں گلاں..... زمی ڈوگی
 نیاں گلاں کرنی..... پر..... تاجہ تہ شوکت نیاں انہاں گلاں کی راتی نے
 ہنیرے ہڑپ کری چھوڑنے۔ شاید انہاں کی پتہ نیہہ سی جے..... کے ہوسی.....
 کے نہ ہوسی۔ تاجہ نے متھے بچ ناگنی کدوں پلٹیں ماری۔ کدوں تاجہ نے بحرے
 خاباں بچ ڈوہنگا ڈنگ ماری..... زہر باہسی..... تاجہ نے بیڑے بچ مھلاں
 نے بوٹیاں کی کس کس نالہوگسی۔ مھلاں بچوں بچھوڑیاں نی باس مھٹسی.....
 مھلاں نے رنگ بے رنگ ہوئی جاسن..... شوکت نی ہناری کھنار بنی جاسی.....
 منڈ ہیرے نیاں تراڑاں فر کندھاں پُروں لمکی جاسن..... فر کندھاں پُرنپلا
 کہناہ جمسی..... فر اس کھنارے بچوں تہنخورے نے بوٹے جمسن..... فر
 انہاں بوٹیاں پُرمھل مھلسن..... فر انہاں مھلاں نی باس کھنڈری.....
 فر دہنہہ نیاں رساں تہ رات نے ہنیریاں بچ ہاسے مھٹسن..... گلاں ہوسن.....
 گوشے ہوسن۔

تکدیاں تکدیاں نپلے نملوں بچلیاں کڑکن لکیاں۔ بندوقاں گنگلیاں سُراں مھٹن
 لکیاں۔ افراتفری نے جنڈ پرتو ہٹا کے ٹہیریاں نال سودا بازی کرن لگے۔ آساں
 پُہریاں لاشاں بزاراں بچ یکن لکیاں۔ سحریاں جوانیاں نیاں بولیاں لگن لکیاں۔
 ماواں نیاں چھاتیاں بچوں لہونی فوار مھٹن لگی۔ اوٹھاں پُرتو نیاں نیاں کاٹگاں شوٹکن
 لکیاں۔ رات نے ہنیرے لہو چٹن لگے۔ دہنہہ نیاں رساں بے آبرو ہون لکیاں۔
 پُہنیں پُہرا چھڑن لگے۔ رشتیاں بچ پین لکیاں۔ دکھاں درداں نیاں نازک لہراں ہوا
 بچ ترن لکیاں۔ راشد..... ساجد..... ماجد..... باری باری بندوقاں نیاں

گنگلیاں سُراں کی اپنے سپنے بچ سمہالی اپنے بنجر بیڑے بچ آباد ہوئی گئے پر وامق.....
 ساریاں تھیں زنگا..... چھٹا تہ شودا..... انہاں گنگلیاں سُراں نے مگر مگر
 ٹہینا اٹھا..... پہنکھا پہنا..... پیراں زنگا دروڑنا رہیا..... انہاں
 کی پگڑنانے ہاڑے کرنا رہیا..... آلے ماری ماری چھنا رہیا..... تئساں نیٹیاں
 سُراں بچ کیہڑی گل چھٹی نی ہے جہاں نال ماہڑیاں پیراں سودا کیتا ہے.....
 وامق آج وی آلے مارنا ہے..... آج وی چھنا ہے..... پر ہُن تہ اُس نے
 آلیاں بچ ڈوہنگیاں تریڑاں پئی گیلیاں ہین..... ہُن اُس نے آلے کوئی میہ سُننا!
 تاجہ پیو کے کال کوٹھڑی بچ چھلے پندراں سالاں تھیں بند ہے۔ اپنے سپنے بچ
 گنگلیاں سُراں نال سلے نے زخماں نال گلاں کرنی..... منٹاں سکینڈاں بچ اُس
 نے اوٹھاں پُر کھمن کہیر گلاں نادریا بکن پینا۔ تاجہ پاگل ہوئی گئی ہے۔ تاجہ نے مٹھے بچ
 ناگنی ناناچ مکی گیا ہے۔ ہُن اُس نے مٹھے بچ ڈوہنگیاں تریڑاں پئی گیلیاں ہین۔
 کدے کدے انہاں تریڑاں چٹوں لہو نیٹیاں تندیریاں بھٹی اُسٹیاں آساں سمیت دُور
 بستی تھیں دُور کھنڈری جانیاں ہین تہ کدے کدے اُسے اوٹھاں پُر اک لُچی کوک ساری
 بستی نیٹیاں سوچاں بچ ڈوہنگا برچھا مارنی ہے۔ لوک چھٹ نی چھٹ جاگی جانے ہین
 لوک اپنے اپنے بیڑے بچ کھلوئی اُس کوک نا چھٹا کرنے ہین..... پر
 اچین چت جدوں انہاں نیٹیاں نظراں اپنے بیڑے بچ اُس کوک نی تلاش کرنے ہین
 تہ بیڑے بچ بشکاراک ڈوہنگی تریڑتلی چپ ہوئی جانے ہین۔ اسطراں لگنا ہے جے اس
 بستی بچ ہر بیڑے بچ اک تریڑ ہے تہ اس تریڑ کی کیہڑا بٹسی.....!!



میو نیپلٹی نی گڈی

دہنہہ اپنا منہہ کھولی اگی نے دریا کی اوٹھاں پُروں بگنے نارسہ دتا سی تہ آپوں
اک دیوانے نی طراں نا اُمیدیاں، محرومیاں نی دروٹی پُریاں کی رگڑنا رہیا۔ ساری
رات تہ ساری تہیڑی اُسے اندر ہولناکیاں نا پھانڈا تہ ڈنڈول ناچ نچنا رہیا۔ اُس ریتاں
بلدیاں اکھیاں بچ پتہ نیمہ کے تلاش سی تہ اوہ کبھڑے گپتاں نے بولاں بچ گم سم سا۔
چھیری اکھیاں پھیرنا..... چھیری آ لے مارنا..... ہتھ مارنا..... پیر مارنا
..... کنسولانا..... پر..... اک پاسے تھیں اک سیاہ کالی لکیر..... لکیر
نے لباس پُرا کالے داغ..... داغاں بچوں بگنے لہونے توپے..... توپیاں بچوں
پُھٹیاں آساں..... تہ آساں نے گھر اک بول..... اک زخمی بول.....
سہنہ پھٹا لنے والا بول.....!

ساری تہیاڑی شرو کے پُر ٹری ٹری اُسے پیراں بچ چھالے پٹی گئے سن تہ انہاں
چھالیاں بچوں مٹھا مٹھا در داندرو اندری تہکھنا دِسناسی۔ ایہہ بس اُس نے کھر نادر وازہ
..... دروازے نے جوڑے پٹ..... دروازے نی چیں چیں..... اک
نپس کھٹی جانی..... فر بند ہوئی جانا..... فر آونے نی اڈ پک..... فر
جانے نی اڈ پک تہ اس درمیان زمی اُپروں اڈرنیاں عیثاں تہ آساں..... آسان
پُر کھلری کھلری جانیاں..... ہنیریاں نال قلاوے ماریاں..... کدے
ہسنیاں..... کدے رونیاں..... اوہ دروازے ماہڑے روزگار نے دروازے
..... ماہڑے نفس نے دروازے..... دروازیوں نی چیں چیں..... جتھے
اندربڑنیاں ماہڑی روح تہ ماہڑے جسم کی بکھرے بکھرے رستیاں پُر ٹرنے نی سزانا حکم
ہوئی جانا..... جتھے ماہڑی لاش کی آدم زادیاں نے خونخوار ہتھ ادھروں اُدھر کھسپنے
تہ انہاں ہتھانیاں پوٹیاں بچوں سرکنے حرصے نے پہنا مڑساڑی بآلی رکھنے۔ جتھے
ماہڑی مجبوری نے پہلے بوٹیاں نے جاڑ بچ بچلیاں اک کہنکارہ بآلی لیاں..... فر
چھٹ نی چھٹ..... نپس نی نپس..... ساری کائنات کھلوئی جانی.....
گجھاں گلاں کی نکیل بآلی دفن کری چھوڑنی..... پھانڈا ڈنڈول ہسئی جانا.....
میں فر زندہ ہوئی جانی..... بس اُتھے.....!

ایہہ سوچنیاں سوچنیاں اسطراں لگنا جے ماہڑیاں سوچاں ریتو نے ٹہیر بچ ٹہیر
ہوئی جانیاں۔ جسم نے اک اک ہنگو بچ گول پٹی جانے۔ ماہڑیاں اکھیاں بچ گجھاں
دروازیاں نے نشاں نچن لگنے۔ پرہن..... ہن توقع کرنی فضول ہے۔ اوہ تہ اشماں
نے شکم پھٹنے نال زمی بچ تہرستی گئے ہن۔ زمی کدوں انہاں کی مڑنے نارستہ دیسی تہ
فر ماہڑا کے ہوسی؟..... ماہڑا پہاڑ کدوں اُلسی؟..... کدوں ختم ہوسی؟.....

انہاں ماہڑے نال وعدہ کیتا سی..... وعدہ.....!

وعدے کدوں پورے ہوئے۔ وعدے وعدے ہی رہی جانی ہین.....
 وعدے کرنے والیاں بس وعدے کیتے..... پورے کس کیتے..... البتہ میں اک
 کتاب بچ پڑھیا ہے جے کدے کدے اوہ ریتوں نے ٹھیر بچوں پھٹی باہر آئی جانی ہین
 فر ہنیریاں نال اک جنگ کرنے ہین..... فر دہنہہ نیاں لال لال
 رساں بچوں لہو نچوڑی شانت شانت موسم کی جی آیاں کی آکھنے ہین..... فر حرص
 نے بولاں کی بن باس دیٹی چھوڑنے ہین..... فر بند دروازے کھلی جانی ہین۔
 دروازیوں نی چہیں چہیں مگی جانی ہے۔ زمی تھیں آسمان توڑیں ہاسے لوکاں نے کھراں
 بچ آباد ہوئی جانی ہین۔ اُمیداں نے بوٹیاں پڑھٹھے میوے لوکاں نے ذائقے نا
 اسباب بنے ہین۔

”ٹھیک ہے“ فر بھئی جا..... اس سڑک نے کنڈے“..... اک بول
 اک نرم تہ مٹھا بول..... اُس نے کتاں نال لارے کھان لگنا۔
 سڑک..... کنڈیاں پہری سڑک..... جس نی چھاتی پڑ مسافراں نے
 پیراں کی ڈوہنگے کنڈیاں نے چڑ بے چٹنے ہین۔ جتھے اُوری نے جنڈ..... تہ جنڈاں
 پڑ کھمن کھیر نوک دار کنڈے..... آہاں..... اوئی سڑک..... ویران تہ
 پاگل سڑک..... گوگی تہ دوری سڑک..... دؤردؤر توڑیں کھلری نی بے مہاری
 سڑک..... شہر تھیں گراں توڑیں بگنی سڑک..... سڑک پڑ رینگنیاں موٹراں تہ
 کاراں.....!

تہ ماہڑا کے ہوسی.....؟..... ایہہ شہر نے بند دروازے..... انہاں
 دروازیوں بچوں سرکنے گلاں نے بول..... ماہڑے موہنڈھے پڑ لدنے سارے

شہرناپہار..... کے میں..... میں وی میونسپلٹی نی گڈی آں.....؟
 اک وار فر ماہرے اڈٹھاں پُرگلاں ناغبار پھٹنا ہے۔ اک واری فر کوئی ماہرے
 سپنے بچ ڈوہنگے چٹھ مارنا ہے..... اک واری فر اک سوال ماہری سوچ نی دروٹی پُر
 ریگنا ہے۔

تکلیاں تکلیاں اُس نے اس سوال کی اپنی حرصے نی چادر بچ باہی ڈگی بنائی، اوہ
 اُس نیاں اکھیاں تھیں اوہلے ہوئی جانا ہے۔

دو ردو توڑیں اُس نیاں اکھیاں بچ اک تلاش اُسے رستیاں کی آلے ماری ہے
 پر..... پر آج نی واری اُس کی اسطراں محسوس ہونا ہے جے شہر نے سارے
 دروازے گھٹی گئے ہین تہ اُس نی اڈپک بچ ہین..... ہُن شہرنا سارا پہار اُس نے
 موہنڈیاں پُر ہوسی..... اُسے اندر فر اک بول بے لباس ہوئی جانا ہے.....!
 ”کے میں میونسپلٹی نی گڈی آں.....؟“

اُجاں توڑیں اُس نے اندروں کمزور بولاں نے بول سڑنے اتھرواں نال بگنے
 رہے۔ اُجاں توڑیں کوئی وی شخص اُس واخ نیمہ سی تکنا۔ سارے لوک تیز قدماں نال اُس
 کولوں لنگھی جانے سن۔ پورے شہر بچ شور شرابہ سی۔ کاروباری قصے اُگ پھکنے سن۔ دُڈڑ
 آسمان اُڈرنی سی..... گڈیاں..... موٹراں..... سارا رستہ لٹی لیا سی.....
 پر میونسپلٹی نی گڈی..... اک پاسے..... دو راک پاسے کھلوٹی نی اڈپک
 بچ..... کس کس نی اڈپک سی..... یا..... بس اس اڈپک بچ جے رات
 ہووے..... رات نے ہنیرے جوان ہووَن..... رات نی چُپ نا سودا
 ہووے..... تہ سارے لوک..... اس شہر نے لوک..... اُچیاں اُچیاں
 چوباریاں بچ رہن والے لوک..... چھگی تہ چھو نیڑی بچ رہن آلے لوک.....

سارے لوک..... اپنے اپنے اندراں ناگند..... بلیں جے اِس بچ لڈی شوژن.....!
 لوک گڈی لدنہ رہے..... گڈی دُور..... شہر تھیں دُور.....
 ایہہ سارا گند سٹنی رہئی..... گلی کوچیاں ناگند..... بند دروازیاں ناگند.....
 پرہُن..... ہُن تہ گڈی نا انجر پنجر ختم ہوئی گیا ہے..... ہُن گڈی پُرتھوڑا گند
 لدنہ.....!

نیہہ..... نیہہ..... تُس اپنا گند لدنہ رہو..... لدنہ رہو.....
 تُساں نی شرم و حیا نے سارے حروفِ حصے نی بد بودار ڈا بے بچ ڈی گئے ہین.....
 بس ماہڑا پہنا راڈھا کرو..... ہُن اِس شہر بچ مچ ساریاں گڈیاں ہین.....!!



بسلوٹ

اُس نے جسم نے بے ترتیب ہنگو اماہڑیاں سوچاں کی چٹن لگے۔ ماہڑے اندر نکلے
نکلے چھٹکے ہون لگے۔ ایہہ کل نی گل ہے، اُس نے حُسن و جمال نے چرچے بہتیریاں
گلاں بچ آباد سن۔ گراں بچ مردوزن اُس نی خوبصورتی، اُس نے ڈول ڈال تھیں بڑے
ہی متاثر سن۔ لوکاں بیاں اکھیاں بچ اُس نے نین نقشِ اسطراں محفوظ سن جے لوکاں کی
ہور کوئی گل ہی نہیہ سی پتہ۔

بس اسے طراں ماہڑیاں اکھیاں وی جدوں اس گراں بچ قدرت نے نظاریاں
کی ٹھونڈن لکیاں تہ بس اُسکی تکی انکی گپیاں۔ فر کے سی جے اُجاں توڑیں اوہ سارے
نقش، اوہ ساریاں گلاں، اوہ سارے رستے، اوہ سارے ہاڑے، اوہ سارے چلے ماہڑیاں
رگاں بچ گردش کرنے لہو نے توپیاں بچ یاداں نے ڈاراں نے ڈار اُڈرنے ہین۔
لفظاں نی بنجر زمی بچ جمے..... سکے..... سڑنے..... فر ہرے ہوئی جانے
..... فر مھل مھلنے..... مھلنیاں مھلاں فی خوشبو ماہڑے اندروں بسنیاں

اوه برابر رونی رہی۔ رونیاں رونیاں اُسُنیاں اُکھیاں بچوں اُتھراواں ناسمندر گھُمن کُہنر لہراں نے شِرا کے..... بے بسی نے سمندری دریا تہ محرومی نے سمندری طوفان اُٹھنے رہے۔ خورے اُس نے اندراک ڈوہنگا چچھ لگاسی۔ اک بیہہ بلکہ بہتیرے چچھ لگے سن۔ اُس نی جُدا ئی نا چچھ سی یا ماہڑیاں یا داں نا چچھ..... رونے رونے اُسُنیاں اُٹھاں پُروں کُجھ گلاں نے بول وی بھٹنے سن۔ اوہ اپنے آپ کی اپنے وجود کی اپنیاں اُکھیاں کی ہتھّاں پیراں کی اک ترتیب دینے نی کوشش ضرور کرنی سی پر اُس انہونی اُگی نا پناہ مبرا اُس اُسکی بے بس کری رکھیا ناسی۔ اُج اُس نے اُٹھاں پُر آباد گلاں کی کوئی چور پئی گیا سی۔ اُج اُس نی چُپ کی کوئی لٹی لٹی گیا سی۔ اُج اُس نی آس نی

دُپری بچ ڈاکہ لگاسی۔ اُج اُس نی معتبر شخصیت شک نی دروٹی پُر پیر رگڑنی سی.....
ہتھ ملنی سی..... افسوس کرنی سی.....!

پہر نی موت نا ڈوہنگا پچھ اُس نے اندر کھنکارہ باہیا ناسی۔ اُس نے پیراں پٹھ
نی زمی کھسکی گئی نی سی۔ اُس نے سر اُپر آسمان نی پہلی چادر بچ سیاہ داغ لگے سن۔ اُس
نے آسرے کی پھانڈ اتہ ڈنڈول اڈاری لئی گیا سی۔ اُس نا پیر..... سوہنا تہ موہنا پیر
..... اُچا تہ لہتاں پیر..... سوہنے نین نقش والا..... عزت تہ احترام آلا
..... گل کرنا تہ موتی بنڈنا..... چُپ رہنا تہ درد بنڈنا..... پتلے اُٹھاں پُر
ہاسیاں کی بسانا..... چھڑے مٹھے پُر جی آیاں کی لکھیا نا..... سچ کسے آکھیا”
موت کسے ناوی مان نیہہ چھوڑنی“.....!!

اُدھراوہ برابر رونی ریہی..... ہدکنی ریہی..... اکھیاں ملنی ریہی.....
..... ہتھاں کی مروڑنی ریہی..... اُٹھاں کی دنداں بچ دبانی ریہی..... اُٹھاں
پُر وں چھ پھیرنی ریہی..... اندروں اُٹھے نے تھوہی کی اندر ہی دبانی ریہی.....
..... تہ ادھر..... ادھر ماہڑے اُٹھاں پُر وں ساریاں گلاں بے لباس ہوئی گئیاں۔
ماہڑے بول شرمندگی نی کالکھ بچ کالے ہوئی گئے۔ مدتاں بعد اُج اُس اک دُوے
نے روبرو بیٹھے ساں۔ راز و نیاز بیتاں ساریاں گلاں..... سارے قصے تھر تی پہوگ
ہوئی گئیاں۔ گزریاں بیتاں راتاں بیتاں دُفریب رُتاں تہ اُنہاں رُتاں بچ یاداں نی
تصویراں نے کھٹے مٹھے رنگ..... اک اک کری ماہڑے اندروں کھسکی نامرادی نی
دلدل بچ ڈبی گئے۔ مگی اسطراں لگنا سی جے ماہڑیاں آساں نی اُچی عمارت زمی پُر
کھلے نے پہنگ نے بوٹیاں پُر اُنکی گئی سی۔ ماہڑے ہوش و حواس بیتاں کھڑکیاں
تالا بند ہوئی گئیاں سن۔

اوہ برابر رونی رہی۔ اُس نے رونے بچ کمزور ہچکیاں..... مٹھا مٹھا درد
 کہمن کہیر گلان ناشدکار..... ماہڑے اندر سوالاں فی نگری بسا نارہیا.....
 اُن گنت سوال..... گنگے تہ ڈورے سوال..... اُن کہڑے..... اُدھ
 کچے سوال..... اُس نے سوالاں بچ اُس نے پیر فی بے وقتی موت تہ پچھلے چالی
 سالوں فی اک اُنھی کہانی سی۔ اُس نے اُٹھاں پُر سوالوں فی بے ترتیبی تہ سوالوں فی
 تپش ماہڑے اندر نے جواباں کی بے بس کری چھوڑیا سی۔ ماہڑے اندر چلے تہ بہانیاں
 کی پُر نکلی آئے سن..... مگر میں..... میں اپنی سُنکی چھبھ دنداں پیٹھ کہوئی رکھی
 فی سی۔ اُس نے رونے فی دل سوز تہ دل خراش لہراں ماہڑے سارے وجود کی اپنے
 حصار بچ لئی رکھیا فی سی۔ پہلی واری میں اُس کول بیٹھاساں..... پہلی واری میں اُس
 کی نیڑے تھیں تیکنے فی خواہش کیتی سی۔ اک ایچے ویلے جدوں اُس فی اُمیداں پھری
 کہناہ والی چھت نا اک اک ذرہ..... اک اک تپلا..... موت فی سونامی نال
 سودا کری بیٹھاسی۔ اک انہونی موت..... مٹھے تہ پیارے پیر فی موت.....!
 ماہڑے اندر فرنگھاں گلاں نابلہ ہو یا پُر اس واری میں اُس کی چپ کران واسطے
 اپنے اندر تڑے چپے..... ڈبے ترنے..... سڑنے بکنے الفاظ جوڑن لگاں
 پر ایہہ ترکیب وی ناکو نے بیڑے بچ دفن ہوئی گئی۔ کمرے نے اندر نا
 خوفناک تہ دردناک ماحول تہ اس بچ گلنیاں بوفونیاں سلّاں..... ہوا بچ نچنیاں
 یاداں نیاں بجلیاں..... اُٹھاں پُر وں بگنے گنگے بول..... سپنہ پٹنیاں نازک
 انگلیاں..... اکھیاں نے سمندراں بچ ترنیاں سادگی نیاں لہراں..... کالے
 تھوہیں نے بد مست مرغول..... کندھاں پُر وں لمکنیاں حسرتاں نیاں بیل بٹیاں
 بیڑے بچ ہائے تھوئی..... اگل بگل نے لوکاں نیاں تگ بازیاں.....

..... ڈنگ بھرنے کے بوٹے پر چڑیاں ناچھول..... ماہرے بچپن فی البیلی کہانی.....
 گنتیاں گنتیاں ماہریاں انگلیاں بچ کرل پئی گئے۔ ماہریاں اکھیاں پہاڑ بنی
 گئیاں..... میں فرچپ ہوئی گئیاں۔

ادہ برابر تو فی ریٹی۔ رونیاں رونیاں ہُن اُس ناسہنگھا شہک ہوئی گئیاں۔ ہر فی
 والی اکھ اکھیاں جہاں بچ پہلا سمندر آباد سی جتھے زندگی نال جویاں نیاں کہانیاں گپت
 بولنیاں سن۔ انہاں نے اگل بگل سیاہ دائرے بھری گئے سن تہ ہُن انہاں دائریاں بچ
 پر فی موت نے اُن مٹ داغ تہ داغاں بچ یاداں نے نقش کھٹی گئے سن۔

تکلیاں تکلیاں شام نے ہمیریاں پورے گراں بچ فر دستک دتی۔ فر بچھوڑے نا
 بھل بجیا..... فر بیزار رستیاں پر نامرادی نے ناگ منہ کھولیا..... فر رستے
 لے ہوئی گئے..... فر ریل فی پٹری پر آ پار آباد ہوئی گئے..... فر آساں نیاں
 پنگاں پر یاداں لارے کھان لکیاں پراض فی واری..... اُس نے رونے فی آواز
 ماہرے مگر وگر ہے۔ اُس نے سپنے بچ کیہڑی کیہڑی گل نابسلوٹ بھر ناسی۔ میں کس
 کی پچھاں؟ می کیہڑا ہسی.....!



پہچان

پتو..... پتو..... کدرے زور نال تہ کدرے مدھم آواز نال اوہ بہتیریاں گلاں
 کرنی سی۔ کولوں جیہڑا وی لنگھیا، اُس ایساں گلاں بچ ہاسیاں نے دریا ڈولے پر..... شہرنا
 رنگ ٹہنگ، شہر نے رسم و رواج، شہر نارہن سہن کچھ بکھرا ہی ہونا ہے۔ بس نسوئی دروڑو
 دروڑی۔ لوک تہ لوک اپنے وی اک دُڈے نال دُروں سلام کرنے..... خالی سلام.....
 ہائے وائے..... کلام فی فرصت کدوں۔ اک دُڈے کی تکنے فی خوشی یا اک دُڈے نال
 گل کلام کرنے فی فرصت ہی کدوں۔ شہرنیاں پکیاں کندھاں نال نال لوکاں نے سینے
 وی باٹے ہوئی گئے سن۔ لوہ ہونیاں حرص نے تمھے طاون بچ غرق ہوئی جانے۔
 غرضیاں نیاں کچیاں پننگاں پُر زنگا موٹا لارے کھان لینا۔ نوکری والا نوکری والے پاسے
 مزدوری والا مزدوری والے پاسے شاہکار اپنے نیماں نے موہنڈیاں پُر بڑیاں بڑیاں
 پوتھیاں لدی رُنے، مگر اُس واکھ کوئی وی نہیہ تکنا..... اوہ.....

اُس فی پتو پتو نے حرفاں کی کوئی وی سُننے واسطے تیار نہیہ۔ اُس فی ڈراو فی شکل
 متھا کالیاں داغاں نال پھر یا نا..... بالاں نے کھکھراں بچ نچنیاں جواں
 دُڈے..... میل..... کالی شاہ سگی فی گردن..... اکھیاں پہلیاں
 زرد..... ٹھوڈی لمکی فی..... مَنہواں پُر چہ ہڑیاں نا جنگل آباد وسنا..... اک

اک چُر ہڑنچ پتھ پتھ میل۔

گوشاں چھلیاں دساں سالاں تھیں اک پُرانی اُدھ کھڑہٹی نے تھڑے پُر آباد
گلاں نی گتھی..... ساری تہیاڑی..... ساری ساری راتی گلاں کرنی..... آپ
مہارے گلاں کرنی..... کدے ہنسی کدے رونی..... کدے کدے اتنا غصہ
کرنی جے ایہہ پتہ لگنا سی بس نپس بچ کسے کی پھٹسی..... کسے کی ماری.....!
زمانہ بڑا بدلی گیا سی۔ رسم و رواج راتی کچھ تہ سویرے کچھ۔ نہ راتی نے ہنیریاں
نا کوئی ڈر رہیا تہ نہ دناں نی روشنی بچ حیا..... ساریاں کہانیاں تہ سارے رواج
حرفاں نی ہیرا پھیری بچ گم ہوئی گئے۔ انسانی قدراں کھوہ کھیل ہوئی گئیاں۔ سارا کچھ
غلط ملط ہوئی گیا۔

پتو..... پتو..... گوشاں پتہ نیہہ کیہڑی زبان بولنی ہے۔ پتہ نیہہ
کیہڑے ملکھے نی ہے۔ آکھ واکھ کرنی ہے۔ چھلیاں دساں سالاں تھیں کچھ آکھنی ہے
پر..... اِس نے آکھے بچ کہہ ہے..... اُس نی گلاں نے بول..... اُس
نے اوٹھاں پُر کھنڈری چلہے بچوں تھویں نے مرغولاں نال رشتہ جوڑی اُڈری جانے
ہین۔ کولوں پہناویں جے نگا ہووے، جوان ہووے یا بڈھا، اُس نال بہتیریاں گلاں
کرنی..... بس پتو..... پتو..... پر کوئی وی شخص اُس کول نیہہ کھلونا، اُس
واکھ نیہہ تکتا، اُس نی گل نیہہ سنتا۔ اُس نے بد بودار تھڑے کپڑیاں بچوں اُن گنت کہانیاں
نے راگ پھٹی پھٹی جانے۔ اُس نی بکھی نال اک پنڈ وکڑی بچ خورے ایہہ ساریاں
گلاں چھپی جانیاں۔ اوہ جدوں وی گلاں نے بول بولنی، تھ نال اپنی پنڈ وکڑی تو سنی
وہنی۔ لوک اُس کولوں اک بیگانگی چال چلی تھری جانے۔

پتو..... پتو..... پتو..... پتو..... اُج اُس نی آواز بچ قہری اُج

اُسُنیاں اکھیاں بچوں بلیں بلیں نہر بکنا سی اُج اُس نی چھاتی بچوں مٹھا مٹھا درد دُہلنا
 سی اُج اُسُنیاں کپڑیاں بچوں دُڈ اُڈر نی سی اُج اُس نے جسم نیاں ہڈیاں بچوں کڑکار
 مٹھنے سن اُج اُس نے تھڑے پڑکھیاں تہ مچھراں اک کہنکارہ باہیا ناسی۔ لوک آکھنے
 ہین..... پتو..... پتو مری گئی..... نیہہ نیہہ..... گوشاں مری گئی.....
 شہر گراں بچ خبر ہوئی..... گوشاں مری گئی..... تھڑے پڑوں مکھیاں تہ مچھر
 اُڈری گئے۔ تھڑے نی مُٹک مکھی گئی۔ آ لے مکھی گئے۔ گلاں مکھی گیاں۔ گوشاں بے
 جان ہوئی گئی اُسے دواں ہتھتاں بچ پرانیاں کپڑیاں نی پنڈو کڑی بھت ہوئی گئی سی۔
 پنڈو کڑی بچوں کجھاں گلاں نے بول سکتے دریانی طراں بگنے رہے۔

شہر نیاں رضا کار تنظیمیں تھڑے نے چو فیری ہوئی گیاں۔ کوئی کفن دفن نی
 گلاں کرن لگا..... مولوی..... پنڈت..... گیاں..... سارے اک
 دُوے نے مقابلے بچ کھلوی گئے۔ اڈھے قبرستان وا کھ جان لگے تہ اڈھے شمشان
 گھاٹ نی تیاری کرن لگے۔ مذہبی لوکاں نکلے جے بد بودار تھڑے کی پانی پت نامدان
 بنائی چھوڑیا۔ تلکدیاں تلکدیاں بدن لکیاں۔ بکھرے بکھرے نعرے لگن لگے۔ چھکو
 چھکی شروع ہوئی گئی۔ مارو ماری شروع ہوئی گئی۔ نکلے تماشا تگن لگے۔ جوان اس گل پڑ
 اُچھلن لگے پربڈھے سوچاں بچ پیٹی گئے۔

تلکدیاں تلکدیاں گوشاں نے ہتھ اُس پنڈو کڑی پڑوں کھسکن لگے۔ لوک تلی ڈری
 گئے۔ ٹولیاں فر کھٹھیاں ہونیاں۔ گوشاں نے اوٹھاں پڑوں سکتے سمندر نادریا بکن لگا۔
 ٹھہرو..... پہلاں ماہری گل سٹو۔ میں پچھلیاں دساں سالاں تھیں تئساں
 کی اپنی گل سُنائی رہی ہاں پر..... تئس..... تئس لوک..... اُج اس زمانے
 نے لوک..... ماہری پہچان کرو..... ماہری پہچان واسطے تئساں نیاں اکھیاں نا

نیر سکی گیا ہے۔ مگر آج..... آج تہ ماہری گل سُو..... ماہری کہانی سُو.....
 ماہری کہانی بڑی مختصر ہے..... بڑی مختصر..... اپنیاں اپنیاں کتاں کی حاضر
 کرو..... اپنی اکھیاں بچ لون پھر و..... ماہرے وا کھتکو..... ماہری گل سُو.....!
 میں..... میں تُساں نی عزت..... تُساں نا احترام..... تُساں نی
 شان..... ماہرا رتبہ..... ماہرا مقام..... ماہری مقبولیت.....
 سارے مذہب..... سارے رشتے..... سارے مُلک تہ ساریاں زبانان بچ
 اک جیا ہے۔ تُساں ہزار رنگ بٹائے پر میں..... ماہرا رنگ..... ماہرا انگ
 ماہریاں گلاں..... ماہرا جسم تہ ماہری روح بچ کدے وی بدلاؤ میہ آیا۔
 تُساں ماہرے واسطہ اک دُوے نا خون کیتا، کروڑاں قتل ہوئے۔ ماہرے ہون نال
 سرحدان ختم ہوئی کیاں۔ میں..... میں..... پراک نی محبوب..... ہراک
 نی پیاری..... میں.....!

ماہری بد قسمتی اُس دن تھیں شروع ہوئی جدوں انسانیت ناسچا تہ سُچا حلیہ ریزہ
 ریزہ ہو یا۔ انسانیت ناسودا حص تہ ہوس نیاں ہٹیاں پُر ہون لگا تہ اس سودا بازی بچ پہل
 ماہری ہوئی۔ ماہرا مقام بے مقام ہوئی گیا۔ ماہرا رتبہ زمیں دوز ہوئی گیا۔ ماہرے جسم
 نال جس نیاں اکھیاں وی ٹا کرا کھا ہا میں اُس واسطیا ک کھڈونا بنی گئی۔ ماہری مٹی پلید
 ہوئی۔ مگی رستیاں بچ..... کندھاں پُر..... بوٹیاں نال..... ٹنگن لگے۔
 رات نے ہنیریاں بچ ہی میہہ بلکن دہنہہ نیاں رسماں بچ وی ماہرے انگ انگ ناسودا
 ہون لگا۔ ذات برادری..... اونچ بچ..... ساریاں گلاں بے کفن ہوئی
 گیاں۔ میں..... ماہری کوکھ بچوں جمن والیو..... ماہرے نال تُساں کہہ کہہ
 میہہ کیتا..... آؤ..... بتکو..... سُو..... ماہرے اوٹھاں پُر گلاں نا اک

گندا تھیر ہے۔ بدبودار تھیر ہے..... گلاں جیہڑیاں تُس سُنی اُن سُنی کری چھوڑ سو۔
 سُو..... میں کدے کدے شہنشاہاں ناتاج بنی راج کیتا۔ میں غریب تھیں
 لئی امیر توڑین ہراک نی عزت ہاں۔ بجن دُشمن ماہڑے دل بچ آباد ہے..... پر
 تُساں اس عزت نال کہہ کہہ میہہ کیتا۔ تُساں ماہڑا بچپن میہہ تکیا۔ بچ گپٹیاں
 کھید نیاں کھید نیاں مگی اپنی حرص نی خاطر کھسپٹیا، جوانی ناتہ تُساں کوئی وی پاس میہہ
 رکھیا۔ ہائے افسوس ماہڑے بڈھیمے کی وی میہہ معاف کیتا۔

میں..... میں گلیاں بچ در بدر ہوئی شہر شہر بچ بدنام ہوئی، گراں گراں بچ
 ماہڑیاں گلاں ہوئیاں۔ تُساں انصاف میہہ کیتا..... تُساں اوپری اکھیاں نال می تکیا
 میں بے زبان ہوئی تُساں نی ہر گل سُنی تُساں نانا زکھرا برداشت کیتا۔ می اس
 گل ناپتہ ہے جے تُساں می ماں آکھیا، پھنیں آکھیا، تہی آکھیا، بوٹی آکھیا..... مگر
 تُساں می ایہہ سارا گجھ آکھی وی بے لباس کیتا۔

ہجوم بچ ساریاں لوکاں نیاں گردناں تھکی گیاں سن۔ سارے لوک بنجر اوٹھاں پُر
 جی نی پنگ تھتھورے نی فصل کپن لگے۔ پنڈوکڑی بچوں اک آخری گل مھٹی.....
 ماہڑے تھڑے نی بدبو کولوں پاسا کھنچائی نسنے والیو..... جاؤ..... اپنے
 اپنے کہراں نی بدبو سونگو..... ماہڑی پہچان کرو..... پہچان کرو..... فراگر
 تُساں کی فرصت لھھی تہ ماہڑی لاش ناسودا کریو۔

سارے لوک مدان چھوڑی ٹری گئے سن..... پتو..... پتو نے بولاں نا آج پتہ لگا سی۔



سیل پتھر

اک واری فر برفونے چٹے پہاڑے نی چھولی بچوں اُگی نادریا بکن لگا.....
 بکنارہیا..... دُور دُور توڑیں بکنارہیا..... دیر دیر توڑیں بکنارہیا۔ نہ برف گلی تہ
 نہ دریانا شکار مٹھا ہو یا پر اتنا ضرور ہو یا جے جس جس وی اس دریانا کھارہ پانی پچتا،
 اُسے سپنے بچ اُگی نے پہاڑ ملنے رہے تہ اوہ تریہا یارہیا۔

لوک آکھنے ہین..... اتھے کوئی جوڑی شے سیل پتھر ہوئی نی ہے۔ چیترا نی
 رُت بچ گجھاں گلاں نے بول جسراں اسمانوں ٹہلی انہاں ٹہا کیاں ٹہیریاں بچ ستاں
 رنگاں نال کھنڈری جانے ہین۔ سجرے کہناہ نے تپلیاں بچ کھنگھر و بجنے ہین۔ جنڈ
 گھر نڈا گجھاں مٹھیاں گیتاں نی سُراں بچ لارے کھان لگنا ہے۔ سیل پتھر شے نے
 ہنگوا کھلی جانے ہین۔ رنگ برنگیاں تریلیاں موتیاں ہاروں چمکن لگنا ہے تہ فر اس
 نے شکم بچوں اُگی نادریا بکن لگنا ہے۔ لوک آکھنے ہین..... تہ گل وی بچ ہے جے
 اس دریانا پانی جس وی پچتا..... اُس نی خیر نیہہ۔ اوہ تہ سیل پتھر ہوئی جاسی۔

وقت نی پنگ پُر ہو تہ نیہہ پر جوانی ضرور لارے کھانی ہے۔ کوئی انہاں لاریاں
 نال پارتوں کوئی ڈونگی حرص نی کھائی بچ پاتال ہوئی جانا ہے۔ کسے نے متھے پُر برفونے

ٹکے جی تہ اس نے نصیبیاں نی سیاہی کی چٹی لینے ہین تہ کدے ریتو نے میناراں پُرس تہ رنگیاں آساں نیلام ہونیاں ہین۔ کدے اوٹھاں پُروں نسنے ہاسے اُوری نیاں کنڈیاں نال قلاوے مارنے ہین تہ کدے نیناں بچوں پھٹنیاں شرارتاں گلابے نے پھلاں کی چوبے مارنیاں ہین۔ کدے دینہہ نیاں رسماں نال گیتاں نے سُر جوڑنے ہین تہ کدے ہنیریاں نی سیاہی بچ بچھوڑے نیاں پھڑاں ڈبی ڈبی جانیاں ہین۔ بس اس طراں جدوں اُس گراں فی فوزیہ تہ راشدوی جوان ہوئے۔ دواں چھٹ ماری زندگی فی ادھ کچی پنگ پُر لارا کھاہدا۔ دواں اکھیاں بند کری چھال ماری۔ دواں کی پھانڈے تہ ڈنڈولے اُڈاری دُور بستی تھیں دُور گنجے پہاڑاں پُر آباد کیتا تھئے برفو نے پہاڑاں بچاگی نے مہماڑ بلنے سن۔ جتھوں اگی نادریا بکنا سی تہ جس ناپانی کھاہہ سی۔

فوزیہ ماؤ نے رنڈیپ نال ڈاڈا تھو کھا کیتا سی۔ پیو نی کچی قبرے فی مٹی تہ پتھراں پُر شاہ کالا تھو اں ڈولیا سی۔ گراں نے لوکاں نیاں اکھیاں بچ ریتو نے چھلے دانے پھینکے سن۔ رشتہ داراں نے اوٹھاں پُر تھکھنیاں گلاں کھنڈاریاں سن۔ اپنی عزت تہ عظمت ناسودا راشد نیاں لالچی گلاں نال کیتا سی۔ راشد پہاویں جے بڑے کھرے نا لاڈلا پُتر سی پُر بچپن تھیں نشہ آور نکلیاں نا عادی ہوئی گیا سی۔ اسے واسطے اُس کول زندگی نا کوئی منصوبہ تہ ہیہہ سی البتہ اُس نے مال و زر بچا جاں ایہہ کشش موجود سی جے اوہ کسے کی وی جوانی فی ادھ کچی پنگ پُر لارا لائی دُور کھنگر پہاڑاں پُر آباد کری آپے سمیت سیل پتھر ہوئی جائے۔

راشد سکول نیاں کندھاں کی خیر آباد کری چھوڑیا سی۔ اُس فی قسمت بچوں علم نا نور اُس دن غیب ہوئی گیا سی جدوں اُس نے پیو فضل دین عظمت خان کولوں نوٹاں فی گڈی رشوت نے طور وصول کیتی سی۔ فر کھر آنی رضیہ نے اگے نوٹاں فی گڈی تہری

اک بڑا گڑکارا ماریاسی۔ فرٹھے نے سُوٹے نال گجھاں گلاں نے بول بولے سن۔
 فضل دین گراں نا چوکیدار ہر جگے موٹے کے بچ مداعت کرنا۔ چنگی گلاس
 اوٹھاں پُر کدے وی نیہ آئی۔ ہر مسئلے بچ پیرا اٹانا۔ ہر لڑائی بچ حاضر ہوئی جانا۔ دواں
 فریقاں نی صلاح کرانا تہ اپنا بچ تلنا۔ فضل دین کول کھرہینے نی فرصت کدوں جے اوہ
 راشدنیاں حرکتاں پُر نظر رکھے تہ اسطراں راشد بلیں بلیں زندگی نی اک اتہجی سڑ کے نا
 مسافر ہوئی گیا جس نا کوئی انت پھیت نیہ سی تہ فراک دن فوزیہ تہ راشد گراں چھوڑی
 دُو ر بستی تھیں دُو ر..... کھنگر پہاڑاں نال اپنا رشتہ جوڑیا تھتھے کہنے گر ملاں نے جنڈ
 جنڈاں بشار خر گوشاں نی فُر فُر..... بن گلداں نی کڑاں کڑاں تہ رنگ
 برنگیاں چڑیاں نی چوں چوں..... دواں کی زندگی نال وابستہ کہانیاں نے راگ
 سنانے رہے۔ دواں کی انہاں نی بولی سمجھنے بچ پہناویں جے بڑا چر لگا پر جدوں ایہہ گلاں
 فوزیہ کی سمجھ آئیاں اُس نیاں سوچاں نی پنڈ کھلی گئی۔ اُس نے جسم نے اک اک ہنگوا
 بچ بجلی نیاں لہراں ترن لکیاں۔ اُس نے اوٹھاں پُر کونکاں تہ سپنے بچوں ہوکاں پھٹن
 لکیاں۔ اوہ خر گوشاں کولوں فُر فُر منکن لگی۔ گلداں کولوں کڑاں کڑاں منکن لگی تہ چڑیاں
 کولوں چوں چوں منکن لگی۔ اُس نے پورے وجود بچ بے بسی نے کڑل پین لگے پر
 راشد وقت نی ادھ کھلی کھڑکی بچوں گنگی سڑ کے ناسر کھمبا تلنا رہیا۔ اُس نیاں ہشک
 اکھیاں بچ سمندر تہ نیہہ پر ڈبورے شوگن لگے۔ اوہ چوری چھپے جنڈاں نے بشار
 خر گوشاں نی فُر فُر گلداں نی کڑاں کڑاں تہ چڑیاں نی چوں چوں تلنا رہیا۔ اُس نے
 موہنڈیاں پُر سوچاں نی پہناری پنڈ بچوں بہتیریاں گلاں نے بول کھسکی کھسکی تھرتی
 پہوگ ہونے رہے۔ اُس نے اوٹھاں پُر فوزیہ نے سولاں نا جواب روز رنگ بٹانا رہیا۔
 روز چلے بہانیاں نا چھنگھڑ چھو لا چھلنا رہیا۔ روز اُس نے پیراں پٹھ نی زمین کھسکنی

رہیٰ، پر فوزیہ..... پہناویں جے اُسنا شکم اوتر نیہہ سی.....!

لوک آکھن ہین..... گل وی سچی ہے جے بیاہ شادی تھیں بعد اولاد.....

..... چنگو منگو..... روزی روٹی..... کپڑا چپڑا..... چنڈ پٹاکہ..... رولا

رپا..... بس اُسے طراں جسطراں جنڈاں بھکار خرگوشاں نی فر فر..... لگداں

نی کڑاں کڑاں تہ چوایاں نی چوں چوں..... اندراں نی شان تہ زندگی نی علامت

ہونی ہے۔

فوزیہ! تیرے سولاں نا جواب ماہڑے اوٹھاں پُروں غیب ہوئی گیا ہے۔ آج

تھیں بعد اپنے سوالاں نا پہرے ماہڑے اوٹھاں پُرنہ تہریاں۔ ماہڑی اوکھت واخ تہیاں

کر۔ ماہڑے جسم نیاں بد ذات تہ بے جان لہو نیاں لہراں ہُن کدے وی برفو نیاں

سلاں بچ اگ نیہہ بالن لکیاں۔ ہُن انہاں بچ آباد بد بودار پھٹکیاں اُساں نیاں

اُساں کی سنگ ذادیاں نے شہر بچ بن باس دیسن۔

فوزیہ! اگر تو آکھیں تہ..... فوزیہ راشد نیاں نیم مُردہ گلاں سُنی سنی تنگ آئی

گئی سی۔ اُس نے مزاج نے پھکے رنگاں بچ تلخیاں نے ناگ سونکن لگے سن۔ اُس نے

سپنے نے بند خانے بچ متانیاں سخت جان لہراں جھٹکنیاں سن۔ پلاں پلاں نے حیلے

ہاڑے اُس نے بیہڑے بچ دکھاں درداں ناہیں راہنہ رہے تہ اوہ بے بسی نی فصل نہل

گگن اسماناں واخ تکی تکی کپنی رہی۔

فوزیہ! اگر تو آکھیں تہ..... میں خرگوشاں نے دو بچے پکڑی لئی آواں۔ اُس

دوئی انہاں بچیاں کی کھڈایا کر ساں۔ چھولی بچ..... موہنڈھے اُپر.....

اندرے بچ..... بڑے پیارے بچے ہین۔ بہوں سوہنے لگنے ہین..... فر فر

..... بچنے..... چھپنے.....!

راشد نے اوٹھاں پُر گلاں نادریا لگی پیاسی۔ اوہ چرتو تپس گلاں کرنا رہیاں.....
 پر فوزیہ..... فوزیہ نیاں گھلیاں اکھیاں بچ اک پہنجل ہو یا سی۔ اُس بند
 اکھیاں بچ کچھلا سارا سفر منٹاں سکینڈاں بچ کری لیا سی جتھے یاداں نی پوٹلی بچ ہُن کوئی
 نقش باقی نیہ سی۔

فوزیہ..... دو بچے..... اک تیر اک میرا۔ نیہہ..... نیہہ.....
 دوئے تیرے۔ ماہڑا کچھ وی نیہہ۔ ماہڑیاں لیکھاں نی سیاہی پھکی پئی گئی ہے۔ ماہڑا
 کچھ وی نیہہ..... ماہڑا کچھ وی نیہہ۔ ایہہ لے دو خرگوشاں نے بچے۔ انہاں کی پال
 انہاں کی..... راشد نے سنگھنے بچ گل پھسی گئی..... گل اڑی گئی.....
 گل مری گئی..... گل سڑی گئی..... گلے کی کہہ ہویا..... تکلنیاں تکلنیاں
 اُس نے متھے پُر برفونے دو ٹکے جمی گئے۔ فر انہاں ٹکلیاں بچوں اگی نادریا لگی پیا۔
 راشد تہ فوزیہ بغلگیر ہوئی گئے۔ دواں نے اوٹھاں پُر وں ساریاں گلاں بے لباس ہوئی
 اُڈری کا لے چہڑھے نے او لے ہوئی گئیاں۔ فر خرگوشاں نی فر فرتہ لگڈاں نی کڑاں
 کڑاں مکی گئی۔ نیلے سمبلواں نے جھنڈاں بشکار گھسر گھسر ہون لگی..... ”ایہہ
 جوڑی وی سیل پتھر ہوئی گئی ہے۔“



مٹی نی خوشبو

ریشماں نے متھے پر مرنیاں مرنیاں اُس گجھاں حرفاں کی پابند کری چھوڑی اسی۔
 فر انہاں حرفاں نے نقش رنگ تہ زبان نیاں ادھ کچیاں یاداں کی اُس بڑا سامی رکھیا۔
 روز شام ہونیاں انہاں حرفاں کی گنگی زبان نی دنیا بچ آباد کری چھوڑنی۔ چلھے چو کے
 تھیں فارغ ہوئی کھڑکی بچوں باہر واخ تکی وئی۔ دؤ ردؤ رتوڑیں انہاں یاداں کی اپنے
 کمزور موہنڈیاں پر چائی چائی پھیرنی وئی۔ اپنے آپ کی دلا سے دینی وئی۔ دل پڑوں
 اٹھنے ادھ کچے سوالاں نا جواب ہنیریاں نی چھو لی بچ لوڑنی وئی۔ فر کالی رات نے
 کالیاں پردیاں بچ ساریاں گلاں ساریاں یاداں ساریاں آساں سامی سلوٹی رکھی
 چھوڑنی، محض اس ڈرنال جے کدے کوئی گل پھٹی تہ فر.....!

شام ہونیاں کھر بچ گڑیاں چچول باہی چھوڑنیاں..... چڑیں مڑیں
 دڑ دڑ..... دروڑنیاں چھالاں مارنیاں..... گجھ ہنسیناں
 گجھ مَس مَس کرنیاں گجھ بندری کہسینیاں..... گجھ کھیڑے
 تروڑنیاں..... ہک دؤے کی چند پٹاکہ تہ جدوں کوئی دروڑ ریشماں نے اوٹھاں
 پڑوں پھٹنی، اسطراں لگنا جے نپے نمبلوں بجلی چمکنی۔ یکنخت گڑیاں چپ ہوئی جانیاں ساہ
 ڈکی ڈکی گلاں کرنیاں ہک دؤے کی اشارے کرنیاں، منہہ کہوئی کہوئی کھش پھش

کرنیاں چھابو چاہڑی گڑا کے مارنیاں، فر چُپ ہوئی جانیاں۔ پر جدوں ریشماں نے
متھے پروں بگنیاں ترلیاں تکدیاں، ٹھٹھن ٹھار ہوئی جانیاں۔ سُب دُھپ ہوئی
جانیاں۔ ہائے اللہ جے امی کی کچھ ہوئی گیاتہ فر.....!

ریشماں نی زندگی ناسفر ریاض نی بے وقتی موت تھیں بعد بگنی سڑ کے پُرتہ نیہہ مگر
اُس نی زندگی ناسفر اک بیابان جنگل بنی گیسو جتھے جتھے اٹھاں گڑیاں نی ترنڈتہ اگے
پیٹ کروہٹی ناک گدرا اُسنے اوٹھاں پُرتہ لباس حرفاں کی روز پھانسی لگنی رہی۔ اُس نی
کنڈ خالی سی۔ رشتہ داری، تعلق داری، یعنی کہ ساریاں داریاں نیاں ریتو والیاں کندھاں
کدوں نیاں تہرتی پھوگ ہوئی گیاں سن۔ اُس نی کنڈ خالی سی۔

روز شام ویلے گڑیاں ناچچول اُس نے پہلیکھیاں کی زندہ کری چھوڑنا سی۔ اُس
نے کمزور موہنڈیاں پُرسوالاں نی اک پہاری پنڈتہری جانا سی۔ اُسنیاں اکھیاں بچ سگے
اتھرواں ناکھو اپہنی جانا سی۔ اُس نے اوٹھاں پُرتہ گلاں نے غبار اڈارنا سی۔ زمی تھیں
آسمان توڑیں آساں نیاں تصویراں بچ کچے پکے رنگاں نیاں ادھ مونیوں لکیراں دُبنیاں
ترنیاں رہنیاں سن۔

ریشماں ناکہر سی جے اک چڑیا کھر..... لوک سنی حیران ہونے سن جے
ریشماں نے کھر بچ اٹھ گڑیاں پلنیاں ہن۔ اک تھیں اک..... دینہسر جوان.....
ریشماں نا متھا پہاویں جے چڑ ہڑنیاں نال پہر یا ناسی، پر لگنا اسطراں سی جے بڑی
پہاگاں والی ہے۔ چمکناتہ لشکنا متھا..... متھے بچ اُن گنت سوالاں ناگہمسان.....
..... سوال ہی سوال، پر جواب کوئی نیہہ۔ جواباں کی شاید بن باسی لبھاسی۔

امی اسماں نا ابو کتھے جمیا، کتھے پلایا کتھے جوان ہو یا۔ اُس نی تصویر پُروں دِسن
ہے جے اُس نا بچپن تہ اُس نی جوانی کسے سچی تہ سچی مٹی نی پیداوار ہے۔ تصویر بچوں

مٹھیاں مٹھیاں ہواؤ نیاں لہراں ترنیاں ترنیاں اسا ہڑے دلاں فی بلنی اگ ہسالنیاں
ہین۔ اُس نیاں اکھیاں بچوں نیلے تلے تہ ٹھنڈے چھمراں فی مٹھی مٹھی خوشبو آنی
ہے۔ اُس نے اوٹھاں پُر مٹھیاں مٹھیاں گیتاں نے بول ڈاریاں مارنیاں ہین۔ لوہ
ہونیاں اُس فی تصویر نارنگ اساں فی زندگی بچ حوصلیاں کی جان بخشا ہے۔ اوہ فی
تصویر بچوں اُس ویلے کجھ گلاں پھٹنیاں ہین جدوں فحری ویلے بوٹیاں پُر وں چڑیاں
نے بولاں بچ اُس فی ذات فی صفت وثناء ہون لینی ہے پُر..... ایہہ گل دہس
کھاں جے شام ویلے ایہہ رنگ کیاں بدلی جانا ہے۔ اوہ نے نین نقش بدلی بدلی جانے
ہین۔ اوہ نیاں اکھیاں ٹساں نے متھے نال جوی جانیاں ہین۔ اوہ نے اوٹھاں پُر چلے
وصلے غرقاب ہوئی جانے ہین۔ اک اک آ لے بچ سوسوزخم دے ہین تہ انہاں زخماں
بچوں بے بسی نے ہو لے پھٹے ہین۔

امی ٹس ابونیاں گلاں سُنی لینے ہو..... ٹس گلاں نا جواب کیاں مہیہ
دینے۔ ہُن روز شام ویلے فی چڑیاں مڑیاں اُس کھروں مکی گئی سی۔ گڑیاں چڑیاں
ہاروں چچول باہنا چھوڑی دتا سی۔ اشاریاں نال گلاں کرنیاں چھوڑی دتیاں ہین۔
تہکا..... مکا..... ہاسے..... گڑا کے..... پھس پھس.....
چوں چوں..... اُس کھر فی میراث اک پنڈتھی ریشماں تہ ریشماں نیاں گڑیاں
اک پاسے رکھی چھوڑیا ناسی۔ ہُن گڑیاں بچپن فی الیملی دنیا بچوں نکلی ہوش و حواس فی
دروٹی پُر قدم رکھیا سی۔ ہُن جدوں وی اوہ اوہ فی تصویر نال گلاں کرنیاں تہ انہاں کی
انہاں ساریاں گلاں فی سمجھ آئی جانی جس نے خوف نال انہاں فی امی فی ہڈی تہ چڑی
سرئی تچی ہوئی گئی فی سی۔

امی! اوہ نے چہرے پُر زندگی نال وابستہ جیہڑی داستان ہے اُس نے حرفاں فی

چوری کدوں تہ کسٹراں ہوئی سی۔ اک ورق پڑھنیاں پڑھنیاں دُوے ورق نی زمین
گلنی تہ بھگنی جانی ہے۔ اک اک حرف نی تلاش بچ اُس نے مطبلاں کی پھانسی لگی لگی
جانی۔ امی! او نی کاغذی تصویر پُر کدے کدے تریلیاں پھٹنیاں ہین۔ او نے پھر کئے
اوٹھاں پُر گلاں گئی گئی جانیاں ہین۔ او نیاں اکھیاں بچ چن تہ تارے دُبی دُبی جانے
ہین۔

بلقیس نیاں چار نکلیاں تہ ترے پڑیاں پہنیاں ہر ویلے اُس نیاں گلاں پُر
ہسنیاں رہنیاں..... گڑا کے مارنیاں تہ کھش پھش کرنیاں رہنیاں۔ اسا ہڑے
کہر ایہہ افلاطون جمی ہے۔ او نی تصویر نال گلاں کرنی وُنی ہے۔ امی کی سوال جواب
کرنی وُنی ہے۔ او..... اساں کول تہ بس او نی اک کاغذی تصویر ہے تہ اس تھیں
بعد..... امی..... امی نی جفاکشی..... مہلتی بخار..... ہڈیاں نا پنجر.....
..... سارے سارے دِن کم کاج کرنی..... ساری ساری راتی او نی تصویر نال
اکھیاں جوڑی جوڑی گلاں کرنی وُنی۔

بلقیس ایہہ سارا گجھ تکی تکی اپنے حوصلیاں نی کچی زمیں پُر پتے ارادیاں نال
اپنے خیالی محل تیار کرنی رہی۔ اوہ جدوں او نی تصویر اگے کھلوی، اُس نال گلاں کرنی،
اُس نال وعدہ کرنی، زندگی نال میل کھانے ہاڑیاں نی گٹھٹھاں کھولنی وُنی۔ سپنے اندروں
مجبوریاں نی پنڈ گرونی وُنی۔ اُس کی اس گل نا اندازہ ہوئی گیانا سی جے او نی تصویر اُس
مٹی نی نشاندہی کرنی ہے جس بچ خوشبو ہے۔ اُس پانی نا ذکر کرنی جس بچ مٹھاس ہے
تہ اُس ہوا نا ذکر کرنی جس نے اندر چن تہ نشی نے گیتاں نیاں سُراں آباد ہین۔

امی میں اُتھے ضرور جاساں۔ اُس نگری بچ ضرور جاساں۔ اوہ مٹی چٹساں۔ اوہ
پانی چکھساں۔ اُس ہوا نے گیتاں نیاں سُراں بچ اپنے او نا بچپن تہ جوانی تلاش

کر ساء۔ امی..... دُکھ..... اوہ دُکھ لَوّو نی تصویر بچوں کتنی خوشبو آونی ہے۔ امی..... لَوّو.....!

بلقیس کنیاں دناں تھیں، کنیاں سالاں تھیں اپنی جد نی ریتو والی دیوار نال چھن لائی لَوّو نی تصویر کتنی نئی، کچھ گلاں کرنی۔ باقی پہیناں نے ہاسیاں تہ گڑیاں بچ اُس نیاں گلاں دفن ہوئی جانیاں۔ اُس کی اس طراں لگنا ہے اُس نی جُستجو کی کوئی روک نہیہ لائی سکنا ہو ضرور.....!

بلقیس تیری ضد تیرے اوٹھاں نے تو تلے بولاں نال زمین پُر تہ نہیہ اسمان نے فیصلیاں نال میل کھانے ہین۔ تیرے لَوّو کی تیرے بولاں نے تڑٹے حرفاں نی آواز ضرور بے قرار کرنی ہوئی۔ بلقیس..... اوہ جگہ..... اوہ مٹی..... اوہ ٹھنڈے پانی..... اوہ مٹھی ہوا..... اسان تھیں دُور..... بہوں دُور..... اسان کولوں اتنے دُور جتنی تاساں پہیناں نی آنے والی زندگی تہ ماہری روز نی بے بسی ہے۔ بلقیس..... تیرے لَوّو آ کھنسن..... روز رات نے ہنیریاں بچ آ کھنسن..... ماہری دو پھاڑ زندگی نے بشکار مُردہ تہ زندہ لاشاں نی ادھ کچی دیوار ہے۔ اک انہی دیوار..... جے کنڈ پھیرنا تہ ٹہی جانی ہے جے منہہ کراں تہ اس نے شکم بچوں بے بہا سٹو لے جمی آونے ہین۔ دُکھاں تہ درداں نے سٹو لے..... گم مُدہ یاداں نے سٹو لے..... جدائی والے سٹو لے تہ.....!

امی میں اوہ دیوار ضرور پار کر ساء، ماہر ایقین ہے۔ لَوّو اس گل نی روز تصدیق کرنے ہین۔ لَوّو..... ماہرے لَوّو.....!

بلقیس نے مضبوط ارادیاں لاشاں نی کچی پکی دیوار اک چٹکی بچ پار کری لئی سی۔ بلقیس لَوّو نیاں یاداں نی پنڈ چائی آج اتھے آنی مہکی سی، جتھے نی مٹی نی مٹھاس جتھے نے

ٹھنڈے پانیاں فی ٹھنڈک تہ ٹھنڈی مست هواؤاں نیاں مست سُراں موجود سن۔
 بلقیس مٹی فی مٹھی چائی اکھیاں نال مٹنی رہی..... سپنے نال مٹنی رہی
 مٹنی رہی..... مٹی نال گلاں کرنی رہی..... گوڈیاں بھکار سر رکھی
 رونی رہی..... ہد کئی رہی..... اُو نال گلاں کرنی رہی۔

اُو..... میں تُساں فی تصویر نال جیہڑا وعدہ کیتا سی پورا کیتا ہے۔ تُساں فی
 زندگی نال وابستہ مٹی بچ بڑا پیار ہے۔ پانیاں بچ بھوں مٹھاس ہے تہ ٹھنڈی ٹھنڈی هواؤ
 نیاں سُراں بچ چن تہ مٹھی نے گیت ہن۔

اُو..... ماہڑا یقین ہے ایہہ دیواراں..... ایہہ لاشاں پہریاں
 دیواراں اک دن تہرتی پہوگ ہوئی جاسن۔ رسیاں نیاں چھاتیاں پد کنڈیاں فی فصل
 کدے نیہہ جمن لگی۔ مٹھلاں فی بہار ہوئی۔ هواؤ نیاں مٹھیاں لہراں پدوں پابندی مکی
 جاسی..... مگر تُس..... اس مٹی فی خوشبو بچ گم سُم اُنہاں حرفاں نے مطبلاں کی
 کیہڑا تلاش کرسی۔ جہاں ایہہ بکھیڑا بابیاسی..... جہاں رستیاں نیاں دُریاں فی
 فصل اتھرائی سی۔ اُو..... ماہڑے اُو.....!



بانو

چلھے نے اگل بگل گلاں پھوڑی تہ کھڑیاں نال کلاوے مارنیاں
 گلاں تھڑیاں پُر حرص نی اگی بچ سڑنیاں گلاں رستیاں تہ شڑکاں پُر
 رُلنیاں گلاں گلاں نا مٹھا مٹھا شکار گلاں بچ جسراں رَلا پئی گیا سی
 رَ لے والیاں گلاں گُنکیاں تہ بے مطلب گلاں گلاں نی فصل بچ یاداں
 نے بٹیاں پُر ترڈیاں نا ڈار یاداں نے ادھ موئے حرفاں بچ ڈوہنگیاں ترڈیاں
 انہاں ترڈیاں نال گلاں نی چھکو تانی تکلنیاں تکلنیاں حرفاں نے بکھیرے
 جاگی جانے فر انہاں حرفاں نے بولاں بچ چوبیاں نی برسات نامیلہ لگی جانا!
 بانو ڈنگراں کی چارنی ادھر ادھر لہنتی اڈا کے مارنی فر چپ ہوئی
 گوڈیاں بچ سر رکھی پیراں نال جوی نی مٹی بکھو کھی اندرو اندری اگی نے ہولیاں کی
 اوٹھاں پُر وں کھسکنیاں بھوکاں نال ہسانی چھٹ ماری اُپر تکتی لہما ساس
 مارنی فر مٹی گرونی اُس کی اس طراں لگنا جے کدے اُپر آسمان پُر وں کھلوئی کوئی
 ہتھوڑے مارنا کدے پیراں پٹھوں زمین نسنی کدے انگلیاں نے پوٹیاں نال
 سرنے بال چھکنی کدے تر ہمز چائی زور زور نال زمین پُر پٹا کنی ۔

بانو نے پیراں بچ اڈا کیاں نال نال ہُن اوٹھاں پُر گنگیاں سُراں وی ڈیرا لایا سی۔
 نپلے تلیاں بچ ڈنگراں کی چھو چھو کرنے نال نال کلوے نے بولاں اُس نی چھو گھسی
 لئی سی۔ اُسنیاں اکھیاں کہو نفرے سمبلواں نے جنڈاں بشکارگی گی جانیاں۔ اُس نے
 اوٹھاں پُر جھمراں نے ٹھنڈے ٹھنڈے پانیاں نے توپے ڈہلی ڈہلی جانے۔ اُس نے
 کنڈل بالاں نیٹاں لٹاں بچ سپنی پلس مارنی۔ اوہ جدوں وی ڈنگراں کی لہٹنی، ترہڑ
 پھرکانی، چھو چھو کرنی..... ڈنگر مڑی مڑی چوری چوری اُس واخ تنکنے رہنے۔
 کدے کدے زور نال تہ کدے کدے بلیں بلیں رامنے..... پونچھ پھرکانے.....
 چھنڈاں مارنے..... فر سدھا گوالے بچ بھگی جانے..... کلکیاں کول
 کھلوئی جانے..... بانو نی اڈیک بچ رسیاں کی سوگھنے رہنے۔ ساری ساری رات
 اس اڈیک بچ کھلوئی رہنے جے کدوں لوہ ہوسی کدوں دہنہہ چڑھسی..... کدوں
 بانو آوسی..... کدوں رسہ کھلسی..... کدوں بانو ترہڑ پھرکانی..... فر چھو
 چھو کرسی۔ فر نپلے تلیاں بچ اڈا کے ماری..... بانو مایہ نے گیت گاسی.....
 ہاسیاں نے غبارے اڈا سی تہ جدوں کدے لوہ ہونیاں بانو ادھر ادھر سہلیاں سکنناں نال
 ٹری جائے۔ ڈنگر گوالے بچ زور زور نال رامنے..... اکو تر فنی چھڑکنی لگی جانی.....
 چھنڈاں کرانے رستے سوگھنے..... مڑی مڑی پینتے واخ تنکنے..... اسطراں لگنا
 جے اج ہیر نے کچے کہڑے بچ ڈونگیاں تریڑاں پئی جانیاں۔

گراں نے پھنگے پھنگے بانو نیاں گلاں کی اپنے گلے ناہار بنائی لیا سی۔ جدھر تگلو
 جتھے تگلو..... لوک جوی جوی گلاں کرنے..... تھڑیاں پُر بیٹھے نے گہرواں نیاں
 ٹولیاں نیاں ٹولیاں بانو نے قصیاں کی ہوا بچ پتنگاں ہاروں اڈارنے..... پڑیاں پنے
 چٹکیاں مارنے..... کچھ ہتھاں نیاں تلیاں پُر تمباکو ملنے تاڑیاں مارنے..... باولیاں

پُر بانو نیاں سہلیاں سنگناں گھش گھش کرنیاں..... ساڑے سڑنیاں..... لُوڑ چانیاں
 بیہودہ گلاں کرنیاں..... طعنے مارنیاں..... ماء کھر کھر مٹگنی..... جُٹھے پہناڈے تھوئی
 تہی ڈنگراں نال پھرنی..... اڈا کے مارنی..... چٹاؤ تھا کڈی ہٹا کے ٹھیریاں پُر
 دلا ننگے مارنی..... گڑیاں والی کوئی گل اُس بچ نہیہ دسی۔ کسے کم کر توت نی ہووے تہ فر
 اس گراں بچ کیہڑا رہوے آ۔

زیو نیاں تر کھیاں اکھیاں بانو نے وجودے پُروں پھٹنیاں لکیراں نے ڈنگے
 تر ڈے نقش تکی لے سن۔ اُس نے اوٹھاں پُر کھن کھیر گلاں ناسمندر تہ سمندرے بچ
 ڈبنیاں تر نیاں آساں جھلے مارن لکیاں سن۔ ساری ساری راتی ہنیریاں نال جنگ
 کرنے بانو نے ناز نکھرے اُس کی گھنڈی چھری نال کُتری کُتری ٹھیر کرنے تہ لوہ
 ہونیاں دینہہ نیاں لال لال رساں اُس کی حرص نی بودی رسی نال نہنی بیہڑے بچ
 کھلوتے نے گجے بٹے پُر ٹنگی چھوڑنے۔

زیو بانو نی راکی کسراں کرسی..... کس نے ذمہ لاسی۔ بانو کی ڈنگراں نال
 لگیاں کسراں جان دیسی۔ روزی روٹی..... کپڑا چہڑا..... کھرے نا خرچہ
 تہ فر..... بانو نا دا ج دکھن..... کس نے ذمہ لاسی..... کیہڑا
 اُسنیاں فکر اں نی پنڈ اپنے موہنڈے پُر چاسی..... کیہڑا اُسنیاں فکر اں نی پنڈ
 اپنے موہنڈے پُر چاسی..... کیہڑا اُس ناسگی ساتھی ہے..... کیہڑا اُس نارشتہ
 دار ہے..... اوہ تہ..... سوچنیاں سوچنیاں اُس نیاں اکھیاں تاڑے لگی جانیاں
 چھپھ لکھی تہ پیراں توڑیں پچھی جانی..... ہتھّاں پیراں بچوں اگی نے
 سرا کے پھٹی پھٹی جانے..... متھے پُروں پامُراد ترلیاں پھٹن لیدیاں.....
 دل نا دیا ہسی ہسی جانا..... اندرو اندری پہنجل ہونا..... فر چپ نی میلی

چادرے بچہ ایہہ سارے روگ بھی کچھ ہی جانی.....!

اُج میں نمبردار نی نال گل لاساں۔ اُج میں اپنیاں آساں نیاں تاراں نال
بجیاں سُراں کی اپنے اوٹھاں پر آباد کرساں۔ اُج میں اُدھ موئے ہاسیاں کی جان بخشی
دیاں۔ اُج میں سپنے بچے نے چھالیاں کی پھٹالساں۔ اُج میں گنگیاں گلاں نے
بولاں بچہ چھپے نے لفظاں کی رنگ پھر ساں۔ اُج میں تہکھنے درواں نی شل سپنے پُروں
پٹساں..... اُج رحیم دادنی موت ناصدمہ اُس کی ڈنگ مارن لگاسی۔ اج اندرے
نے ٹھنڈے چلھے بچوں نسنا تھواں چو فیری کھنڈرنا جانا سی..... اُج.....!

نمبردار نی بچہ وقتہ نمازی..... بڑی بارعب تہ باوقار خاتون..... گراں
نے نکلے بڑے نی خیر خبر کچھنی وئی۔ بڑی نیک تہ رحمل..... گل کرنی شہر ڈوہنی
..... جس واخ تکتی ہٹھیاں بولاں نی سوغات دینی۔ نکیاں نال نکلی تہ بڑیاں نال
بڑی..... غریب غرباء نی کچھ کرنی۔ اُس کدے وی ہتھ نیہہ کھوٹیا جو جس منگیا
اُس کی دتا۔ یتیمیاں مسکیناں کی اپنے ہتھوں بیانی۔ تھوڑا بہت داج وی دینی۔ اُس نے
کہر تہ لنگر ہرویلے لگار ہنا۔ شام توڑیں گراں نیاں لوکاں نی آؤ جانی لگی وئی۔

نمبردار نی کتیاں سالان تھیں کھٹ لگی نی پرکھٹ پُرو راج کرنی..... جو
آکھنی سو کرنی۔ کے مجال جے کوئی اُس نی گل کی ٹال چھوڑے۔ جے روچڑھی جائے تہ
شیرنی ہاروں گئی۔ کہر نا سارا کاروبار..... سارا حساب کتاب اُس نے تھہ سی۔
نمبردار اُس نی گل کدوں ٹال سکنا سی۔

اُج نی لُئی تاہنگاں والی رات..... صد میاں تہ سوٹھیاں والی رات.....
سوچاں تہ فکراں والی رات..... گھپ ہنیری کالی رات تہ اس کالی رات بچ
جاگنیاں اُس نیاں نامراد اکھیاں..... ڈوہنگیاں گھڈاں بچہ دُبیاں نیاں اکھیاں تہ

انہاں اکھیاں بچ سامی سلوٹی رکھے نے اُس نے دو اتھروں اک اتھروں
 مہندی لاساں تہ ڈوہلساں اک اتھروں گہنے گھٹے نال لاساں“۔
 لوہ ہونیاں زیو بتا و لے تا و لے قدماں ہونئی پھونکی نمبر دارے نے کھر بھجی۔ کھر
 ناسارا کم کاج کری نمبر دارنی نی کھٹ کول کھلوئی گئی۔ آج اُسناں اکھیاں بچ تھکاوٹ
 نیہہ سی اک سوال سی بس اک سوال بے ہجاسوال تہ بے کاہٹا سوال!
 زیو نمبر دارنی کی مٹھیاں مٹکیاں کرنی رہئی۔ بہتیری واری منہہ جوڑیا پر اوٹھاں
 پُر گلاں ناکہ مسان جڑی گیا۔ اوہ کیہڑی گل پہلاں آکھے رحیم دادنی موت نا
 ذکر کرے بانو نے بیاہنی گل کرے یا اپنی بیماری نی گل کرے!
 زیو آج کوئی خاص گل ہے آج تیریاں ہتھاں بچوں اگی نے شعلے
 نکلنے ہین آج تیریاں کمبیاں انگلیاں بچ نامرادی نے کھنگرو بجنے ہین
 آج تیریاں اکھیاں بچ ستھرے بولاں کی پھانسی لگی نی ہے بول
 زیو بول!

زیو فر اوٹھ جوڑن لگی گلاں فر کھنکارہ باہیا زیو ترزا کری ٹہنی گئی
 گلاں اوٹھاں پڑوں بگنی کالی کانگے بچ ڈبی ڈبی دو رتوڑیں رُہڑیاں رہیاں۔
 اوہ زیو مری گئی بانو نا کے ہوئی نمبر دارنی
 بانو کی تکی تکی اتنی غمزدہ نہ ہوئی جایا کر بانو ہن تیرے کول رہسی تیری
 خدمت کرسی بس گجھاں دناں نی دیری ہے میں مولوی فتح محمد کی لئی
 آوساں بس دو حرفاں نی کھیڑ ہے!



گلناز

یعقوب بکروال گراں نا بڑا جیٹھا..... ہڈوں گڈوں بڑا مضبوط.....
 گول کٹوری جیاں اکھیاں بچ دُنیا نازعہ..... چٹی داڑھی بچ نورانہ..... چیرا
 متھا..... لُچی ٹھڈی..... بڑے بڑے ہتھاں پیراں نے ہنگوا..... اس
 طراں گلنا جے قدیم زمانے نا کوئی انسان ہووے۔ گل کرنا موتی کھلارنا.....
 مٹھیاں مٹھیاں گلاں نا اک سمندر اُس نے ہوٹھاں پُر آباد..... بڑا ہی صلاح کار۔
 گراں بچ قتل وی ہوئی جائے تہ یعقوب بکروال نا فیصلہ اٹل ہونا۔ نکلے تھیں بڑے
 توڑیں جنے کالسریاں یعقوب نا پسینہ نیہ سن جھلنے۔ کدے کدائیں جدوں یعقوب
 بکروال کُہروں باہر آونا شہر والے پاسے جانا تہ لوکاں نی لین لگی جانی۔ کے مجال ہے
 جے کھوڑے نے اگوں کوئی شخص لنگھی جائے۔ کالا جمبا کھوڑا..... کھوڑے نی کاٹھی
 تہ مہیلاں..... چھن چھن..... چاندی ہاروں جھمکنیاں۔ حیراں نا سوار اوے
 جا کھوڑا۔ گراں نیاں زنائیاں یعقوب بکروال کی تلگی اپنے اپنے کُہراں بچ دڑکی
 جانیاں۔ دراصل ایہہ حیا نا زمانہ سی تہ پہاڑی یعقوب وی بڑا ایمان والا..... بڑا راست
 باز..... بڑا سچا تہ کھرا۔ اُس نے چہرے پُر قدرت ابھجنا رعب رکھیا نا سی جے گراں تہ گراں

شہر نے لوک دی بڑا احترام کرنے سن۔

پہنا جی یعقوب فی سیرت تہ صورت نا کوئی مقابلہ میہ سی۔ اس نال نال اُس نے
کہر نا لنگر دُور دُور توڑیں مشاہور سی۔ چوہی کہنٹے چہاں بچ اگ بلنی..... روٹی
پکینی..... چاہ بنی..... ادھے کھائی ٹری جانے تہ ادھے ہو ر آئی جانے.....
..... دسترخوان کُشادہ سی۔ کدے دی لاگریاں دسترخوان میہ ٹھپیا۔ غریباں مسکیناں فی
دُنیا اُس نے بڑے پسار بچ آبادی۔

پہنا جی یعقوب نیاں بکریاں نا اجڑ لگا تہ کدے میہ رہیا پر ایہہ گل وی بڑی
مشاہور ہے جے شیر ہووے یا ریچھ..... کدے وی اُس نیاں بکریاں نا نقصان میہ
ہویا۔ دراصل مال زکاتی ہووے تہ فر نقصان کیہڑی گل نا۔ روزہ زکوٰۃ نماز.....
پہنا جی یعقوب فی زندگی بچ یقیناً اک انقلاب آنداسی۔ بے نمازی اُس نے لنگر بچ روٹی
میہ سی کھائی سکنا۔ ذکر و فکر نیاں محفلاں..... ہر جمعہ راتی اُس نے کہر بچ چسراں
میلہ لگی جانا سی۔ بڑا ہی خُدا یاد..... خُدا ترس..... ذرا ذرا گل فی وی پرہیز
کرنا۔

کدیاں سالان تھیں بعد پہنا جی یعقوب نے کہر اک رونق آئی..... لوکاں
خوشیاں منائیاں..... مٹھے چاول روز پکنے رہے..... روز لوک مبارکاں دینے
رہے۔ دل خورشید کتنیاں سالان تھیں اپنی خشک چھولی بچ اک خوشبودار مہل فی تلاش
بچ حرصی رہی۔ اُس کی بڑی اُمید سی جے اُس فی کوکھ بچوں فردوس نا جنم ہو سی مگر
قُدرت کی ایہہ منظور میہ سی۔

بہر حال بڑیاں نیازاں نذراں تھیں بعد..... بڑیاں حیلیاں تہ وسیلیاں تھیں
بعد اُس باغ بچ اک مہل پھلیا سی جس فی خوشبو نا انتظار اُس گراں نے پُہنگے پُہنگے پُر

بسے نے لوکاں نیاں سہیاں بچ موجودی۔
 پہاڑی یعقوب نے متھے پُر اک لکیر پھٹی..... اُسناں چمکنیاں اکھیاں بچ
 اک اُتھروں ڈیرا لایا..... اُس نے بولاں بچ حرفاں نا تروٹا پئی گیا.....
 دراصل لیکھ بچ میخ لگی گئی..... آ ہو! پہاڑی عزیز بکروال جدوں وی اساں نے
 بیہڑے بچوں لنگھنا..... اُس نے ہوٹھاں پُر اک گل لارے کھانی ریئی..... بوا
 جی..... لیکھ ماں میکھ پھس گئی۔

گراں نیاں کالسریاں اک اک کری پہاڑی یعقوب نے کھر آونیاں جانیاں
 گُگناز کی چانیاں..... لاڈ کر نیاں..... لارے لانیاں..... گیت
 بولنیاں اک منٹ وی نیمہ چھوڑ نیاں۔ پہاڑی یعقوب اُس کی تکی تکی خوش
 ہونے..... دُور دُور نیاں گلاں سوچنا۔ عمر بعد انہاں نے کھر اک دیا بلیاسی.....
 اک رونق آئی سی..... اک خوشی آئی سی۔ گُگنازنی زندگی نال وابستہ منصوبیاں نا
 ذکر سویرے شام کرنے..... بس کدوں قدم کدھسی..... کدوں سکول
 جاسی..... کدوں ملازم ہوسی تہ کدوں.....؟ پہاڑی یعقوب جدوں وی اکھ بند
 کری سوچنا، اُس نے خیالاں تہ اُسناں سوچاں بچ گُگنازنی زندگی نا اک اک لمحہ یاد
 کرنا..... اک اک لمحے کی نبھانے نیاں تدبیراں کرنا..... نویں تھیں نویں سوچ
 اُس کی گُگناز نال اسطراں جوڑیاسی جے ہُن اُس نے تہ اُسناں کچھریاں بچ اک دہل پئی
 گئی سی۔

گُگناز..... شکلوں سوہنی..... سوہنیاں سوہنیاں موٹیاں اکھیاں
 پتلے پتلے لے ہتھ..... پتلی گردن..... برپک اوٹھ..... سارے
 گراں نیاں کالسریاں کی اس گل نی اڈیک جے گُگناز گل کرے..... گُگناز قدم

کڈھے لوکاں نی خوشامد نی ایہہ حد سی جے لوہ ہونیاں پہاڑی
 یعقوب نے کھر اک میلہ لگی جانا۔ سارے جنے کالسر یاں گُلنا ز نال لاڈ کرنے۔ کوئی
 سینے نال لائی گلاں کرنا کوئی ہتھاں پُر چائی لوریاں دینا کوئی
 موہنڈے نال لائی گیت بولنا، مگر یعقوب پہاڑی نے دل نا چور دل بچ کوئی گل
 ٹھس ٹھس کرنی کوئی گل اُسنیاں سوچاں بچ رولا باہنی۔ پہاڑی یعقوب نے رعب
 داب بچ فرق تہ اجاں توڑیں نیہہ سی مگر ہُن اُسنیاں ہوٹھاں پُر گلاں نی فصل بچ نیلو تہاری
 نیاں جڑاں وی جی آئیاں سن۔ اوہ دُور دُور توڑیں اپنے لیکھاں بچ ہاسیاں تہ
 ہاڑیاں کی شکل بٹانیاں تکتا رہنا گُلنا زنی زندگی نال وابستہ آنے والیاں کہہڑیاں
 نا حساب کرنا رہنا بیگم نی جدائی کوٹھے پُر کھلوی زمی ڈوگی کہوڑے
 خچراں منجھیاں گائیاں تہ پہاڑواں نا حساب کرنا فرسوٹھیاں نی ہٹی پُر
 ایہہ سارا کچھ پکنا تکتا۔ کدے کدے اُس کی اس گل نا اندازہ ہوئی جانا جے وقت نی بے
 رحم تلوار پتہ نیہہ کیہڑے رنگوں وار کرسی تہ ماہڑی گُلنا ز !



پہاڑی یعقوب نی اچانک موت نا صدمہ سارے گراں نے لوکاں واسطے کسے
 حادثے تھیں کہٹ بیہہ سی۔ غریب، مسکین، بیوہ تہ بیمار لوکاں نے گوڈیاں بچوں جان نکلی
 گئی۔ سارے لوک اندروں باہر آئی گئے پہاڑی یعقوب نی دُپری نے چو فیری
 روئیاں تہ ٹھبکنیاں کواں کہہر اباہیا سی۔ پہاڑی یعقوب نی موت نا صدمہ کہٹ پُر
 اپنیاں ضرورتاں کی شاید کوئی چور پچی گیا سی۔ ساریاں لوکاں کی اِسٹراں لگنا سی جے
 پہاڑی یعقوب نی موت نال نال چلھے چو کے نی وی موت ہوئی جاسی
 دسترخوان نی وی موت ہوئی جاسی تھالاں تہ پتیلیاں نی وی موت ہوئی

جاسی..... ہو ر فر..... فر اس دُپری نی وی موت ہوئی جاسی، مگر گلناز نا کے
ہوئی.....!

لوکاں نے ایہہ وسو سے تہ ایہہ انترے برابر ہون لگے۔ اجاں سال وی نیہہ سی
گُزریا جے لنگر نے پھر نامرادی نیاں کواں بچ لارے کھان لگے..... چلھے.....
..... چراں..... تہ چراں بچوں اڈرنی سچی..... کالے سیاہ موہٹے..... ادھ
سرے موہٹے..... اپنے آپ تھیں بے خبر موہٹے..... ٹھنڈی اگ نے سیکے بچ
لوہسے نے موہٹے..... اپنے آپ نال گلہ گزاری کرنے موہٹے..... پہنا جی
یعقوب نے لنگر نے وفادار موہٹے..... اُس نی موت نے صدمے نال اپنے آپ
تھیں بے خبر..... چلھے تھیں دُور..... چلھے نی ہٹاری تھیں دُور..... بیگم
نے دلاسیاں تھیں دُور..... گراں نیاں کُڑیاں نے ہاسیاں تھیں دُور..... گیتاں
تہ گوشیاں تھیں دُور..... زندگی نی ہاری نی جنگ اُسے شناخت نے شیشہ کی بے
آبرو کری چھوڑیاسی۔ منجھیاں، ڈنگراں، کھوڑے تہ پہنارواں نیاں بہکاں بچ پہنگ تہ
تہ تھورے نے مھلاں نی بے گھری بدبورستیاں نی چھاتی پُر کنڈیاں نیاں بے کایاں
کندھاں سہجی یعقوب نی موت نے ساڑے تہ صدمیاں نال اپنی شناخت نے
سارے حرفاں کی خیر آباد آکھیا سی۔ دُپری نے دروازاں تہ کھڑکیاں بچ اجاں کجھ گلاں
اڈیکوان سن۔ پہنا جی یعقوب..... بیہڑے بچ تھڑے نے پھراں کی اجاں اک
آس ٹھکورے مارنی سی جے پہنا جی یعقوب..... فر کچھری لاسی..... تمباکو
..... تمباکو نا تھواں..... تہ تھویں نال رلنے گلنے گلاں نے گڑکار اسمانے پُر
اڈنیاں آساں کی قلاوے مار سن۔

اُدھر گلناز نے پیراں بچ ٹورا پھیری پھیرا باہیا سی۔ کل توڑیں لوکاں نیاں

موہنڈیاں پُر لارے کھان والی اُج پتھر گپٹے، کچ کنڈے نال اپنا رشتہ جوڑیاسی۔ اُسے
 پیراں نیاں تلیاں بچ ڈوہنگے گول پٹی گئے سن۔ یتیمی نے کالے بدلاں ڈوہنگا کھیرا بابا ہیا
 سی۔ گُلنا زگراں نیاں کالسریاں نے موہنڈیاں پُر وں کدوں نی ٹہلی آئی سی۔ اُنہاں
 نیاں اکھیاں بچوں پیار محبت نے دریا سُکی گئے سن۔ اُنہاں نے ہوٹھاں پُر مٹھے بولاں
 نے سینے پُر ڈوہنگے پچھ لگے سن۔ تکلنیاں تکلنیاں گُلنا ز نے چار حرفاں کی گُلّاں نی بنجر
 زمین نا بسیرا نصیب ہويا۔ ہُن گراں نے عکے موٹے جنے کالسریاں گُلنا ز کی گُلّاں کری
 بلا نے سن۔ بول بدلی گئے سن..... حرف بدلی گئے سن..... رستے بدلی گئے سن
 راتاں بدلی گئیاں سن..... رُتاں بدلی گئیاں سن..... رشتے بدلی گئے
 سن..... گیت بدلی گئے سن..... بنڈ دار گُلّاں اجاں وی خوشامدی تہ حرلیص
 لوکاں نیاں سوچاں نال جُوی نی سی۔

گُلّاں نا نکاح گراں نے گبرواں نیاں چپھاں پُر ڈاریاں مارن لگاسی۔ گُلّاں نی
 یتیمی بے کسی تہ بے بسی نا احساس اُس نی زمی ڈوگی نال جُوی گیا سی۔ جیہڑا وی نکاح
 کرسی اُس کی پہنا جی یعقوب نی زمی ڈوگی..... مال جنجال دا ج بچ لکھسی، فر اُس کی
 وی لوک بنڈ دار آکھسن..... اوہ وی گراں نا جیٹھا ہو سی..... اوہ وی دُپری بچ
 بہینی لوکاں نیاں کچھریاں کرسی..... اوہ وی اپنا دسترخوان کُشادہ کرسی..... اوہ
 وی ججے یار قندی کھوڑے نی سواری کرسی..... تہ اوہ وی!!

پر اُنہاں ساریاں گُلّاں بچ..... اُنہاں ساریاں سوچاں بچ، اُس دِن اُس
 کھڑی کجڑ پٹی گیا سی جدوں پہنا جی یعقوب اِس دُنیا تھیں سفر آخرت کیتا سی تہ گُلنا ز
 اپنیاں حسرتاں سمیت پنڈ گراں نیاں کالیاں راتاں نے حوالے کیتا سی۔

گُلنا ز نا نکاح سدھے سادے طریقے نال اپنے نزدیکی رشتہ دار محمد حسین نال

ہو یا۔ شاید پہاڑی یعقوب اس نکاح کی وصیت کہتی تھی سی۔ گلناز نے چار حرفاں بچ فر جان آئی سی۔ فرگراں نے لوک اُس کی گلناز آکھن لگے سن۔ گلناز نے نازکھریاں نی عمر بڑی کہٹ سی۔ اُس نے ناں نی عمر بڑی کہٹ سی۔ اُس نے شوق تہ مراداں نی عمر بہوں کہٹ سی۔ اسطراں لگنا سی جے اُس نی زندگی نے اک اک پرت پُر نامرادی مایوسی تہ دربدری نی اک داستان سی۔ اُس نے ناں نے حرفاں نی سوداگری گراں نے پنگھے پنگھے پُر کواں ماری سی۔ لوکاں فر اپنیاں اپنیاں چہماں پُر حرفاں نے بٹاندرے پالے سن۔ رستیاں فر اُس نے پیراں نیاں تلیاں کی دعوت دتی سی۔ کنڈیاں فر اُس نے لباس پُر چوبیاں نی بارش کہتی سی۔ بٹڈ داری محمد حسین نے ہٹ دھری نفرت تہ شرارت نی اگی بچ سڑی تہی ہوئی گئی۔ گلاں بے کہر ہوئی گئی۔

اُس نے پیراں کی رستیاں رستے باہی لے۔ اُس نے پیر دربدری نی دُنیا بچ آباد ہوئی گئے۔ حریص لوکاں نی حرص بچ لارے کھان لگی۔ آکھنے ہین ”سکھالادیس نکالا“۔ گلاں دلاسیاں نے ستو کھانی ریٹی۔ سکھالیاں نی اگ چا پنی ریٹی۔ ہنیریاں بچ تروٹے پٹی گئے۔ نیندراں جگراتیاں نے دروازیوں پُر گھریاں رگڑن لکیاں۔ خاباں نی مٹی پلید ہوئی گئی۔ چہم پُر سوکیاں نی بستی آباد ہوئی گئی۔ گلاں بچ گول پٹی گئے۔ کواں دفن ہوئی گئیاں۔! گراں نے لوک گھسر پھسر کرن لگے۔ گلاں پُر ساکن پٹی گئی۔ ہُن اُسی کھلیر نی۔ ہُن محمد حسین نے دروازے پُر نواں ناں چڑھی گیا سی۔ گلاں کہروں بے کہر ہوئی گئی سی۔ گلاں ناخُسن تہ گلاں نی جوانی گلاں نا بچپن تہ کنبہ قبیلہ۔ روز نیاں کچھریاں۔ روز نا جوڑ توڑ

..... کدے وی کوئی کچہری توڑ نیہہ چڑھی..... کئی سال گزری گئے.....
 کچہری والے مکی گئے..... کچہریاں مکی گئیاں..... گُلاں بڈھی ہوئی گئی
 گُلاں نی سوچاں پنج تریڑاں پئی گئیاں..... گُلاں ن امرن جہن کیہڑا
 کرسی..... دوائی دارو کیہڑا کرسی..... دُکھ درد کیہڑا پھروسی..... اُسے
 موہنڈیاں پُر چمڑی نی چوڑ کیہڑا کھوسی جس چوڑ پنج چاندی نیاں پازیاں نی چھنکار
 اُسے ہاسیاں تہ تلو ساں بشکار بے آبرو ہوئی گئیاں ہین..... گُلاں..... !!



جینی جینے جی مری گئی

جینی جینے جی مری گئی۔ جینی نے کُہر..... جینی نی دُنیا بچ لوٹی پئی گئی۔ نپلے
 نمبلوں بدل کھ..... کالی کانگ چڑھی..... جینی ڈبی گئی۔ ڈوہنگے سمندر راں
 بچ غرق ہوئی گئی..... جینی نے کُہر بچ چور پئی گئے..... جینی لٹے گئی۔ اج ایہہ
 کیجا چنگھو چھو لا چھلیا..... جینی نی آس نا سحرا، سوہنا، موٹا نازک بٹا.....
 بٹے پُرتے نلے نلے خوشبو والے مھل تنہرتی پہوگ ہوئی گئے۔ اک اک مھل.....
 اک اک ڈاہلی پہوتا پہوتا ہوئی گئی۔ سڑی سچی ہوئی گئی۔ سچی بچوں بچھوڑے نے عُبَار
 مھٹن لگے۔ چو فیری تھواں کھنڈری گیا۔

گراں گراں..... شہر شہر خبر ہوئی۔ دِن دُپہری جینی نے سپنے بچ ڈوہنگا چھ
 لگا۔ جینی چھن لگی..... جینی نے ہتھاں پیراں بچوں اگی نے سرا کے مھٹن لگے
 خبر عام ہوئی گئی..... جینی جینے جی مری گئی۔ نیہہ..... نیہہ.....
 جینی اجاں کدوں مری۔ جینی تھو کھیاں، تلوا ساں تہ طعناں نی بنجر زمی بچ ادھ لکی پھسی
 گئی.....!

گڈو..... ستاں بہاراں نا پلوکڑ..... گندلے نی گندل.....
 برہپک چونجلہ نگ..... چھڑا پاہنگاں پھر یا متھا..... متھے بچ چمکنا من.....
 لوکاں آکھیا سی ٹھول بجاؤ..... ٹھول بجاؤ..... گدرے نے متھے بچ من.....
 ہے..... بڑا قسمت والا ہے پر..... گول مٹول اکھیاں..... اکھیاں بچوں.....
 بگنے محبت نا نیلا، صاف ستھرا مٹھے پانیاں نا دریا..... پتلے پتلے گلابی اوٹھ.....
 اوٹھاں پُر گنگیاں تہ چہلیاں بولاں نا ہندکار..... سوہنے چمکنے لے لے ہتھ.....
 چونجلیاں انگلیاں..... انگلیاں نیاں نازک گھٹھریاں تہ ہتھ نی تلی پُر ڈنگیاں،
 تریڈیاں ریکھاں تہ انہاں ریکھاں بچ ڈو ہنگیاں میخاں.....!

ست ست اوپرے گڈو واخ تکی چُپ ہوئی جانے۔ اسطراں لگنا جے انہاں
 نے اوٹھاں پُر وں کوئی گلاں کھسی لئی جانا۔ گڈو نے اوٹھاں پُر نچنیاں طوطی گلاں جے
 چہلیاں سُراں نا اک ٹھاٹھاں مارنا سُمندرتہ اس سُمندرتہ نے اندرواندری اٹھنے اگی
 نے پہنامبر تہ انہاں پہنامبراں بچ تھنکھنے جینی نے لیکھ..... کیہڑا آکھناسی جے جینی
 جینی جی مری جاسی۔

لوہ ہونیاں جینی گڈو نے لٹکنے متھے پُر وں ہتھ پھیرنی..... سپنے نال لانی
 چُمیاں لینی..... پیراں توڑیں تکی..... ٹپس نی ٹپس خوش ہونی.....
 رتی لال ہوئی جانی..... کدے اگے ہوئی جگانی..... فر مچھے مڑی جانی
 نیہہ..... نیہہ..... اجاں نیہہ..... فراک پاسے کھلوئی تکی وئی
 دندان پٹھ اوٹھ تکی..... چھسی جانی..... اُسکی اسطراں لگنا جے
 اندرواندری چاہا کتر کتر کرنا ہے۔ گڈو نے جاگنے توڑیں دس پلے کرنی۔ زمی اسمان کی
 قلاوے مارنی تہ جدوں گڈو نیندروں جاگنا، جینی سکھ ناساہ لینی..... ہائے تھوئی

.....جے گڈو.....نہ جا گیا تہ.....اُسناں اکھیاں بچ اتھرواں نی اک
 خوزیز جنگ چھڑی جانی۔ اتھرواں نا کھمسان اُسناں اکھیاں بچ جگہ ملی لینا.....نہ
 باہر بگنے نہ اندر سڑنے.....پورے وجود بچ بجلی نیاں لہراں سرا کے مارنیاں.....
اکھیاں بچ دہشت نابزار لگی جانا۔ ہنیرے.....خوفناک تہ دردناک ہنیریاں نا
 لین دین ہونا۔ کہڑی نی کہڑی ہنجل ہونا.....جینی جینی جی مری جانی.....!
 کتیاں دناں تھیں کاگ کوٹھے نے کھبے پاسے بولنا سی.....جینی اک
 پرات آٹے نی روٹیاں پکائی کاگاں کی سٹی.....کاگاں نال گلاں کرنی.....
 کاگاں کی واسطے بہنی.....نیازاں منی.....پر کاگاں نے بول.....بولوں بچ
 ڈوہنگیاں رمزاں.....تہو کھے تہ تنلوس۔ رات ہونی.....اکھیاں نہوٹنی.....
فر جاگی جانی.....اُسکی اسطراں لگنا جے کوٹھے نے کھبے پاسے کاگاں فر پھیرا
 باہیا ہے.....کاگ فر بولنے ہین.....کاگاں نی بولی بچ اک پھر کنا اٹھاتہ ڈورا
 سوال ہے.....!

جینی نیاں ہنیری راتاں بچ کاگاں نے بول آباد ہوئی گئے سن۔ شام ہونیاں
 جینی نے دل بچ کوئی تہی سلائی نال ٹھوکر ماری چھوڑنا.....جینی گڈو کی قلاوے بچ
 لئی چھر کی جانی.....بھگی جانی.....ڈکی ڈکی ساہ لینی.....اکھیاں بند کری
 دو ردو رتوڑیں بھاکے بھیریاں سر کرنی.....جینی.....نسنی.....ڈرنی.....
تربکی.....کوکاں مارنی.....فر اکھیاں کھوئی.....گڈو نے سرے پر
 ہتھ پھیرنی.....ماہڑا شیر ماہڑی راکی کرسی.....ماہڑا شیر.....ماہڑا شیر.....!
 جاجی تگونا گڈو کی ماہڑے نال کتنا لاڈ ہے۔ سکولوں مڑنیاں ماہڑے کول کھلوئی
 جانا ہے.....ماہڑے واخ تگنا رہنا ہے.....اس نیاں انہاں نظراں نال ماہڑی

تھکاوٹ ختم ہوئی جانی ہے..... می اسطراں لگنا ہے جے گڈو..... باجی
جس دن تُس می مزدوری نے پیسے دیو..... میں..... میں اپنی کمائی بچوں گڈو
واسطے اک چنگا کھڈو نائی آوساں..... ہے نا گڈو..... گڈو نی پسندنا کھڈو نا
..... باجی گڈو..... بڑا پیارا گڈو..... ماہڑے کلجے نا ٹوٹا گڈو..... !!

اتیا ز نیاں گلاں بچ ڈاڈا تہ ڈوہنگارولاسی..... اوٹھ جوڑی جوڑی گلاں کرنا
سی..... اُسے اندر نیاں سوچاں بچ..... گڈو..... گڈو نے ماء پیو.....
نوٹ..... نوٹاں نیاں گڈیاں..... کیش تہ عیش..... ہزار ہزار نے رتے
نوٹ..... لکھ..... دو لکھ..... دس لکھ..... فراک چٹکی ماری اسمان
واخ تکنا..... پیراں پٹھوں نسنی زمی تکنا..... کھرو کھرو ہاسے..... چُپ
..... دندر مکنا..... مُٹھیاں بٹنا..... ہتھ مروڑنا..... بس کجھاں دناں نی
گل ہے..... مرغا پھسی گیا ہے..... ہُن شکار باقی ہے..... !!

پہلے لوکے دوستی پکی ہوئی گئی..... مرغا جال بچ پھسی گیا..... جینی کی
وی ماہڑی دوستی پر پکا اعتبار ہوئی گیا..... جیہڑی جیہڑی گل توں می دہسی ہے اوہ ہی
گلاں میں گڈو تہ گڈو نی ماؤ نال کیتیاں ہین..... توں بڑی سیانی ہین..... ہُن
اگلی گل دہسیں..... نوٹ..... رتے نوٹ..... نوٹاں نیاں گڈیاں.....
..... لکھ..... دو لکھ..... دس لکھ..... !

اتیا ز راتی چرتوڑیں شیریں نال گلاں کرنا رہیا..... اک اک گل نال دس دس واری
کڑیاں کڈھنا..... کدے لتاں لمیارنا..... کدے ہتھاں کی شیریں نے
موہنڈیاں نال دلا سے دینا..... بول..... شیریں بول..... فراس تھیں بعد.....
..... ادھے ماہڑے ادھے تو اہڑے..... شیریں توں ادھیاں کی کے کرسیں.....

.....کے کرساں.....پہلاں گہنا گٹھا خرید کرساں.....نویں تھیں نواں سوٹ
لیساں.....عیش.....بس عیش.....!!

دینہہ نیاں ادھ مویاں لہراں بے لباس ہوئی تہرتی کی اپنے قلاوے بچ لئی گریہ
زاری کرنا رہیا۔ اُج تہرتی نے شکم بچوں ظلم.....زیادتی.....حرص.....
ہوس نا کالا ناگ پھنکاراں مارنا سی۔ لوک اپنے اپنے کاروبار کی لئی بے خبری فی گنگی
سرک پُر دروڑن لگے سن۔ کالا.....شاہ کالا چہڑھ نا اک ٹاٹا کا آسمان پُر دوں چلیساں
مارنا رہیا.....پر.....بیلے کالونی نے لوکاں شاید اپنے اپنے کن کپسی.....
گو جیاں بچ باہی رکھے نے سن.....یا فر.....اپنے اپنے اندراں بچ سیل پتھر
ہوئی گئے سن۔

گڈو.....ادھر.....ادھر تک گڈو.....ایہہ تک.....میں.....
.....میں تیرا ماما.....تواہڑے نال لاڈ کرنے والا ماما.....چند جان
کہمانے والا.....ادھر تک.....گڈو.....میں تواہڑے کھڈو نالیا ناہے
.....اج توں ماہڑے نال ماہڑے کھر چل.....ماہڑی چھو نفوی بچ چل.....
.....میں تواہڑے واسطے.....گڈو.....میں وعدہ کینا سی نا.....آ.....
ماہڑے لاڈ لے گڈو.....آ.....!!

انتیاز نے پیراں پٹھ زمی کمئی رہی.....کھسکنی رہی.....اوٹھاں پُر
چنگ جس لگی.....ہتھاں پیراں بچ بجلی نیاں لہراں نچن لکیاں.....دل تہنگ
تہنگ کرن لگا۔ اوہ کدے گڈو کی تہ کدے اپنے آپ کی کولوں لنگھنے لوکاں نیاں اکھیاں بچ
شیریں نے منصوبیاں کی تکرنا رہیا.....اُسے کتاں بچ شیریں نے بولاں نا خاصہ
ہجوم سی.....بس اج.....اج تہ فرکل.....رَتے رَتے نوٹ.....

نوٹاں نیاں گڈیاں..... کیش تہ عیش.....!!

پہیت کھولنیاں اُس فی نظر سدھی شیریں پُر پٹی سی۔ شیریں کھلوتی فی اُس فی
اڈیک بچ اندر باہر کرنی..... ہتھ مروڑنی..... اوٹھاں پُر چہچہ پھیرنی.....
دندرکنی..... نوٹ..... رتے نوٹ..... گڈو..... آج تہ فرکل.....!
کالا شاہ چہڑھ ناٹا پکا بیلے کالونی فی سیدھ بچ سپنہ پٹنا رہیا..... کوکاں مارنا
رہیا..... ہتھ ملنا رہیا..... پر کالونی نے لوکاں نے کٹاں پُر جوں وی نہیہ
رینگلی۔ سارے لوک اپنیاں اپنیاں ضرورتاں..... اپنیاں اپنیاں مجبوریاں تہ اپنیاں
اپنیاں عیساں فی فصل کپنے رہے۔

”شیریں ماہڑا کم ختم..... تیرا کم شروع.....!“

تکدیاں تکدیاں بیلے کالونی بچ اک زوردار تہما کہ ہویا..... چو فیری آلے
کھنڈرن لگے..... بیلے کالونی نیاں کندھاں کمں لگیاں..... لوک اندروں
باہر آئی گئے..... کے ہویا..... کے ہویا..... گلایاں کوچیاں بچ افراتفری
..... ادھر جاؤ..... ادھر جاؤ..... گمی گیا..... کدھر گیا..... لوڑو
..... لبھا..... لبھا..... اندر تلو..... باہر تلو..... گڈو.....
کیہڑا گڈو..... کس نا گڈو..... کے ہویا.....؟

شیریں ہُن کے ہوسی..... باہر واخ تک..... رولا پٹی گیا.....
اُس پھسی جاساں..... ہُن کے ہوسی..... ہُن کوئی نویں ترکیب دہس.....
..... جلدی کر..... جلدی کر..... بیہڑا غرق ہوئی گیا..... پولیس.....
باہر گلایاں کوچیاں بچ پولیس..... لوک..... بیلے کالونی نیاں کندھاں کمں
لگیاں..... زمی کھسکن لگی..... آسمان نسن لگا..... پر شیریں..... ٹس

تھیں مس نہیہ..... فر جلدی جلدی اک نوں ترکیب امتیاز کی دہسی..... اک
 زوردار چٹکی ماری..... ”نہ رہسی بانس تہ نہ بجھسی بانسری“..... شیریں نیاں
 اکھیاں بچ گندے لہو نی پھوار پھٹی..... زور زور نال دندر مکن لگی..... اک
 پاگل گُتی ہاروں گڈو نی گردن پد ہتھ رکھی..... فر اسطراں دبائے جے..... بس
 بس..... اُس اک لہسا ساہ لیا..... جا امتیاز جا..... اُس نے جسم نا
 اک اک ہنگوا کچی..... فر اس تھیلے بچ..... امتیاز جلدی کر..... جلدی کر
 !!.....

کالے سیاہ چہڑھ ناٹا پکا جینی نیاں آساں کی اپنے قلاوے بچ لئی دؤر پہاڑاں
 تھیں اولے ہوئی گیاسی..... بیلے کالونی بچ ہنیریاں ڈاڈا ارواس پٹاس کیتا.....
 پر نیس نی نیس..... لوک فر اپنے اپنے اندراں بچ اپنیاں اپنیاں ضرورتاں
 عیش تہ عشرتاں نا سودا کرن لگے..... پر جینی..... جینے جی مری گئی
 جینی آلے مارنی ریٹی..... گڈو سکولوں کیہڑے ویلے مڑسی..... جینی
 نیاں اکھیاں بچ اڈیک تہ سینے بچ گڈو نے پھوڑے نے تتلوس نیلے آسمان نال قلاوے
 مارنے رہے..... اُس نے خاباں فی بنجر زمی بچ فر کدوں آس نے بوئے تمسن
 فر کدوں مہل مہلسن..... جینی تہ جینے جی مری گئی.....!



گلاب نالہو

ایہہ اُنہاں دناں نی گل ہے جدوں اُسناں اکھیاں بچ چھلیاں پندراں سالاں
تھیں اک درد آبادی۔ کھر کھر ہستی نے اتنے صدمے اُس نے رات دن کی چٹنے رہنے
سن۔ آپونی پُرانی یادنی ٹھنڈی اگ بچ اس نا وجود سڑی تہ سچی ہوئی گیانا سی۔
شازیہ پندراں سالاں نی ہولی پتلی پتنگ جی کونج نی کونج چھوڑے متھے پُر
پتلیاں کہنیاں لکپراں جہاں بچ آساں تہ اُمیداں نے اُچے اُچے پر بت سن تہ انہاں
پر بتاں نی چوٹیاں پُر ٹپلا ٹپلا کہناہ وی جی آیا سی۔ پتلے پتلے لٹھیاں نی سُرخ پٹاویں کالی
بھری گئی نی سی پُر ادھ موئے ہا سے اُجاں توڑیں انہاں نال جڑے نے سن تہ انہاں
ہاسیاں بچ اک سوال اُجاں وی پھیر پڑت کھانا سی۔ شازیہ جڈوں وی لال چادر رکھی باہر
نکلنی سی۔ تکلنے والیاں نیاں اکھیاں نی جس طراں روشنائی مکی جانی سی۔ میں اُسے
شازیہ نی گل کرنا ہاں۔

شازیہ پٹاویں جے نویں دور نی علامت سی مگر اس نی زندگی نال جڑے مڑے
نے گراں نے سب رسم و رواج بچ کوئی فرق ہیہہ سی آیا۔ اُس نا بچپن اُسے مٹی نال گُلیانا

سی جتھے مٹی نے کھڈونیاں تھیں بغیر کچھ وی میہہ سی۔ جوانی نی پوہڑی پُر اُسے قدماں نی کیڑ سارے گراں والیاں سُنی لئی نی سی۔ اوہ.....! اُجاں وی اُسے طراں مال بچھے نال جوانی نیاں کھیڈاں کھیڈ نی سی جس طراں گراں نی دُویاں گُویاں کھیڈ نیاں سن۔ اوہ وی تہ بالو ماہیے نے پٹے بولنی سی درشی تہ چن نے گیت بولنی سی درائی نال کہناہ کہنی وئی سی، کُہر مُونیاں کہناہ ناگڈ اچائی مال بچھا کھنے کھنے آونی سی۔ کُہر بھچی تہ پتلی سوئی نال اپنے پیراں بچ پچھے کنڈے کڈھنی سی۔ فرٹھنڈے چلھے بچوں نسنے تھویں نال اکھ مٹا کے کرنی سی۔ شازیہ..... جسکی زندہ رہنے نی تمنا غرق کری رکھیا ناسی، جیہڑی موت نے بیہڑے بچ کھلوئی آساں کی تھپ لوانی سی جس کی پتہ میہہ کیہڑے کیہڑے صدے چو بے مار نے سن۔

شازیہ تہ اس نی بیمار اتماں نے بیہڑے بچ گلی کرنی کالی جتھی، گاں جدوں وی دُمر ہلانی دواں نے اندراک نازک جئی حرارت پیدا ہوئی۔ دواں نیاں اکھیاں بچ آساں نے دریا بکن لگنے، دو بکھرے بکھرے زاویے اک سمت بچ دوڑن لگنے۔ دواں نیاں سپیاں اندر رازداری ناسمند رٹھاٹھاں مارن لگنا۔ کالی جتھی گاں شازیہ نی اتماں کی جس طراں مہر بچ لہٹھی سی۔ اسے واسطے اُس کی اس نال ڈوہنگا تعلق سی۔ اُس نے سپنے نے اندر مٹھیاں مٹھیاں یاداں نے خنجر چمھنے رہنے سن۔ اوہ وی تہ جدوں شازیہ ہاروں اپنے کُہر سی، بکلی سی مال بچھے نال جنگل بچ جانی سی۔ سہیلیاں سکھیاں نال بالو ماہیا، چن تہ درشی نے گیت بولنی وئی سی، فر چمین چک..... جوانی نی الڑ پوہڑی پُر اُس نیاں پیراں بچ متو من پہاری سنگل پئی گئی سی۔ اُس نیاں اٹھاں پروں بالو ماہیے نے پٹے غیب ہوئی گئے سن۔ اک چٹی چادر ہر کالاداغ لگا سی۔ گراں بچ جس طراں گامی اک بڑا ناں کمایا سی۔

شازیہ نیاں سوچاں تہ فکر اں نا سمندر ڈوہنگا ہونا رہیا۔ ہُن اوہ کہناہ نیاں
سُکلیاں تپلیاں نال جُو یا نا اپنا کہہ سکنی وُنی سی بیہڑ اروز پلے اسمانوں کڑکنیاں۔ بجلیاں نال
سرٹنا رہنا سی جتھے پئی نال بیٹھی نی اُس نی پیارا اُتّاں سی تہ بیہڑے بچ گلی کرنی چتھی کالی
گاں سی۔

تکلیاں تکلیاں گراں نے سارے موسم بدلی گئے سن۔ ہُن گراں بچ بارودی
سراں آباد ہوئیاں سن۔ لہوے نے چھٹے اسمان توڑیں تیرنے سن۔ شازیہ تہ اُس نی اُتّاں
نیاں اکھیاں بچ ری بسی نی کالی چتھی گاں وی اِس طوفان بچ ڈُبی گئی سی۔
اُدھرا توڑی جس طراں سارے موسماں نی فصل کھئی رہیا نا سی۔ ڈُبے تہ ترنے
نا سلسلہ اُجاں توڑیں اُس نے اندر جاری سی۔ اُس نے شعور نے ویران خانے بچ
گجھاں گلاں نی حرارت باقی سی۔ نشہ آور دوائیاں کھائی کھائی اُس نے لہونا اک اک توپہ
بے رنگ تہ بے مزہ ہوئی گیا نا سی۔ گامی اپنی اولاد نے اس صدمے اُگے ٹہنی ٹہیر ہوئی
گیا سی۔ ہُن اُس کی اپنے کرتوتاں نی سزایا دآنی سی۔ اُس کی اِس طراں لگنا سی جے
اُج نی ہوا اُس کی پوتا پوتا کری اُڈارنی ہے تہ چتھے نیاں نازک لہراں اُس کی فر جوڑی
رکھدیاں ہین۔ اُس نیاں اُٹھاں پُروں تہو انیاں اُڈری ہُن یاداں نیاں کال کوٹھڑیاں بچ
بند ہوئی گیاں ہین۔ اُس کی اِس طراں لگنا ہے جے زندگی نیاں ساریاں فصلاں زہر
کھائی چھوڑیا ہے تہ ہُن ادھ موئے ہا سے اُس نے اُٹھاں پُروں پلے پتراں نی طراں
ٹہنی ٹہنی پینے ہین۔ موت..... اُس نے بیہڑے بچ کھلوی اُس نی اڈیک بچ
ہے۔

”اُتّاں..... دُوڑے وارڈ بچ شاید اسا ہڑے گراں نا کوئی بندہ بیمار ہے“ میں
اُس نا پتہ کراواں۔“

”جا بچی جا..... ماہڑے واخوں وی چکھی آویاں نالے پتہ لایاں کیہڑا
ہے؟ گراں نے سارے لوکاں واسطے پکھیاں مدے کوئی اپنا.....!“
”چاچا..... اس مُنڈے کی کے گل ہے؟ ڈاکٹر کے آکھنا ہے؟ میں تُساں
نی مدد کری سکنی ہاں؟“

”بچہ ماہڑے انور کی..... بی نیکیٹو گروپ نالہو ضرورت ہے نیہہ تہ ایہہ
..... سارے پاسے پھری آیاواں اس اوپرے شہر بچ اسماہڑا کیہڑا ہے، کیہڑا الہو
دلیسی؟ جان شکنجے چڑھی نی ہے۔“
”چاچا..... چاچا..... ماہڑا لہو ٹیسٹ کراؤ..... خُدا کرے.....
..... میں تہ نہ انکار کر سداں۔ ایہہ تہ ماہڑا..... گل کرنیاں کرنیاں شازیہ نی گردن
نیہی ہوئی گئی سی۔“

شازیہ تیز تیز قدموں گامی نال بلڈ بینک بچ بچی گئی سی۔ اُس نیاں لہو نیاں لہراں
بچ اک زلزلہ ہو یا سی۔ اک پاسے اُس نیاں اکھیاں بچ کالی چمتی گاں بیہڑے بچ گلی
کرنی دِن لگی تہ دُوے پاسے انور نی زندگی نال وابستہ.....!
”گامی نیاں اکھیاں بچ اک واری فر زندگی نی حرارت ہون لگی سی۔ شازیہ نالہو
مِل گیا سی۔ گامی اندرو اندری شازیہ کی اس لہو نے بدلے بچ پتہ نیہہ کے کجھ دین نا
فیصلہ کیتا سی پر.....!“

”ادھر شازیہ نے اندر بظاہر کوئی بڑی حرارت نیہہ سی پر اُس کی اندازہ سی جے
گامی تہ انور اُس کی ضرور..... کم از کم کالی چمتی گاں خریدی دلیسی فر جنگل جاسی بالو
ما پیے نے گیت بوسی تہ فر.....!“
”بچہ تُس اتھے کس طراں؟“

”چاچا..... جدوں گراں نے سارے لوک شہر نسی آئے سن، اُس وی ٹری آئے ساں۔ اتناں بیمار تھی ہے تہ اُس کی ہسپتال داخل کرایا۔ اسے بہانے نال دِن دِن کڈھنے ہاں۔ کُہر اک کالی چمتھی گاں سی جیہڑی کراس فائرنگ بچ مری گئی سی۔ اوہ وی ماہڑی اتناں کی کسے گامی ناں نے بندے جس طراں..... مہر بچ دتی سی۔“

بس اتنی گل سُندیاں گامی نے سر پُڑا سمان ٹھٹھا سی۔ اُس نے ہتھاں پیراں بچ اُگ لگ گئی سی۔ اوہ فٹا فٹ انور والے پاسے تگن لگا سی جیہڑا بلیں بلیں ہسپتال نے بیہڑے بچوں لنگھی باہر جان لگا سی۔

شازیہ نیاں اکھیاں نے آتش دان بچوں حیا نا دیا بلن لگا سی، اُس نے ہتھاں بچ گلاب نیاں پیتاں مروڑے کھان لکیاں سن، جتھوں لہو نے توپے ٹہنی ٹہنی شازیہ کی آکھن لگے سن ”شازیہ..... ماہڑے لہو نا وی بی ٹیکلیو گروپ ہے۔“



لاپتہ

سڑکے نے کندھے اک پتھر نال ٹپھن لائی اوہ کل سویرے بیٹھاسی۔ شاید اُس
کی نیندر پئی گئی سی یا..... پراجاں توڑیں اوہ نہیہ جا گیا۔ سڑکے پُر آن جان والیاں
تہ ضرور اُس کی تکیا ہوئی پر.....!

اُس فی گمشدگی نے بول بلیں بلیں سارے گراں بچ بے لباس ہوئی گئے سن۔
دوست، دشمن لرزہ کھائی اپنے اپنے بند کمریاں بچ اوٹھاں نال جھڑی فی جنگ تہ اس
جنگ بچ بگنی چنگ نال سنگے فی تھسکی پُر لیپ لانے رہے۔ کلیجے پُر وں اٹھنے تلو ساس
نیاں گتکیاں سُراں اکھیاں بچ ڈبیاں نیاں آساں نال رلی ملی گنجے اتھرواں فی جج
چاٹرنے رہے۔ چن تارے باری باری پہنیت پُر ٹھکورا مارنے رہے پر..... رات
نے ہنیریاں فی کالی پرت بچ ذرا برابر وی تر یڑنہیہ پئی۔ پہنا جی الفونی کھنگ سڑکے فی
اٹلی دڈرے نال رشتہ جوڑی لیا تہ اس طراں گراں نے رواجاں بچ کجڑ پئی گیا۔

ایہہ اُس رات فی گل ہے جدوں اُس نے سینے بچ اک چو بالگاسی۔ فرلہونیاں
تندیریاں اُس فی اک اک رگ بچوں پھڑکی پھڑکی ڈہلی پیاں سن تہ انہاں تندیریاں

نال نال اوہ سارے وعدے..... اوہ ساریاں آساں..... اوہ سارے ہاسے
..... اوہ ساریاں گلاں مٹی نال مٹی ہوئی گتیاں سن جدوں کریک ڈاؤن لگا سی۔

آہو کریک ڈاؤن..... لگا سی..... تہ فر بندو قچیاں نی ہوں پہیڑی سُرا
کولوں بچنے واسطے چلے ہاڑیاں نی ہئی پُر پہیڑی لگی سی۔ گتکیاں زباناں پُر ننگے بول نچن
لگے سن..... چہماں والے تہ پیسے والیاں اک چٹکی نال کریک ڈاؤن نال سودا کیتا
سی پُر..... پہاچی الفوشیداتہ رمضانہ اپنے گوجے پھرو لے رہے تھے دُکھ درد تہ
بچھوڑے نے صد میاں اک کھنکارہ باہیا ناسی۔

گھلے چھوڑے مدانے بچ دلدوز کواں نکلے تھیں لئی بڑے توڑیں ساریاں نے
موہنڈھے تو سن لکیاں سن۔ ساریاں نے ہاسیاں کی اگی نے اکہر بچ ساڑنے نیاں
گلاں مدانے نے پھنگے پھنگے بچ ترن لکیاں سن۔ آج سارا گجھ کھوہ کھیل ہوئی جاسی۔
آج گوالے بچوں رامنے ڈنگراں کی چُپ نے چوبے لکسن۔ آج چوڑیاں نے آہلنیاں
بچوں سپاں نی سوں سوں نے ہو لے اٹھسن۔ آج ستو ستاریاں الفوشیدے تہ رمضانہ
پہائی نے کوٹھیاں نے اگل بگل اُنہاں نے خاباں بچ بچھوڑے نے گیت بولسن.....
..... آج پورے گراں بچ کریک ڈاؤن ہے۔

ایہہ تہ اُس دن نی گل ہے جدوں راتی نے ہنیریاں بچ گراں نے سارے
پہیت گھلے..... ساریاں پہیتاں نے پہیت گھلے فر یاداں بچوں آساں نے
کہوڑے ڈپلے تہ کدرے چہماں پُر ترنے بول تکلے۔ فر انہاں بولاں ناقط پئی گیا
..... اوٹھ بنجر ہوئی گئے۔ اکھیاں نے سکتے سمندراں بچ اسمانوں قہر ٹہلی آیا.....
بندہ بندے کی کھان لگا۔

گل کوئی پرانی نیمہ۔ اسطراں لگنا ہے جے ایہہ گل بس کل نی ہے۔ جدوں الفو

پہناجی روعی روئی اپنی رودا سُنائی سی۔ پہناجی الفو..... گراں نا جھیٹا..... منیا
پڑ منیا نا۔ کوئی کچھری ہووے، بیاہ شادی ہووے..... مرن جین نا ساتھی.....
نکیاں نال نال، نکا، بُریاں نال بڑا..... مخول تہ جمر اں چھھے پڑ کھڑی رکھنا سی۔ میں اُس
کی کدے وی رونیاں نبیہ سی تکیا۔ اُسنیاں اکھیاں بچ ٹنگا رنبیہ تکیا۔ گل کرنا تہ اوٹھاں پڑ
موتی ڈوہلنا۔ رونے والے کی ہنسنا..... ہر اک بیمار نے کُہر بیمار پڑ سی واسطے جانا۔
بس ابھجیاں گلاں کرنا جے بیمارنی آدھی بیماری ختم ہوئی جانی۔ گل بچوں گل کرنا.....
نچھارتاں بانا تہ جے سُر بچ آئی جائے سیف الملوک نے بول بولنا..... پر ہُن.....
.....! پہناجی الفو کی گل سُنانے سُنانے کئی واری سنگھٹ لگا سی۔

اسطراں پہ لگنا سی جے کھوریاں گلاں نی پنڈ اُس نے موہنڈھے پڑے تہ اک
اک کری اُس نے سٹکیچ پھنسی جانی ہے۔ دراصل اُس رات نی ہولناکی اُس رات ناقہر
جس جس نیاں یاداں بچ آباد ہے اُنیاں اُکھیاں بچ پہا جی الفوہاروں گنج اتھرواں نی
جج چڑھنی رہی۔

پہنائجی الفو.....گلاں نے بول تہ بولنا رہیا، پر رمضان.....اُسُنیاں
گلاں سُنئی سُنئی ہوئی گیا سی۔ اُسُنیاں اکھیاں نے ڈبوریان پنج برفونیاں سِلاں جمی
گکیاں سن۔ اُس نے سنگے پنج وی سنگھٹ لگا سی.....اُنہاں کھوریاں گلاں نا
سنگھٹ بجیہُریاں پہنائجی الفو نے سنگے پنج پھنسی پھنسی جانیاں سن.....اُس دردناک
رات نیاں گلاں جدوں بند و قچیاں بند وقاں نے مُنہ بہ کھولی اگی نے شعلے عکلیاں عکلیاں
نے سپنے پنج محفوظ لال لال لہو چوسنگے سن۔ لہونیاں تندیریاں کالی رات نے ہنیریاں کی
قلاوے مارنیاں رہیاں۔ ٹپس نی ٹپس چھڑکنیاں تر فنیاناں لاشاں مٹی نال مُنہ لائی
زندگی نال وابستہ سارے قصے کہانیاں کی خیر آباد کری چھوڑ پاسی۔ جھکیاں بولاں پنج بجلی

چمکی سی۔ بندوچی اک زوردار نعرہ ماری ٹری گئے سن۔ اپنے نال..... اوہ لال
مُٹھکیاں نے چھٹے وی لئی گئے سن۔ انہاں کی شاید ایہہ گل یاد نہیہ سی جے الفو شیدائہ
رمضانی لوہ ہونیاں توڑیں اپنیاں اپنیاں چھو لیاں بچ نامراد بولاں نے بول سلوٹی لئی
جاسن..... فر انہاں نے بنجر اوٹھاں نی زمی پُر پھنگ تھتھورے نی فصل گراں تھیں
لئی شہر توڑیں کھنڈری جاسی۔

پہنا جی الفو اپنے گدرے نی گل کدے وی نہیہ کیتی۔ اوہ جدوں وی رضانی کول
بیٹھا اُس نے گدرے نی گل کیتی۔ شیدے کول بیٹھا اُس نے گدرے نی گل کیتی۔
اسطراں اپنے سکندر نی پہو اس کڈھنا..... فر دل کی جندرا لانا..... فر اک زور
دار چمکی ماری نیلے اسمانے واخ تکنا..... ماہڑا سکندر ضرور مڑی آوسی۔

الفونا سکندر..... سونا بانکا جوان نکلیاں نکلیاں مونچھاں، نکلی نکلی
ککڑی داڑھی، لالا اوٹھ، سمندری اکھیاں، گنڈل بال، پتلا چوچلا نک، برہیک ٹھوڈی، گل
کرنا پھل کھڈارنا..... الفونیاں آساں ناخزائہ..... سکندر!

الفو دینہہ نیاں رسماں نال سارے مدانے بچ لاشاں تو سنا رہیا۔ اوہ کدے
زمین واخ تکنا، کدے اسمان واخ تکنا..... نیازاں مننا..... فر لاشاں تو سنا
..... فر آلے مارنا..... سکندر..... ماہڑا سکندر..... سارے مدانے بچ
کہمسان مچی گیا سی۔ شیدائہ رضانی وی اپنے اپنے سکندر نی لوٹ بچ سن۔ مگر.....!

گل پہاویں جے کل نی ہے پر بارہاں سال گزری گئے ہین الفونا سکندر.....
رمضانی نا فضل تہ شیدے نا جگنو اجاں توڑیں کہر نہیہ مڑی آئے۔ رضانی نیاں گوڈیاں
افضل نی تلاش نال اُس دن سمجھوتہ کری لیا سی جدوں اپنی دروٹی پڑوں اُسنا پیر کھسکیا سی
تہ اوہ پتھر نی سل پُر دھڑام کری ٹھہٹھا سی۔ اُسے ہنگوا ٹھلی گئے سن۔ اُس اک آلا افضل

کی ماری چُپ نی چادر بچ اپنا منہ پہلیٹی لیا سی تہ اُس تھیں بعد رمضان فیاض نے ناں
نے چار حرفاں کی قلاوہ ماری اپنے سپنے بچ محفوظ کری لے سن۔

گراں بچ ایہہ گل بڑی مشہوری جے الفو رمضان تہ شیدے بچ بڑی دوستی ہے۔
الفو تہ شیدار رمضان کول اُس نے تھڑے پُر آنی بھیٹی جانے۔ فر نکلیاں نکلیاں گلاں
کرنے۔ بچپن نیاں گلاں کرنے۔ جوانی نیاں گلاں کرنے۔ بچھوڑے نیاں گلاں
کرنے۔ گجھاں گلاں پُر پچھتاو تہ گجھاں گلاں نے ہاسیاں نال نبھا کرنے۔ الفو جدوں
وی فیاض نی گل چھیڑنا، رمضان یا تہ چُپ ہوئی جانا یا زور زور نال بُو بُو کرنا۔ فر اپنے بنجر
اوٹھاں پُر نامرادی نی چنگ نالیپ لانا..... دندر مکنا..... اُپر اسمانے واخ تکنا
..... فیاض نی اڈیک نے ہو لے اُسے اندروں اُٹھنے..... الفو تہ شیدے نیاں
اکھیاں رمضان واخوں کھسکی اک دُوے نال ٹاکرا کھانیاں، جتھوں الفو نے سکندر تہ
شیدے نا جگنو ست رنگیاں آساں نال بُو دھوئی جانے۔ دواں نے اوٹھاں پُر برہپک
کوکاں اگل بگل نے ماحول بچ کھسی جانیاں۔

مُدتاں گزر گئیاں..... رمضان، شیداتہ الفو اپنے اپنے سکندر نیاں یاداں کی
آساں ناکفن پہلیٹی زمی دوز ہوئی گئے سن، پُر الفو..... الفو نیاں ہمیریاں راتاں بچ
اُس رات نیاں کوکاں ناکہمسان بندوچیاں نال نعرہ تہ اسمانوں اڈنیاں لہونیاں تندریریاں
..... لوہ ہونیاں کمیناں ہتھاں نال لاشاں کی توستا تہ سکندر نی تلاش بچ تر لکھیاں
اکھیاں نے ہاڑے آج وی چو فیری مدانے بچ پُہریاں نیاں قبریں نال جُوے نے
ہین۔ الفو کدے کدے اِس مدانے بچ پھیرا بانا ہے..... پُہریاں نیاں کچیاں
قبراں نال کجھ کجھ گلاں کرنا ہے۔

باراں سال گزری گئے ہین..... الفو..... در بدر..... ہر مہرے نا

سوالی..... ہر دفتر نا سوالی..... ہر پنج نا سوالی..... ہر افسر نا سوالی۔ جوڑے
ہتھیاں پنج بس اک سوال..... ماہرا سکندر..... موڑی دیو..... ماہرا
سکندر۔

الفوسر کے نے کندے پتھر نال پچھن لائی بیٹھاسی۔ شاید ٹری ٹری تھکی گیا سی۔
اُسنیاں ادھ مونیان اکھیاں پنج بگنی سر کے ناتھواں سرا کے باناسی۔ تکدیاں تکدیاں اک
بول..... اک اوتر بول..... اُس نے کتاں نال قلاوہ ماریا سی.....
”الفو..... چنے جی سکندر نی تلاش تو اہڑے بس فی گل نیہہ۔ لاپتہ سکندر نا پتہ اس
مدانے پنج نیہہ اُس مدان پنج لکسی.....!!“



(مُک چُک)